

Lucas

Ñotsse Condase'cho Jesucristone

Chigambian'cho

¹⁻³ In'jan'cho Teófilo: Majan a'i tseyi me'ttia'ye Jesús'ccu can'jemba osha'choma attepa va ñotsse condase'choma inginga conda'fa. Tsain'bio a'i pañamba pa'ccoma tansintsse tevaen'fa. Ña'qqe bo'tssingae osha'choma ñotsse atesupa ja'ño asi'ttaemba gi in'jan tansintsse quenga tevaeñe. ⁴ Qquen tevaensi qui tansintsse que osha'chove paña'choma atesuya.

Juanma isuya'chone condase'cho

⁵ Tayopi Herodes Judea ande na'suite Chigama afa'su Zacaríasja can'jen. Tisei'ccu fae'ngae Chigama afaye semasundeccuja Abiasundeccu tsu. Zacarías pushe'qqe Chigama afa'su Aarón aindeccu'su pushesu tsu. Tise iniseja Elisabet. ⁶ Tsendeccuja Chigave in'jamba ño'a'fa. Pa'cco Chiga manda'choma ñotsse pañamba shaca mecho canse'fa. ⁷ Elisabetja du'shuve isumbe'yi coenza ccasheve da. Zacarías'qqe ccashe'ye.

⁸ Tseyi tise Abiasundeccu Chiga ettini sema-jeinte Zacarías'qqe Chigama afa'suve sema'jen.

⁹ Chigama afasundeccu in'janqquia'caen quini'ccocho'ccoma attufaen'fa majan Chiga ettinga ca'nimba ñome'bama oque oraeña'chove atesuye. Tsequi a'ta tsu quini'ccoja canjaen Zacarías ca'niña'chove. ¹⁰ Zacarías ca'nimba ñome'bama oque oraen'jen'ni poiyyi'cco a'i

tsotefanga ccutsupa Chigama iñajan'jen'fa.
 11 Tsa'caen Zacarías tisuyi ca'nisi Chigama sefacconi'su shondo'suja tisenga attian ñome'bama oque'je'chombe tansinfani ccutsupa. 12 Zacaríasja tisema attepa asi'ttaemba dyo. 13 Tsa'ma Chigama sefacconi'su shondo'suja tisema su:

—Dyojama Zacarías. Tayo tsu Chiga Quitsaja que iñajan'choma paña. Que pushe Elisabetja tsandie du'shuve tsu isuya. Tisema qui inisian'faya Juanme. 14 Que'i qui avujatssi'faya. Tisema isusi tsain'bio a'i'qqe avujatssi'faya. 15 Nane Tiseja Na'su Chiga joccapitssia a'ya tsu. Osha'cho ccusianqqe'suma tiseja cu'iyabi. Tsa'ma toya isumbi'te tsu Chiga Qquendya'pa tisenga ca'nimba in'jaeña. 16 Du'shuja coenzave dapa tsu tsain'bio israendecuma in'jaeña cuintsu Chiga Quitsama tise'pa Na'suve tta'tta'faye. 17 Tiseja Na'suma o'tie tsu jiya. Tayopi'su Chiga Aya'fama afa'su Elías injama'choma an'bianqquia'caen tise'qqe osha'choma oshaya. Tiseja aindecuma in'jaeña cuintsu yayandeccu tise'pa dushundecuma in'jan'faye; cuintsu egae tsinconsundeccu'qqe ño'a a'i in'jan'chove ttatta'faye. Tsa'caen aindecuma in'jaensi tise'paja Na'suma shondo'faya.

18 Tsa'ma Zacaríasja Chigama shondo'suma su:

—¿Ma'caen gi in'jaña que su'choja tansintssia've? Ñajan coenza ccashe'ye. Ña pushe'qqe coenza ccashe.

19 Tsa'caen iñajampañasi Chigama sefacconi'su shondo'suja su:

—Ñá gi Gabriel. Ñá gi Chiga can'jeni ccutsu'cho. Tiseja ñama moen va ñotsse condase'choma quenga condaseye. ²⁰ Tsa'ma ¡que canjan! Ña suqquia'caen tsu ñoa'me tsoña. Tsa'ma queja ña su'choma in'jambipa qui ayafambie dapa can'jeña que pushe du'shuma isuya'ngae.

²¹ Tsa'caen condase'je'ni aindeccuja tsotefani Zacaríasve ro'ndá can'jen'fa. Junde sombombisi asi'ttaen'fa. ²² Tsa'caen asi'ttaen'jen'fani Zacaríasja sombopa afaye oshambipa tise tivei'ccu canjan'jaen. Tsa'caen afaye oshambisi poi'cco a'i in'jan'fa tise Chiga ettini can'jemba sefacconi'su attian'choma atte'chove.

²³ Tsomba Zacarías Chiga ettini sema'jen'choma nanimba tise tsaoni ja. ²⁴ Omboe tise pushe Elisabet surie dapa cinco ccovuve tsaoni can'jen. Can'jemba qqen in'jan: ²⁵ “Ñajan du'shu mechopa ansangé can'jen. Tsa'ma Na'su Chiga ñama in'jamba ñama ñotsse tson cuintsu cca'i ñama afambe can'faye.”

Jesúsma isuya'chone condase'cho

²⁶ Seis ccovu pasasi Chigaja Tisema sefacconi'su shondo'su Gabrielma mandamoen Galilea ande'su Nasaret canqqueni. ²⁷ Mandasi ja, chu'a pushesu, Maríanga condaye. Tsaja, toya tsandiema atesumbi'choa. Tsa'ma fae tsandie, José, tisema pusheye tayo ññajan. Joséja tayopi'su israe Na'su David a'i. ²⁸ Gabrielja jipa Maríama ttu'sepa su:

—¡María! Que qui Chiga in'jan'cho. Chigaja quei'ccu can'jen.

²⁹ Tsama pañamba Maríaja injama'choni dyo. Jongoesie tsa'caen chigambian'chove atesumbipa asi'ttaen. ³⁰ Tsa'caen dyosi Chigama sefacconi'su shondo'suja ti'tsse condase:

—Dyombe canjan, María. Chigaja ñoa'me quema ñotsse in'jan. ³¹ Surie dapa qui tsandie du'shuve isuya. Tisema qui inisiaña Jesúsve. ³² Tise tsu joccapitssiaya. “Joccapitssia Chigambe Dutssi'ye” qquen tsu poiye'cco tisema afa'faya. Nane Tayopi'su Na'su Davidnga mandaye antteqquia'caen Na'su Chigaja tisenga'qqe antteya cuintsu na'suve dapa mandaye. ³³ Tsangae tsu tiseja israe aindecuma manda'jeya. Tise na'suve da'choja minga'ni'qqe pasaya'bi tsu.

³⁴ Tsama pañamba Maríaja su:

—¿Ma'caen tsu tsa'caen tsoña ñajan tsa'ndu mechoamajan?

³⁵ Tsa'ma Chigama sefacconi'su shondo'suja su:

—Chigaja osha'choma joccapitssiapa osha'choma oshacho. Chiga Qquendya'pa quenga ca'nisi Joccapitssia Chigaja quema oppoeña. Tsa'caen oppoensi que du'shuya ñoa'me egave mechosi tsu Chiga Dutssi'ye qquen su'faya.

³⁶ Toya'caen que antian coenza Elisabet ccasheve dajipa surie da. Tsa du'shuve mechoa qquen su'cho tsu ja'ñojan surie dapa seis ccovuve can'jen.

³⁷ Nane Chigaja osha'choma oshacho.

³⁸ Tsonsi Maríaja su:

—Dasu'. Ña gi Na'su Chigama shondo'su pushesu. Cuintsu Tiseja que suqquia'caen ñanga tsonjan.

Tsa'caen susi Chigama sefacconi'su shondo'suja ja.

María Elisabetma can'su ja'cho

³⁹ Tsonsi Maríaja ñoñamba Judea ande'su ccotta'cco'su canqqueni pasia'su ja. ⁴⁰ Japa Zacarías tsa'onga ca'nimba Elisabetma chigambian. ⁴¹ María chigambian'choma Elisabet pañasi tise du'shuja ttopa'ye quia'me oya. Tse'faei'ccuyi Chiga Qquendya'pa in'jaensi ⁴² Elisabetja quia'me afapa su:

—Quema tsu Chigaja poiyyi'cco pushesuma ti'tsse'tsse injancho. Que du'shuma'qqe tsu ñoa'me injancho. ⁴³ Ña na'su chan ñama can'su jisi gi ñoa'me avuja. ⁴⁴ Nane que chigambian'choma ña pañasi tsu tse'faei'ccuyi ña du'shu'qqe avujapa ña ttopa'ye quia'me oya. ⁴⁵ Chigaja Tise su'choma ñoa'me tsoña. Tsama pañamba in'jamba qui ñoa'me avujatssiya.

⁴⁶ Tsonsi Maríaja su:

—Ña injama'choi'ccu gi Na'su Chigama ñotsse afa.

⁴⁷ Chiga ñama ccushaen'su can'jensi tsu ña qquendya'pa'qqe avujatssi.

⁴⁸ Ña gi utu'cco Chigama shondo'su. Tsa'ma Chigaja ñama attepa ñotsse in'jan.

Tsa'cansi poiyyi'cco a'i tsu ja'ño, jai'ngae'qqe conda'faya ma'caen Chiga ñama ñotsse in'jan'choma.

⁴⁹ Tiseja Joccapitssiapa ñama ñotsse tson.

Tise inise tsu Ño'a.

⁵⁰ Poiyyi'cco majan Tise've in'jamba canse'nijan tsendeccuma tsu mendeyeya.

51 A'i quin'an tisu tivema canjaenqquia'caen Chigaja osha'choma oshapa canjaen.

Aindeccu “Ña gi ño'a” qquen in'jan'ni'qqe Chigaja tise'pama joqquitssian maña.

52 Tiseja Nasundeccuma joqquitssiamba bove'ccondeqquiama tsu ti'tsse'tssia've tson.

53 Qquipoe'sundeccuma o'fianqquia'caen ñotssiam afe.

Tsa'ma osha'choma an'biansundeccumajan me'ccoeyi maña.

54 Israendeccuja Tisema shondosundecкуси Chigaja tise'pama fuite.

Tayopi suqquia'caen tise'pamajan anttembe'yi tsangae mendeye'je.

55 Tsa'caen Chigaja ingi tayopi'su coenzandecuma conda.

Nane Abraham, tise dushundeccuma'qqe tsa'caen fuiteye conda.

56 Maríaja tsa'caen Chigama ñotsse afapa tres ccovuve Elisabeti'ccu can'jemba toequi tise tsaoni ja.

Juanma isu'cho

57 Elisabet du'shuma isuya'cho napisi tsandie du'shuve isu. 58 Pporotsse can'jensundeccu, antiandeccu'qqe Chiga tisema ñotsse tson'choma pañamba fae'ngae avuja'fa. 59 Ocho a'ta pasasi israendeccu in'janqquia'caen du'shumbe ttonoma chhiyitevaeñe poiyl'cco a'i bo'fa. Bopa du'shuma tise yaya iniseningae Zacaríasve inisiañe in'jan'fa.

60 Tsa'ma chan tsu su:

—Me'i. Tsa'cambi. Juanme tsu inisiaña'cho.

61 Tsonsi tisema su'fa:

—Tsa'ma me'i'on tsu que antian tsesu iniseve.

⁶² Tsomba du'shumbe yaya Zacaríasma ñajampañañe in'jamba tivei'ccu canjan'jen'fa cuintsu du'shuma jongoesuve inisiaña'choma condaye. ⁶³ Tsonsi Zacaríasja canjan'jen'choma in'jamba canjan'jen cuintsu tisenga tevaen-qque'suma afe'faye. Isupa tevaen: “Tise iniseja Juan.” Qquen tevaensi poi'cco a'i asi'ttaemba can'boen'fa. ⁶⁴ Tse'faei'ccuyi Zacaríasja ccase afaye oshapa Chigama ñotsse afa. ⁶⁵ Tsonsi pporotsse can'jensundeccuja dyopa can'boen'fa. Tsa'caen tson'chone tsain'bitsse condasecco'fa. Nane pa'cco ccotta'cco'su Judea ande'ye tsa'caen tson'chone condasecco'fa. ⁶⁶ Poi'cco majan tsane pañamba injama'choni in'jamba su'fa:

—¿Micoña tsu va du'shuja?

Chigaja ñoa'me tisema in'jamba fuitapa angacan.

Zacarías settapoen'cho

⁶⁷ Chiga Qquendya'pa tisenga ca'nisi du'shumbe yaya, Zacaríasja, Chiga in'jaensi afa'choma afa:

⁶⁸ “Ñotssi tsu israe Na'su Chiga Quitsa.

Tise aindecuma can'su jipa ccushaemba Tiseja ñotssi.

⁶⁹ Tisema shondo'su David omba'su dutssiyendeccu'su quin'an ccushaen'suma ttu'sepa inginga moen.

⁷⁰ Tayopi Chiga Tisema afasundeccuma in'jaensi tise'paja ingi ccushaya'chone afa'fa.

⁷¹ Ingima iyiccayesundeccu'ye, ingima chi'gasundeccuye'qque Chigaja ingima ccushaëña.

72 Ingi tayopi'su coenzandeccuma mende'yeya qquen su'chopa tsu tsa'caen tsoña.

73 Nane Chigaja Abrahami'ccu condasepa ñoa'me tsoña'choma tansintsse conda.

74 Ma'caen ingija ingima iyiccayesundeccu'ye ccushapa tisema dyombi'tsse shondo can'faya'choma.

75 Tisema shondocamba gi ño'ame dapa tsangae egae tsincombe'yi tisei'ccu can'jen'faya.

76 Que, ña du'shuja, Sefacconi'su Chigama afa'su qui.

Tsa'cansi tsu poiya'cco a'i su'faya:

'Na'suma o'tie japa tsu Tise jiya'chove ñoñaña.'

77 Egae tsincon'choma joqquitssiaña'chone tsu poiya'cco a'inga condaya cuintsu atesu'faye tsa'caen Chiga a'ima ccushaña'choma.

78 Chiga Quitsa ñoa'me ingima mende'yepa tsa'caen tsoña.

Nane a'ta a'taqquia'caen Chiga sefacconi ingima attiaña.

79 Tsa'caen tsu paya'chondeccunga attiaña cuintsu tise'pa sinttia'ni can'jen'choma catipa a'tatssianga ji'faye.

Inginga'qqe attiaña cuintsu ingi'qqe Tise've in'jamba cansepa dyombi'tsse opatsse canse'faye."

Tsa'caen tsu Zacaríasja Chigama ñotsse afa.

80 Du'shu Juan Chigave in'jamba coen. Tayo coemba a'i menia japa bo'tsse tseni can'jen. Nane tise israendecuma candusiaña'cho napiya'ngae tseni ro'ndá can'jen.

2

Jesúsma isu'cho (Mt 1.18-25)

¹ Ande na'su Agosto na'suite tiseja manda poi ande'su a'ima agattoye. ² Me'ttia'ye tsa'caen agattoye mandasi Cirenio tsu Siria ande'su governoror. ³ Poiyi'cco tsu tise a'i canqqueni ja'faya'cho tseni tise'pa inisema tevaensi cuintsu agatto'faye. ⁴ Tsa'cansi Joséja Galilea ande'su Nasaret canquene sombopa Judea andeni ja. Joséja David a'ipa Judeani japa Belén canqqueni ja. Tsa canqqe tsu tayopi'su Na'su Davidma isu'cho canqqe. ⁵ Nane tise pushe Maríai'ccu tseni tise'pa inisema tevaeñe ja'fa. Maríaja tayo suri. ⁶ Tsa'cansi toya Beléni can'jen'ni tayo tsu María du'shuma isuya'cho napi. ⁷ A'i ana'jen'cho tsa'o panshaen on'basi vaura ettini can'jemba Maríaja tseni tise aische tsandie du'shuma isu. Isupa sarupai'ccu findipa vaura an'jen'cho cafonga ppiña.

Chigama sefacconi'su shondosundeccu attian'fa'cho

⁸ Beléni pporotsse tsu can'jen'fa oveja coirasundeccu. Cose potreroni can'jen'fa tise'pa ovejama coiraye. ⁹ Tse'faei'ccuyi Na'su Chigama sefacconi'su shondo'su tise'panga attian. Attiansi na'su Chiga a'tatssiaja tise'panga chanjun. Tsa'caen chanjuni ñoa'me dyo'fa. ¹⁰ Tsa'ma Chigama sefacconi'su shondo'suja su:

—Dyo'fajama. Ñotsse condase'choma condaye gi ji. Poiyi'cco a'i tsu vama pañamba avujatssi'faya.

¹¹ Ja'ño a'ta tsu David canqqueni que'ima

ccushaen'suve isu. Tsaja Na'su Cristo tsu. ¹² Nane ña su'cho du'shumanda qui atte'faya sarupai'ccu findipa vaura an'jen'cho cafonga ppiña'choma.

¹³ Tise tsa'caen su'je'ni tse'faei'ccuyi tsain'bio Chigama sefacconi'su shondosundeccu tisei'ccu fae'ngae attian'fa. Tsa'caen attiamba Chigama ñotsse afapa su'fa:

¹⁴ Sefacconi'su Chigaja ñoa'me ñotssia tsu.

Va ande'su aindeccuma ñotsse in'jamba Chigaja in'jan cuintsu poi'yi'cco a'i tisupapora ñotsse in'jamba opatsse canse'faye.

¹⁵ Tsa'caen afa nanimba poi'yi'cco Chigama sefacconi'su shondosundeccu ja'fasi oveja coirasundeccu tisupaporai'ccu condasecco'fa:

—Jinge Beléni jaye. Na'su Chiga va ñotsse tson'choma inginga condase'choma japa atteye.

¹⁶ Cunshoa'me japa Maríama, Joséma'qqe cachui'fa. Tsomba du'shuma'qqe atte'fa, vaura an'jen'cho cafonga ppiña'choma. ¹⁷ Du'shuma attepa du'shune tise'panga condase'choma condase'fa. ¹⁸ Oveja coirasundeccu tsa'caen condase'fasi poi'yi'cco pañasundeccu asi'ttaemba can'boen'fa. ¹⁹ Tsa'ma Maríaja osha'choma in'jamba injama'choni asi'ttaén can'jen. ²⁰ Tsomba ovejama coirasundeccu toequi japa Chigama ñotsse afa'fa. Nane Chigama sefacconi'su shondo'su ma'caen conda'choma tayo pañamba tsa'caen attepa Chigama avujatsse afa'fa.

Jesúsma Chiganga afe'fa'cho

²¹ Ocho a'ta pasasi du'shumbe ttonoma chhiyitevaemba tisema inisian'fa Jesúsve.

Tsa'caen tsu Chigama sefacconi'su shondo'suja tayoe conda María toya surimbi'te.

²² Moisés manda'cho mandaqquia'caen pushesu asettupa onjoña'chone napisi Maríaja onjon. Onjomba du'shu Jesúsma Jerusaléni anga'fa tisema Chiganga afeye. ²³ (Na'su Chiga manda'cho tsu su: Majan aisheve isu'cho tsandie du'shumajan tsama Chigaja in'jan Tise'beve.)

²⁴ Toya'caen Na'su Chiga manda'cho tsu manda dos ppuppuju'choma, tsambi'ta dos manambema Chiganga afeye. Tsa'caen manda'chosi María, José tsama afeye ji'fa.

²⁵ Tsaite Jerusaléni fae tsandie can'jen, tise inise Simeón. Tiseja ño'amba Chigama ñoa'me in'jan. Chiga Qquendya'pa tisei'ccu can'jensi tiseja israendecuma ccushaeña'chove ronda'je. ²⁶ Toya'caen Chiga Qquendya'pa tisema in'jaemba conda, tiseja toya pambi'te Na'su Chigambe Cristoma atteya. ²⁷ Tsa'caen condapa in'jaensi Chiga ettini ja. Tseni japa can'jen'ni María, Joséi'ccu du'shu Jesúsma i'fa manda'cho suqquia'caen tisema tsoñe. ²⁸ Tsa'caen i'fasi attepa Simeónjan du'shuma opipa Chigama ñotsse afapa qqen su:

²⁹ Na'su, ja'ñonda gi avujatsse paya.

Que suqquia'caen ³⁰ gi Que ccushaen'suma tayo atte.

³¹ Queja poiyi'cco a'inga tisema moen cuintsu atepa in'jan'faye.

³² Nane tiseja israembindeqquianga attiansi tsendeccu'qqe queve in'jan'faya.

Tise'qqe israendeccu'susi israendeccuja ti'tsse'tssia've dapa avujatssi'faya.

³³ Simeón tsa'caen susi José, María pañamba can'boen ccutsu'fa. ³⁴ Tsonsi Simeón tise'pama ñotsse afapa du'shumbe chan Maríama su:

—¡Que canjan! Va du'shuve in'jambi'ta tsain'bio israendeccu tsu qqe'faya. Tsa'ma cca'indeccuja tise've in'jamba ti'tsse'tssia've dapa tsu avuja'faya. Aindeccu tisema afase'fasi ³⁵ qui dansan'choi'ccu que injama'choma quiccu'fa'ma'caen injama'cho tsosipie ñombi'yeya. Nane tsain'bio a'i tsu tise'pa injama'cho tsosipie in'jan'choma tsa'caen poi'yi'ccongca canjaen'faya.

³⁶⁻³⁷ Toya'caen Chiga Aya'fama afa'su pushesuja Chiga ettini can'jen. Aser aindeccu'su Fanuel onque'nge tsu. Tise iniseja Ana. Tiseja ñoa'me ccashe, ochenta y cuatro canqqe'fave tsu an'bian. Tseyi coemba tsa'ndupa siete canqqe'fave can'jensi tise tsa'nduja pa. Tsa'caen pan'jaemba ja'ñojan Chiga ettini can'jen. Ni sombombi. Tsa'ma a'ta, cose'qqe tseni can'jemba Chigama iñajan'jen. Maqui a'taja ambe'yi Chigama iñaján canse. ³⁸ Simeón toya José, Maríai'ccu condase'je'ni Ana'qqe jipa cachui. Cachuipa du'shuma atepa Chigama ñotsse afapa du'shu Jesúsne Jerusalensundeccunga condaseye ashaen. Condasesi majan Chiga ccushaeña'chove ronda'je'chondeccuja ñotsse paña'fa.

Toequi Nasaretni ja'cho

³⁹ Tsonsi pa'ccoma Na'su Chiga manda'cho mandacquia'caen tsomba María, José, du'shui'ccu toequi Galileani ja'fa. Tise'pa Nasaret canqqueni japa can'jen'fa. ⁴⁰ Du'shu Jesús coenjimba

quinsetssia've da. Chiga tisema ñotsse in'jansi osha'choma atesupa in'jan.

Jesús chuite Chiga ettini ja'cho

⁴¹ Jesús chan, tisema coeña'su yaya'qqe poi canqqe'fa Jerusaléni jaye atesu'fa Chiga panshaen'cho injienge'cho fiestama panshaeñe.

⁴² Jesús doce canqqe'fave napiansi ccase tise'pa in'janqquia'caen fiestani jayipa Jesúsma'qqe anga'fa. ⁴³ Fiestama panshaemba toequi

Galileani jayi'fasi Jesúsja toe Jerusaléni shanda. Tsa'caen shandasi tise chan, tise yaya'qqe atesumbe'yi tsu jaja'fa. ⁴⁴ Jesúsja tayo tise

amigondeccui'ccu ja qqen in'jamba jaja'fa. Tsa'caen in'jamba fae a'ta já cosepa tise've ttatta'fa. Antiandeccu, amigondeccuni japa ttatta'ma attembi. ⁴⁵ Attembipa toequi Jerusaléni ttattaye ja'fa.

⁴⁶ Tsa'caen toequi japa tres a'ta tta'ttá jacamba tisema atte Chiga ettini Chiga manda'choma atesiansundeccui'ccu condasé dyai'choma. Nane atesiansundeccu su'choma pañamba osha'chove iñajampaña'jen. ⁴⁷ Jesúsja osha'choma in'jamba tsa'caen condasesi poi'ccu majan tisema pañasundeccu can'boen'fa. ⁴⁸ Tsa'caen tson'jen'ni

Jesús chan, tise yaya'qqe tisema atepa can'boen ccutsupa Jesús chanjan su:

—Jaricho, ¿jongoesie qui ingima a'tu maña? Tsa'caen que a'tu mañasi ingija ñoa'me ñombi'yepa tta'ttá vana'jen'fa.

⁴⁹ Tsa'ma Jesús tise'pama su:

—¿Jongoesie qui ñame ttatta'je'fa? ¿In'jan'fambi ti qui ñajan ña Quitsa tsaoni can'jemba semaña'cho?

⁵⁰ Tsa'ma tsa'caen susi tise su'choma ñotsse paña'ma in'jan'fambi.

⁵¹ Tsa'caen supa Jesúsja tise'pai'ccu Nasaretni ja. Tseni japa tise'pama ñotsse pañamba canse. Toya'caen Jesús chanjan osha'choma in'jamba tisu injama'choni asi'taén can'jen. ⁵² Jesúsja ti'tsse coemba osha'choma atesu. Poi a'i tisema ñotsse in'jan'fa. Chiga Quitsa'qqe tisema ñotsse in'jan.

3

Feti'su Juan a'i menia candusian'cho (Mt 3.1-12; Mr 1.1-8; Jn 1.19-28)

¹ Poi ande'suma joccapitssia na'su, Tiberio César, quince canqque'fave tayo mandasi Poncio Pilato, Judea ande'su governororve can'jemba manda. Toya'caen Herodesja Galilea ande na'su tsu. Tise quinshin, Felipe tsu Iturea ande na'su. Traconite andema'qqe manda. Lisanciasja Abilinia ande na'su. ² Chigama afa'su nasundeccuja Anas, toya'caen Caifás'qqe. Tsendeccu tsu Chiga ettini manda'fa. Poiyi'cco tsendeccu tsa'caen manda'fasi Zacarías dutssi'ye Juan a'i menia ro'ndá can'jen'ni Chigaja Tisu Aya'fai'ccu tisema in'jaen. ³ Tsa'caen in'jaensi pa'cco Jordán na'en utufa'ye candusiancan, a'i cuintsu tisu egae tsincon'choma catipa fettiye'faye, Chiga tise shacama aqquepoeñe. ⁴ Tsa'caen tsomba tsu tayopi'su Chiga Aya'fa afa'su Isaías qqen tevaenqquia'caen tson:

A'i aya'fama qui paña'faya a'i menia'ñe qqen fundo'je'choma:

“Na'su jiya'chove ñoña'faja.

Tise tsaiquima tansianqquia'caen ñoña'faja.

⁵ Sinjun'ccumajan oviviya'cho.

Ccotta'ccomajan joqquitssiamba sefaccoa
andema fae'ngaeña'cho.

Tsaiqui cca'rutticcoa'ma tansiaña'cho.

Ande ccutticcoa'ma ovivipa fae'ngaeña'cho.

⁶ Nane tsa'caen tsu injama'choma ñoñaña'cho
poiye'cco a'i Chiga tise'pama
ccushaeña'choma in'jañe."

⁷ Tsain'bio a'i Juanga fetiyeye bo'fa. Tsa'caen
bo'fasi Juanjan tise'pama iyu'upa su:

—Ñoa'me qui iyo dushundeccquia'can'fa. ¿Majan
tsu que'imajan dyoña? Chiga iyicca'yepa
fi'ttiya'choma pañamba ¿fetiye'pa ccushaye'ta ti
qui in'jan'fa? ⁸ Injama'choni egae tsincon'choma
catiye qqen in'jamba tsu egae tsincombe'yi
canse'faya'cho. Aqquia injanga “Tayopi'su
Abraham ingi yayasi gi ccusha'faya” qqen
su'fajama tisupa injama'choma ñoquiañe.
Israendeccu'qqe cca'indeccuma bove ñotssimbi
tsu. Chigaja in'jan'da va patundundu'ye a'ive
tsoñe osha Abraham dushundeccuve dapa
cuintsu Tisema iñajan'faye. ⁹ Nane quini'cco ñotsse
nambisi a'ija tsama ttuttupa si'tsive oque'faya.
Tsa'caen tsu Chigaja ttuttupoeñe ovacco'choma
tsuiñaqquia'caen tayo ñoña que'i injama'choma
somboeñe.

¹⁰ Tsonsi a'i bo'fa'chondeccuja Juanma
iñajampaña'fa:

—Tsa'caenda ¿jongoesuve gi tson'faya?

¹¹ Juanjan tise'pama su:

—Tisupapora ñotsse tson'faja. Dos contome an'bian'da conto mechoa'nga fae'cco afeja. Aña'choma an'bian'da attufaen'faja.

¹² Gobierno impuestoma isusundeccu'qqe Juanga fetiyeye ji'fa. Juanma tsu ñajampaña'fa:

—Atesian'su, ¿jongoesuve gi ingija tson'faya?

¹³ Juan tise'pama su:

—Gobierno isuye manda'choma pan'sha'en isu'fajama.

¹⁴ Toya'caen sundarondeccu'qqe jipa ñajampaña'fa:

—¿Jongoesuve gi ingija tson'faya?

Juanjan su:

—A'ima afopoemba cca'na'fajama. Ni cca'indeccuma tssai'fajama ti'tsse corifin'dima itsaye. Tsa'ma que'i na'su afepoen'choi'ccuyi opatsse canse'faja.

¹⁵ Poiyi'cco a'i Cristo jiya'chove ro'ndá canse'fa. Tsa'camba injama'choni “¿Juanda ti Cristo?” qquen in'jan'fa. ¹⁶ Tsa'ma Juanjan poiyi'cconga conda:

—Ñajan tsa'ccui'ccu gi que'ima feti'je. Tsa'ma ñama ti'tsse'tssia tsu jiya. Ñajan utu'cco. Nane shaca gi tise sapato uga'choma ccupa'suve ca'niñe. Tise jipa tsu Chiga Qquendya'pai'ccu que'ima fetiya. Tsambi'ta si'ngai'ccu fetiqquia'caen tsu injama'choma somboña. ¹⁷ Trigoma qqe'shopa fingiain'ccu ttonoma ufattovaenqquia'caen tiseja jiya fundui'sui'ccu giya'tsse funduipa ñotssia trigoma boñaqquia'caen tise a'ima ñoñañe. Tsa'ma trigo ttonoma oque catiqquia'caen tise've in'jambindeqquiaama tsangae catiya.

18 Tsa'caen candusiamba Juanjan Cristo jiya'chone ñotsse condase'choma a'inga conda. 19-20 Toya'caen Juanjan ande na'su Herodesma iyu'u. Herodesja osha'cho egave tsomba tise quinshimbe pushe, Herodíasma, itsapa fae'ngae can'jen. Tsa'caen egae tsinconsi Juanjan tisema iyu'u. Iyu'usi Herodesja ti'tsse egae tsincomba iyicca'yepa Juanma picco'je'cho ettinga ca'niamba picco.

Jesús Juanga fetiye'cho

(Mt 3.13-17; Mr 1.9-11)

21 Juanjan toya piccoyembi'te poiye'cco a'ima fetipa Jesúsma'qqe feti. Jesús fetiyepa Chigama ñajansi Chigaja sefaccoma fetta. 22 Fettasi Chiga Qquendya'pa ppuppuju'choa'caen attiamba Jesúsnga ande. Tsonsi sefaccone afa'choma paña'fa qqen su'choma:

—Que qui ña in'jan'cho Dutssi'ye. Ñoa'me gi quema ñotsse in'jan.

Jesúsne tayopi'su coenzandeccu

(Mt 1.1-17)

23 Jesúsja treinta canqqe'fave napiamba a'ima atesiañe ashaen. Tiseja José dutssi'ye qqen tsu poiye'cco a'i in'jan'fa.

Joséja Elí dutssi'ye tsu.

24 Elí Matat dutssi'ye.

Matatja Leví dutssi'ye.

Levíja Melqui dutssi'ye.

Tsaja Jana dutssi'ye.

Tsaja José dutssi'ye.

25 Tsaja Matatías dutssi'ye.

Tsaja Amós dutssi'ye.

Tsaja Nahúm dutssi'ye.
Tsaja Esli dutssi'ye.
Tsaja Nagai dutssi'ye.
²⁶ Tsaja Maat dutssi'ye.
Tsaja Matatías dutssi'ye.
Tsaja Semei dutssi'ye.
Tsaja Josec dutssi'ye.
Tsaja Judá dutssi'ye.
²⁷ Tsaja Joanán dutssi'ye.
Tsaja Resa dutssi'ye.
Tsaja Zorobabel dutssi'ye.
Tsaja Salatiel dutssi'ye.
Tsaja Neri dutssi'ye.
²⁸ Tsaja Melqui dutssi'ye.
Tsaja Adi dutssi'ye.
Tsaja Cosam dutssi'ye.
Tsaja Elmadam dutssi'ye.
Tsaja Er dutssi'ye.
²⁹ Tsaja Jesús dutssi'ye.
Tsaja Eliezer dutssi'ye.
Tsaja Jorim dutssi'ye.
Tsaja Matat dutssi'ye.
³⁰ Tsaja Leví dutssi'ye.
Tsaja Simeón dutssi'ye.
Tsaja Judá dutssi'ye.
Tsaja José dutssi'ye.
Tsaja Jonam dutssi'ye.
Tsaja Eliaquim dutssi'ye.
³¹ Tsaja Melea dutssi'ye.
Tsaja Mena dutssi'ye.
Tsaja Matata dutssi'ye.
Tsaja Natán dutssi'ye.
³² Tsaja David dutssi'ye.

Tsaja Isaí dutssi'ye.
Tsaja Obed dutssi'ye.
Tsaja Booz dutssi'ye.
Tsaja Sala dutssi'ye.
Tsaja Naasón dutssi'ye.
³³ Tsaja Aminadab dutssi'ye.
Tsaja Admin dutssi'ye.
Tsaja Arni dutssi'ye.
Tsaja Esrom dutssi'ye.
Tsaja Fares dutssi'ye.
Tsaja Judá dutssi'ye.
³⁴ Tsaja Jacob dutssi'ye.
Tsaja Isaac dutssi'ye.
Tsaja Abraham dutssi'ye.
Tsaja Taré dutssi'ye.
Tsaja Nacor dutssi'ye.
³⁵ Tsaja Serug dutssi'ye.
Tsaja Ragau dutssi'ye.
Tsaja Peleg dutssi'ye.
Tsaja Heber dutssi'ye.
Tsaja Sala dutssi'ye.
³⁶ Tsaja Cainán dutssi'ye.
Tsaja Arfaxad dutssi'ye.
Tsaja Sem dutssi'ye.
Tsaja Noé dutssi'ye.
Tsaja Lamec dutssi'ye.
³⁷ Tsaja Matusalén dutssi'ye.
Tsaja Enoc dutssi'ye.
Tsaja Jared dutssi'ye.
Tsaja Mahalaleel dutssi'ye.
Tsaja Cainán dutssi'ye.
³⁸ Tsaja Enós dutssi'ye.
Tsaja Set dutssi'ye.

Tsaja Adán dutssi'ye.
Adánjan Chiga dutssi'ye.

4

Jesúsma qqueña qquen tson'cho
(Mt 4.1-11; Mr 1.12-13)

¹ Tsomba tse'i Chiga Qquendya'pa Jesúsnga ca'nimba in'jaen cuintsu a'i menia japa ² cuarenta a'ta can'jeñe. Tseni can'jensi cocoya na'su Satana tisema qqueñacañe ji. Jesús ambe'yi can'jemba ñoa'me qquipoe'susi ³ Satanajan Jesúsma su:

—Queja ñoa'me Chiga Dutssi'ye'ta mandaja cuintsu va patu panme dasi añe.

⁴ Jesúsja tisema su:

—Chiga Tevaen'jenga qquen tsu tevaen: “A'ija aqquia panmeñi amba canse'faya'bi. Tsa'ma Chiga Aya'fa in'jaensi tsu canse'faya.”

⁵ Tsonsi Satanajan Jesúsma ccotta'cco se'fatssia tansin'choni angapa tse'faei'ccuyi pa'cco a'i can'jen'cho andema canjaemba ⁶ conda:

—Ñanga anttesi gi pa'cco va ande na'su. Ma-janga ña in'jan'da tsanga gi afeye osha. Tsa'camba pa'tssima quenga afesi qui ti'tsse'tssia na'suve dapa mandaya. ⁷ Que ñanga ccarupa iñajan'ninda tsu pa'cco vaja quembe.

⁸ Jesúsja pañamba su:

—Satana, biani jaja. Chiga Tevaen'jenga qquen tsu tevaen: “Na'su Chiga Quitsaveyi iñajaña'cho. Tise'veyi shondocaña'cho.”

⁹ Tsonsi Satana Jerusaléni Jesúsma angapa Chiga etti omba'su tsutopanga ccutsiamba su:

—Queja ñoa'me Chiga Dutssi'ye'ta vane butto amppija. ¹⁰ Nane Chiga Tevaen'jenga qqwen tsu tevaen:

Chigaja Tisema shondosundeccuma manda quema coiraye.

¹¹ Tise'pa tivei'ccu quema ñotsse angacaña que tsu'tte patunga desi zuccopanshan amp-pisa'ne.

¹² Tsa'ma Jesúsja tisema su:

—Chiga Tevaen'jenga qqwen tsu su: “Chigaja que Na'su tsu. Tisema qqeña qqwen tsonjama.”

¹³ Tsa'caen Satana Jesúsma qqeña qqwen tson'ma oshambipa japa ronda'je ja'i ccase qqeñacañe.

Galileani candusiañe ashaen'cho
(Mt 4.12-17; Mr 1.14-15)

¹⁴ Chiga Qquendya'pa tisema in'jaemba quiñaensi Jesús toequi Galileani shanda. Tseni jasi poi'cco pporotsse can'jensundeccu tisene pañamba condase'fa. ¹⁵ Nane Jesús tise'pa Chigane atesian'jen'ttinga atesian'jensi poi'cco a'i tisene ñoa'me ñotsse afa'fa.

Jesús Nasaret canqueni can'jen'cho
(Mt 13.53-58; Mr 6.1-6)

¹⁶ Tsonsi Jesús Nasaretni ja, tise chuite can'jemba coeni. Tise atesuqquia'caen Sabado a'ta Chigane atesian'jen'ttinga japa ca'ni. Ca'nimba Chiga Tevaen'jema cambia afaye ccutsusi ¹⁷ Chigama afa'su Isaías tevaen'jema tisenga afe. Isupa fettapa tta'ttapa atte qqwen tevaen'choma:

¹⁸ Chiga Qquendya'pa tsu ñama in'jaemba manda

va ñotsse condase'choma va'chandecunga candusiañe.

Ñama manda injama'choni ñombi'yesundeccuma ccushaëne.

Ñama manda indiye'chondeccunga tise'pama ccupaya'chone condaye.

Ñama manda cuintsu binindeccu atte'faye.

Ña gi noñangiañesundeccuma ccushaëña.

¹⁹ Na'su Chiga tsu a'ima in'jamba ja'ño fuite'je.

Tsane gi condaseye ji.

²⁰ Tsomba Jesúsja tevaen'jema findipa tevaen'jen na'sunga afepa dyai a'ima candusiañe. Dyaisi Chigane atesian'jen'ttini can'jensundeccu poiye'cco tisema can'boen'fa. ²¹ Can'boen'fasi Jesúsja qqen su:

—Ja'ño a'ta tsu va que'i paña'jen'cho Chiga Tevaen'jen su'choja tayo napi. Ñane tsu condase.

²² Jesús ñotsse afa'je'choma poiye'cco pañasundeccu tisene ñotsse afa'fa. Tsa'caen ñotsse afapa can'boemba su'fa:

—¿Vaja José dutssi'yembi ti?

²³ Tsonsi Jesúsja tise'pama su:

—Ñoa'me gi in'jan que'ija asi'ttaemba qui tayopi'su condase'cho suqquia'caen ñama qqen su'faya: “Ccushaen'suta, tisuma o'tie ccushaenjan.” Toya'caen que'ija ña Capernaumni japa tson'choma pañamba in'jan'fa vani'qqe ña tsa'caen canjaëne.

²⁴ Toya'caen Jesúsja ti'tsse candusiamba su:

—Ñoa'me gi que'inga su, tisu andeni jisi tsu tisu aindeccu tsa Chiga Aya'fama afa'suma chi'ga'fa. ²⁵ Tansintssi tsu tayopi'su Elíasne

condase'cho. Tise can'jeinte tres canqque'fa pa'cco toya'caen faesu enttingeve unjin tuimbisi poi'yi'cco a'i qquipoe'su'fa. Tsain'bio tsandupajen'chondeccu israe andeni can'jemba qquipoe'su'fa. ²⁶ Tsa'ma Chigaja Elíasma manda cuintu fae tsandupajen'choveyi fuiteye. Tsaja israe ande joccani Sidón ande'su Sarepta canqqueni can'jen. ²⁷ Toya'caen Chigama afa'su Eliseo can'jeinte tsain'bio na congomba pajisundeccu israe andeni can'jen'fa. Tsa'ma Chigaja tsendeccuma ccushaembisi ccushambe canse'fa. Tsa'ma faesuma, Siria ande'su Naamámeñi tsu Chigaja ccushaen.

²⁸ Ya'caen susi pañamba Nasaretsundeccu iyicca'yepa ²⁹ Jesúsma indipa canqque'ye joqquitssian'fa. Tsa canqqueja ccotta'cconi jin. Tsa'cansi Jesúsma indipa utufani anga'fa tsene cofetta amppiamoensi cuintu paye. ³⁰ Tsa'ma Jesúsja tise'pa enttinge'ye panshamba ja.

Cocoya ca'ni'choma ccushaen'cho
(Mr 1.21-28)

³¹ Tsomba Jesúsja faesu Galilea'su canqqueni ja. Capernaum canqqueni japa can'jemba Sabado a'ta a'ima atesian'jen. ³² Ñoa'me na'sia'caen atesian'jensi poi'yi'cco a'i pañamba asi'ttaen'fa.

³³ Tse'tti Chigane atesian'jen'ttini tsu cocoya ca'ni'cho a'ija can'jen. Tiseja fundondo'e qqen afa:

³⁴ —Ingima noñangianjama Jesús Nasareno'su. ¿Ingima fi'ttiye ti qui ji? Quemanda gi atesu. Nane queja Chiga in'jan'cho qui.

³⁵ Tsa'ma Jesúsja tisema iyu'upa su:

—Ziyapa tsa a'i'ye somboja.

Tsonsi poi'yi'cco a'i camboen'jen'fa'ni cocoyaja a'ima pan'jaensi andenga amppi. Tsa'caen amp-pisi a'ima iñacaembe'yi somboin ja. ³⁶ Somboin jasi a'i bo'fa'cho can'boemba condasecco'fa:

—¿Ma'caen tsu Jesúsja tsa'caen afaye osha? Na'sia'caen quia'me mandasi cocoyandeccu'qqe pañamba somboin ja'fa.

³⁷ Jesús tsa'caen tsonsi poi'yi'cco tsa ande'su a'ija Jesúsne pañamba condasecco'fa.

Simón chancashema ccushaen'cho

(Mt 8.14-15; Mr 1.29-31)

³⁸ Jesúsja Chigane atesian'jen'tti'ye sombopa Simón tsaoni ja. Simón chancasheja ajepa ccui. Si'ngia'ca'en ajepa ccuisi Jesúsnga conda'fa cuintsu ccushaëne. ³⁹ Jesús catsepa ajema iyu'usi ajeja chattian. Tse'faei'ccuyi pushesuja quinsetsse ccushapa jangipa poi'yi'ccoma cui'ña.

Jesús pajisundecuma ccushaen

(Mt 8.16-17; Mr 1.32-34)

⁴⁰ Tsa'caen tsonsi tayo chiga amppisi poi'yi'cco a'i tise'pani'su pajisundecuma i'fa. Osha'cho paqqe'sui'ccu paji'fa'choma isi Jesúsja tise tivei'ccu tise'pama pporaemba ccushaen. ⁴¹ Jesús mandasi cocoyandeccu'qqe tsain'bio a'i'ye sombombopa qqen fundo'fa:

—¡Queja Chiga Dutssi'ye qui!

Tsa'ma Jesúsja cocoyama iyu'upa afaye se'pi. Cocoyandeccu'qqe atesu'fa Jesúsja Chiga in'jan'cho Cristo tsu.

Jesús Galileani japa candusian

(Mr 1.35-39)

⁴² Cosepa a'tasi Jesúsja Pedro tsaone sombopa a'ienia ja. Aindeccuja tise've tta'ttapa attepa jaye se'pi'fa. ⁴³ Tsa'ma Jesúsja su:

—Ñanda gi faesu canqqueni jaya'cho tseni'qqe Chiga aindecuve daya'chone condaseye. Tsa ñotsse condase'choma condaseye gi va andeni ji.

⁴⁴ Tsa'caen supa Jesúsja cca'tti cca'tti jacamba Galilea ande'su Chigane atesian'jen'ttinga japa candusian'jen.

5

Avuma indisi canjaen'cho (Mt 4.18-22; Mr 1.16-20)

¹ Fae a'ta Jesúsja Genesaret mar otafari ccut-supu candusian'jen. Tisema pañañe in'jamba aindecuja panshaen catse'fa. ² Tse'tti avuma vachosundeccu'qqe dos rande shavoma tandan dusiamba tise'pa vacho'vama cashi'je'fa. Aindecuja panshaen catse'fasi Jesúsja tsa shavoma atepa ³ otse. Otsepa Jesúsja shavo na'su Simónma afa cuintu otafane re'riccoe cataemba duseye. Tsonsi shavocunga dyaipa a'ima atesian'jen. ⁴ Atesian nanimba Jesúsja Simónma su:

—Mar ti'tsse tso'sinia angapa que vacho'vama ttupa itoyian'faja avuma indiyee.

⁵ Simónjan su:

—Na'su, pa'cco cose va'chó jaca'ma gi avuma indimbipa quimbi'fa. Tsa'ma que su'ninda gi ña vacho'vama ttuya.

⁶ Tsa'caen supa ttusi tsain'bio avu indiyesi vacho'vaja chittaji. ⁷ Chittajisi tise'pai'ccu fae'ngae vachosundeccu faesu shavo'ni pporotsse

duse'fasi fingi ttu'se'fa cuintsu fuite'faye. Jipa poiye'cco shavonga avuma on'boen'fa. Tí'tssecan'da tsu poiye'cco shavo andeccoye'can. ⁸ Simón Pedroja avuma indi'choma attepa dyopa Jesúsnga tsutta'choi'ccu ccaru dyaipa su:

—Na'su, ña'ñe joqquitssija. Ñanda gi egae tsin-con'su.

⁹ Nane Simón, poiye'cco tisei'ccu can'jensundeccu'qqe avuma indi'choma attepa can'boen'fa. ¹⁰ Tisei'ccu fae'ngae vachosundeccu Juan, Santiago'qqe dyopa can'boen'fa. Tsendeccuja Zebedeo dutssiyendeccu. Tsonsi Jesúsja Simónma su:

—Dyojama. Ja'ñoñi qui queja avuma ttuqquia'caen a'ima ttu'seya.

¹¹ Tsonsi tise'pa shavoma ccattufaemba pa'tssima catipa Jesúsí'ccu jaja'fa.

Na congomba paji'suma ccushaen

(Mt 8.1-4; Mr 1.40-45)

¹² Jesús fae canqqueni can'jen'ni na congomba paji'su tisenga ji. Nane pa'cco ai'vo tsa'caen dapa Jesúsma attepa andenga puntssan ccuipa ñajan:

—Na'su, que in'jan'da qui ñama giya'tsse ccushaëñe osha.

¹³ Tsa'caen susi Jesús tisu tivei'ccu yasapa paji'suma pporaemba su:

—In'jan gi ñajan. Giya'tsse qui ccusha.

Tse'faei'ccuyi giya'tsse ccushasi ¹⁴ Jesús tisema manda:

—Cca'indeccunga condajama. Tsa'ma japa Chigama afa'sunga tisuma canjaenjan. Moisés mandaqquia'caen ccusha'chone afeya'choma

afeja cuintsu poiya'cco a'i que ccusha'choma tsa'caen atesu'faye.

¹⁵ Tsa'ma Jesús tson'chone ti'tsse condasecco'fasi tsain'bio a'i bo'fa tisema pañañe. Pajisundeccu'qqe bo'fa cuintsu tise'pa paji'choma ccusha'ña. ¹⁶ Tsa'ma tsa'caen bo'fa'nijan Jesúsja a'i menia japa Chigama ñañajan'jen.

Jesús ishopa paji'suma ccushaen'cho

(Mt 9.1-8; Mr 2.1-12)

¹⁷ Fae a'ta Jesús a'ima atesian'jen'ni fariseo in'jan'chondeccu Chiga manda'choma atesiansundeccu'qqe tisenga bo'fa. Nane poi Galilea ande'su canquene, Judea ande'su canquene'qqe tsu ji'fa. Jerusaléne'qqe jipa bopa paña'fa. Tsonsi Na'su Chiga Jesúsma quiñaensi a'ima ccushaen. ¹⁸ Tsa'caen a'ima ccushashaen'jen'ni cca'ija ishopa paji'suma Jesúsnga i'fa. Paji'suma tise ana'jen'chonga opi ipa tta'tta'fa ma'caen ca'nimba Jesús tsutteccofanga paji'suma ccuiñañe. ¹⁹ Tsa'ma tsain'bio a'i bo'fasi ca'niañe oshambipa tsao'cco omba'su ppappacconganga ansunde'fa. Tsa'o'su patufin'dima shichhapa paji'suma andian'fa tise ana'jen'choi'ccu. A'i enttingenga Jesús tsutteccofanga andiansi ²⁰ Jesúsja tise'pa Chigave in'jan'choma in'jamba paji'suma su:

—Tsandie, tayo tsu que egae tsincon'cho jo-qqitssi.

²¹ Tsa'caen susi Chiga manda'choma atesiansundeccu, fariseondeccu'qqe tisupapora ñañajampañacco'fa:

—¿Jongoesu qqwen tsu va a'ija in'jan? Chigayi tsu egae tsincon'choma joqquitssian'su. ¿Tiseja Chiga qqwen ti in'jan?

²² Jesúsja tise'pa iñajampañacco'fa'choma in'jamba su:

—¿Jongoesie qui injama'choni qqwen asi'ttaemba iñajampañacco'fa? ²³ Tayo gi su: “Que egae tsincon'cho tayo joqquitssi.” ¿Bove aiye'pambi ti qqwen suye “Jangipa tsui jaja.”? ²⁴ Tsa'ma Na'su Chigaja antte Sefaccone Ji'cho A'i va ande'su a'i egae tsincon'choma joqquitssiañe. Ñajan Sefaccone jipa tsa'caen oshapa gi que'inga canjaeña.

Tsomba Jesús ishopa paji'suma su:

—Quema gi manda: Jangipa que ana'jen'choma isupa tisu tsaoni tsui jaja.

²⁵ Tse'faei'ccuyi tiseja jangi. Poiyi'cco camboen'jen'ni tise ana'jen'choma onccamba Chigama ñotsse afapa tisu tsaoni ja. ²⁶ Tsa'caen ccushapa jasi poiyi'cco a'i attepa can'boen ccutsupa Chigama ñotsse afa'fa. Toya'caen dyopa su'fa:

—Ñoa'me ccaningae tson'choma gi ja'ño atte'fa.

Jesús Levíma ttu'se'cho

(Mt 9.9-13; Mr 2.13-17)

²⁷ Tsonsi Jesúsja sombopa Levíma atte. Tiseja gobierno impuestoma isu'su tsu. Leví impuestoma isu'je'ttini dyaisi Jesús tise ma ttu'se:

—Ñai'ccu jija.

²⁸ Tsonsi Leví jangipa pa'ccoma catipa Jesúsí'ccu ja.

²⁹ Tsomba Leví Jesúsnga pipa poiyi'cco a'ima ttu'se tise tsaoni añe. Tsain'bio gobierno

impuestoma isusundeccu'qqe an'jen'cho mesa jin'tti piyive ccuipa an'jen'fa. Cca'indeccu'qqe ccuipa an'jen'fa. ³⁰ Majan fariseondeccu, toya'caen tsendeqquia'caen in'jamba Chiga manda'choma atesiansundeccu'qqe can'jemba camboen'jen'fa. Jesúsma shondosundeccoma atepa iyu'uye ashaen'fa qqquen iñajampañamba:

—¿Jongoesie qui que'ija va impuestoma isusun-deccui'ccu an'jen'fa? Tsendeccuja egae tsincon-sundeccu tsu.

³¹⁻³² Tsama pañamba Jesúsja su:

—Pajimbi'choa ccushaen'suma in'jambiqquia'caen ñajan jimbi gi tayo ño'a qqquen in'jan'chondeccoma ccushaëne. Tsa'ma ccushaen'su paji'suma ccushaëne jiqquia'caen gi egae tsincon-sundeccoma ccushaëne ji cuintsu tise'pa egae tsincon'choma antte'faye.

Ambe'yi asettu'chone atesian'cho
(Mt 9.14-17; Mr 2.18-22)

³³ Toya'caen tise ma iñajampaña'fa:

—Juanma shondosundeccoma asettupa zutsse ambe'yi Chigama iñajan'fa. Fariseoma shondosundeccu'qqe tsa'caen atesu'fa. Tsa'ma quema shondosundeccoma asettumbe'yi injanga amba cu'i'fa.

³⁴ Tsonsi Jesúsja tise'pama su:

—Tsandie pusheye tson'jemba a'ima ttu'sesi bojin sheque'ta fae'ngae tsandiei'ccu avujatsse amba cui'je'fa. Ña gi tsa tsandieca'on ja'ño can'jen. ³⁵ Tsa'ma maqui a'ta cca'indeccu tsandie ma joqquitssiansi tsu tisupanaccu asettupa ambe'yi can'jen'faya.

³⁶ Tsa'caen supa Jesúsja faesu condase'choma condase:

—A'ija cuna ondiccu'jema chittaya'bi tssoruma pi'piye. Tsa'caen tson'da cunama'qqe tsu dañña. Toya'caen ma'ppa'ninda tsa pi'pi'cho zupa tssoru ondiccu'jema ti'tsse chittaya.

³⁷ Toya'caen tsu a'ija vinoma cupoemba tssoru ttono botiyanga fiñañambi. Vinojan omppantssimba ttonoma chittaemba tsu catiyeya. Toya'caen ttono'qqe tsu tsangae dañongeya. ³⁸ Tsa'ma cuna vinomanda tsu cuna ttono botiyanga fiñaña'cho. Tsa'caen fiñasi vino, ttono'qqe dañongembe'yi ccutsuya.

³⁹ Tsa'caen tsu a'ija ñotssia tayoyi ccutsu'cho vinoma cu'ipa cuna ansintssia vinoma in'jambi. Tsa'ma “Tayoyi ccutsu'cho tsu bove ñotssi” qqen tsu suya.

6

Sema'ma'qquia a'tane condase'cho

(Mt 12.1-8; Mr 2.23-28)

¹ Jesús sema'ma'qquia a'ta nasipa'ye jacansi tisema shondosundeccu'qqe jacamba trigoma sintti isupa shuju qqe'shopa an'fa. ² Tsama atepa majan fariseondeccuja su'fa:

—¿Micomba qui sema'ma'qquia a'ta qqen sema'jen'fa? Chiga manda'chota tsu se'pi sema'ma'qquia a'ta tsa'caen semañe.

³ Tsama pañamba Jesúsja su:

—¿Paña'fambi ti qui tayopi'su David tson'choma? Tiseja tisei'ccu jacansundeccu'qqe qqipo'e'su'fa.

⁴ Tsomba Davidja Chiga ettinga ca'nimba Chiganga afe'cho panma

isupa an. Tisei'ccu jacansundeccunga'qqe afesi tise'pa'qqe an'fa. Tsa panjan Chigama afasundeccuyi an'faya'cho. Chiga manda'choja se'pi faesu añe. Tsa'ma David tsa'caen tsonsi Chigaja se'pimbi.

⁵ Toya'caen Jesúsja su:

—Ña, Sefaccone Ji'cho A'i gi sema'ma'qquia a'tane na'su.

Tive samba dañonge'cho
(Mt 12.9-14; Mr 3.1-6)

⁶ Faesu sema'ma'qquia a'ta Jesúsja Chigane atesian'jen'ttinga ca'nimba atesian'jen. Tse'tti tsu fae tsandie tansinfa'su tive samba dañonge'cho can'jen. ⁷ Fariseondeccu, Chiga Aya'fama atesiansundeccu'qqe Jesúsma camboen'jen'fa. Nane sema'ma'qquia a'ta Jesús se'je ccushaen'ninda, tiseja egae tsincon'su qqen suye ronda'je'fa. ⁸ Tsa'ma Jesúsja tise'pa in'jan'choma in'jamba tive dañonge'choma su:

—Jipa va'ttinga ccutsuja.

Qquen susi tiseja jangipa Jesúsja'ccu ccutsu.

⁹ Tsonsi Jesús poiya'ccoma ñajampaña:

—Chiga manda'cho sema'ma'qquia a'ta egae tsoñe se'pi'ta ¿ñotsse tsoñe'qqe ti se'pi? Fi'ttiye se'pi'ta ¿ccushaen'qqe ti se'pi?

¹⁰ Qquen supa piyicamba poiya'ccoma can'boemba paji'suma su:

—Que tivema yasaja.

Tsandie tsa'caen yasasi tise tiveja giya'tsse ccusha. ¹¹ Tsa'ma tsa'caen tsonsi fariseondeccu, Chiga Aya'fama atesiansundeccu'qqe ñoa'me

iyicca'yepa condasecco'fa ma'caen Jesúsma patsuya'chove.

Doce shondosundecuma ttu'se'cho
(Mt 10.1-4; Mr 3.13-19)

¹² Faesu a'ta Jesús ccotta'cconi japa ansunde Chigama iñajañe. Pa'cco cose Chigama iñaján can'jen. ¹³ A'tasi tisema shondosundecuma ttu'sepa docema tisene afasundecuve inisian.

¹⁴ Tsendecuja: Simón (Jesús tisema afa, Pedro); tsambe quishin Andrés; Santiago; Juan; Felipe; Bartolomé; ¹⁵ Mateo; Tomás; Santiago (tsaja Alfeo dutssi'ye); Simón (Zelote qqen su'cho); ¹⁶ Judas (Santiago antian); Judas Iscariote (Jesúsma jai'ngae chi'gapa afeya'cho).

Jesús aindecuma atesian'jen'cho
(Mr 4.23-25)

¹⁷ Tsomba Jesús tisema shondosundecui'ccu ccotta'cco'ye andepa fae'ngatssia andeni ccutsu'fa. Tsain'bio a'i Judea andene, Jerusaléne'qqe jipa tseni bo'fa. Toya'caen mar ofafani'su Tiro canqqe, Sidón canqqene'qqe ji'fa Jesúsma pañañe. Tise'pa paji'choma ccushaye in'jamba tsu ji'fa. ¹⁸ Jesúsja cocoyanga noñangiañesundecuma'qqe ccushaen. ¹⁹ Poiyi'cco a'i tsu Jesúsma pporaeñe in'jan'fa. Nane pporaen'da tse'faei'ccuyi tsu ccusha'fa.

Majan tsu avujatssi'fa
(Mt 5.1-12)

²⁰ Tsomba Jesús tisema shondosundecuma cambia su:

—Que'i mechondeqquiaja ñoa'me qui avujatssi'fa. Nane Chiga aindecu qui.

21 Que'i qquipoe'sundeccu ñoa'me qui avujatssi'fa. Que'i qui tteppu'faya.

Que'i inasundeccu ñoa'me qui avujatssi'fa. Que'i qui feña'faya.

22 Ñajan Sefaccone Ji'cho A'i. Que'i ñame in'jansi cca'indeccu que'i inisema dañõe afa'ni'qqe ñoa'me qui avujatssi'fa. Aindeccu ñane que'ima chi'ga'fa'ni'qqe qui avujatssi'fa. Ñane que'ima se'pipa afase'fa'ni'qqe qui avujatssi'fa. 23 Nane tayopisundeccu'qqe tise'pa can'jeinte'su Chiga Aya'fama afasundeccuma tsa'caen egae tson'fa. Maqui a'ta tsa'caen que'ima afase'nijan ti'tsse avujatssi'faja. Nane Chiga sefacconi qui osha'cho ñotssiana injantsse an'bian'fa.

24 Tsa'ma vana'faya qui que'i osha'choma an'biansundeccu. Que'imbe ñotssiana qui tayo an'bia'an.

25 Vana'faya qui que'i amba tteppu'chondeccu. Qquipoe'su'faya qui.

Vana'faya qui que'i ja'ño feñasundeccu. Ñombi'yepa qui i'na'faya.

26 Vana'faya qui poi'cco a'inga ñotsse afayesundeccu. Nane tayopi'su Chiga Aya'fama afa'su qqen afopoensundeccu afopoensi tise'pa can'jeinte'su aindeccu tise'pama tsa'caen ñotsse afa'fa.

Chi'ga'choma ñotsse in'jaña'cho

(Mt 5.38-48; 7.12)

27 Tsa'ma que'i ñama pañasundeccunga gi conda: Que'ima egae tsinconsundeccuma ñotsse in'jan'faja. Que'ima chi'gasundeccuma ñotsse tson'faja. 28 Que'ima afasesundeccuma ñotsse

afa'faja. Que'ima dañosundecune Chigama
 ñajan'faja cuintsu tise'pama ñotsse tsoñe.
²⁹ Majan a'i faefa'su tsovejuma tssai'ninda
 ccafa'su tsovejuma'qqe canjaen'faja. Majan
 a'i que oppoen'cho sarupama itsa'ninda que
 ondiccu'jema'qqe se'pimbe'yi afe'faja. ³⁰ Majan
 a'i osha'chove quema ñajan'ninda se'pimbe'yi
 afe'faja. Majan a'i que an'bian'choma itsa'ninda
 toequi afeye ñajan'fajama. ³¹ Ma'caen cca'i que'ima
 tsoñe in'jan'da tsa'caen tise'panga'qqe tson'faja.

³² ¿Tisuma in'jan'chondeccuve'yi ñotsse
 in'jan'da ti qui ñotsse tson'fa? Nane egae
 tsinconsundeccu'qqe tsa'caen tisupapora ñotsse
 injancco'fa. ³³ ¿Tisuma ñotsse tson'fa? Nane egae
 tsinconsundeccu'qqe tsa'caen tson'fa. ³⁴ ¿Jai'ngae
 ccase isuye corifin'dima cca'indeccunga
 afe'ta ti qui ñotsse tson'fa? Nane egae
 tsinconsundeccu'qqe tsa'caen tisupaporanga
 afeye atesu'fa jai'ngae ccase isuye. ³⁵ Tsa'ma
 que'ija tisuma egae tson'fajama ñotsse
 in'jan'faja. Tsendecuma ñotsse tson'faja.
 Corifin'dima afe'ta ccase isuye in'jambe can'faja.
 Tsa'caen tson'da qui Ti'tsse'tssia Chiga que'ima
 in'jansi Tise dushundeccuve dapa ti'tsse ñotsse
 osha'chove isu'faya. Chiga Quitsaja Tisema
 chi'gasundecuma in'jamba mende'ye. Egae
 tsinconsundecuma'qqe in'jamba mende'ye.
³⁶ Chiga que'i Quitsa mendeyeqquia'caen
 que'i'qqe cca'indeccuma mende'ye'faja.

Egae tsincon'choma ttatta'fajama
(Mt 7.1-5)

37 Cca'i egae tsincon'choma ttatta'fambian'da Chiga'qqe que'i egae tsincon'choma tta'ttaya'bi. Ni cca'imbe egae tsincon'cho shacane qquen afambian'da Chiga'qqe que'i egae tsincon'cho shacane afaya'bi. Cca'indeccu que'ima egae tsincon'ninda tise'pama in'jamba tise'pa egae tsincon'choma aqqepoen'faja. Tsa'caen aqqepoe'ninda Chiga'qqe que'ima in'jamba que'i egae tsincon'choma aqqepoeña.

38 Cca'indeccunga tsu afe'faya'cho. Tsa'caen tso'ninda tsu Chiga'qqe que'inga afeya. Agatto'cho tasanga on'boemba pisa'ñacca tssai oyae'ñacca on'batsse on'boenqquiaen tsu Chigaja que'inga afeya. Nane que'i cca'indeccunga afeye agattoqquia'caen tsu Chiga'qqe agattopa que'inga afeya.

39 Tsomba Jesús va condase'choma conda:

—¿Bininda ti osha faesu binima angacañe? Me'i, fae'ngae tsu ande changonga amppi'faya.

40 Shondo'suja tisema atesian'suma ti'tsse'tssimbi tsu. Tsa'ma poi shondo'su osha'choma paña'da ñoa'me tise atesian'sia'caen tsu da'faya.

41 ¿Mingapa qui faenga'su tso'fe ccappi'choma atteqquia'caen tise egae tsincon'choma atte'fa? Tsa'ma tisu tso'feni quini'cco eje'choma qui atesu'fambi. 42 Toya'caen qui su'fa: “Faenga'su, ñajan que tso'fe ccappi'choma somboeña.” Tsa'ma tisu tso'feni quini'cco eje'choma atesumbiqquia'caen qui que'i egae tsincon'choma atesu'fambi. Queja ño'a qquen attiamba ñoa'me afopoen'su qui. O'tie tsu que tso'feni quini'cco eje'choma somboemba ñotsse ateya'cho. Tsomba

qui faenga'suma fuitepa tise tso'fe ccappi'choma somboeñe osha.

Teta'choma attepa quini'ccoma in'jan
(Mt 7.17-20; 12.34-35)

⁴³ Ega teta'choja ñotssia quini'jinga nambi. Ni ñotssia teta'cho'qqe ega quini'jinga nambi.

⁴⁴ Nane tise teta'choma attepa gi quini'jima atesu'fa. Higuera pi'sho'fambi gi nojansifanga japa. Ni tsajama gi pi'sho'fambi ancco'singa japa. ⁴⁵ Toya'caen ño'a a'ija tise injama'cho'su ñotsse in'jan'chone ñotssiam tsu canjaen. Tsa'ma ega a'ija tise injama'cho'su egae jincho'chone egama tsu canjaen. Nane tisu injama'cho jinchoqquia'caen tsu a'ija afa.

Dos tsaone condase'cho
(Mt 7.24-27)

⁴⁶ ¿Micomba qui ñama su'fa: “Na'su, Na'su,” ña manda'choma chig'ga'ta? ⁴⁷ Qquen tsu ñanga jipa ña su'choma ñoa'me pañamba canse'cho: ⁴⁸ Fae a'i tsu tsaoña'jamba tso'sitsse dya'dyapa fattoccong ta'etsse dyaiña. Tsonsi tsu na'en jipa zonzoe'ma osiañe oshambi tise tsa'oma. Ñotssiave tsao'ñasi ta'etssi tsu. ⁴⁹ Tsa'ma majan a'i ña manda'choma pañamba tson'sumbi'ta faesu tsao'ñasia'can tsu. Tsaja sisipandung tsao'ñasi na'en jipa tsa'onga zonzoeni junde osui. Osuipa tsa'oja tsangae ja.

7

Capitámbe sema'suma ccushaen'cho
(Mt 8.5-13)

1 Jesúsja aindecuma candusian nanimba Capernaum canqqueni japa ca'ni. 2 Tse'tti tsu romano sundaro capitán can'jen. Tise in'jan'cho sema'su pajipa paye tson'jen. 3 Tsa'cansi capitánjan Jesúsne pañamba israe'su nasundecuma manda moen Jesúsma afaye cuintu tise'be sema'suma ccushaéne. 4-5 Manda moensi Jesúsnga catsepa tsain'bitsse iñajan'fa qqen supa:

—Va a'ija ñoa'me ñotssia tsu. Ingi a'ima ñotsse in'jamba corifin'dima afe ingi Chigane atesian'jen'ttima tsao'ñañe. Ñotssi tsu que tise in'jan'choma tsoñe.

6 Tsonsi Jesús tsendecui'ccu japa capitán tsa'onga pan napiji'ni capitánjan tise amigondeccuma manda moen cuintu Jesúsma cachui'nga'faye. Tsendecuja jipa capitán qqen su'choma conda'fa:

—Na'su, ñotssimbi gi que ña tsaoni jiye. 7 Tsa'camba ñajan cambajunaccu cachuiccoye jambi quema iñajañe. Tsa'ma queja toe'tti ccutsupa mandaja cuintu ñambe sema'su ccushaye. 8 Ñajan sundaro a'i. Ña nasundecuja ñama manda'fa. Ña'qqe ñama bove'ccoasundarondecuma manda. Fae'ccoma “Jaja” qqen mandasi tiseja ja'je. Faesuma “Jija” qqen mandasi tiseja ji'je. Ña sema'suma “Qquen ñoñaja” qqen mandasi tsa'caen tiseja tson'jen.

9 Jesús tsama pañamba sundaro capitáne asi'ttaén ccutsu. Tsomba piyicamba tisei'ccu jacansundecuma su:

—Tsa a'ija ñoa'me tsu ñame in'jan. Ni fae is-rae'suyi'qqe qquenda ñame in'jan'fambi.

¹⁰ Tsa'caen susi mandasicondasundeccu toequi capitán tsaoni japa sema'su ccusha'choma atte'fa.

Du'shu pa'choma qquendyaen'cho

¹¹ Tsomba tse'i Jesúsja Naín canqqueni ja. Tisema shondosundeccu, tsain'bio a'i'qqe tisei'ccu fae'ngae jaja'fa. ¹² Canqqe sombo'ttinga catsepa a'i bo'fa'choma cachuicco'fa. A'i pasi canqqe'ye sombo'fa pa'choma angapa a'tuye. Pa'choja tsandupajen'cho du'shu fae'cco'fa. ¹³ Na'su Jesús tsandupajen'choma attepa mende'yepa su:

—I'nambe canjan.

¹⁴ Tsomba Jesús catsepa pa'choma ccuiña'cho asiccoma pporaensi angasundeccuja já ccutsu'fa. Tsonsi Jesúsja pa'choma su:

—Jaricho, ¡qquendyaja!

¹⁵ Qquen susi pa'choja jangi dyaipa afaye ashaen. Tsonsi Jesús tise ma fuite cuintu tise mamani jaye. ¹⁶ Poiyi'cco a'i tsama attepa ñoa'me dyo'fa. Tsa'ma Chigama ñotsse afapa su'fa:

—Joccapitssia Chiga Aya'fama afa'su tsu inginga attian.

Toya'caen tsu su'fa:

—Chigaja Tise aindecuma in'jamba fuiteye ji.

¹⁷ Tsama condasesi poiyi'cco Judea andeni'su a'i'qqe paña'fa. Poiyi'cco pporotsse can'jensundeccu'qqe tsa'caen Jesúsne paña'fa.

*Feti'su Juan ñajampañasundeccu
(Mt 11.2-19)*

18 Juan toya picco'je'cho ettini piccoyepa can'jen'ni tisema shondosundeccu Jesús tson'choma tisenga condase'fa. 19-20 Condasesi pañamba Juanjan tsendeccu'suma dosve ttu'sepa Na'su Jesúsni maña. Tsendeccu jipa Jesúsma su'fa:

—Feti'su Juan tsu ingima mandamaña quema qqquen ñajampañañe: “¿Que ti qui Cristo, jiya'cho qqquen su'choja? Tsambi'ta ¿faesuve ti gi ronda'je'faya?”

21 Tsendeccu caña'jen'ni Jesúsja tsain'bio pajisundeccuma ccushaen'jen. Nane osha'cho paqqe'sui'ccu pajisundeccuma ccushaen. Cocoyama joqquitssiamba binindeccuma'qqe bittaen. 22 Tsa'caen ccushaen'jemba Juanma shondosundeccuma su:

—Japa que'i attepa paña'choma Juanga conda'faja. Binindeccu tsu bitta'fa. Ccutsumbindeccu tsu tsui jacan'fa. Na congomba pajisundeccu tsu giya'tsse ccushapa ja'fa. Tsosinambindeccu tsu paña'fa. Nane panjin ccui'chondeccu tsu ccase qqquendya'fa. Va'chandeccu'qqe tsu Chiga a'ima ccushaëña'chone ñotsse condase'choma paña'fa.

23 Majan ñame in'jamba ansangembi'ta ñoa'me tsu avujatssi'faya.

24 Juan mandasi ñajampañasundeccu jasi Jesúsja aindeccunga Juane qqquen condase:

—Que'ija a'i menia ja'ta ¿jongoesuma atteye qui ja'fa? ¿Fingian canttini'ccoma oyaen'jen'choma cañe ti qui ja'fa? 25 Tsambi'ta ¿jongoesuma atteye qui ja'fa? ¿A'i ñotssia sarupama ondiccucho'choma cañe ti qui ja'fa? Me'i, ñotssiam a ondiccucho'chondeccuja na'su tsaoni can'jemba

tsa'caen ñotsse canse'fa. ²⁶ Tsa'ma ¿jongoesuma atteye qui ja'fa? ¿Chiga Aya'fama afa'suma atteye ti qui ja'fa? Ju, tsane qui japa atte'fa. Nane Juanjan Chiga Aya'fa afa'suma ti'tsse'tssia tsu. ²⁷ Tisene tsu Chiga Aya'faja su:

Que canjan. Quema o'tie gi ñane afa'suma manda moeña.

Tise tsu o'tie japa que ji'je'choma ñoñañe.

²⁸ Va andeni faesu a'i Feti'su Juanma ti'tsse'tssia've me'i'on tsu. Tsa'ma Chiga aindeccuve da'fasi ñoa'me utu'cco tsu Juanma ti'tsse'tssiya.

²⁹ Jesúsma pañamba poiya'cco a'i, nane gobierno impuestoma isusundeccu'qque, “Chigaja ño'a” qqwen tsu su'fa. Tsendeccuja tayoe Juanga fetiyepa can'jen'fa. ³⁰ Tsa'ma fariseondeccu, Chiga manda'choma atesu'chondeccu'qque Juanga fetiyembipa Chiga tsa'caen tise'pama ccushaeña'choma chi'ga'fa. ³¹ Tsonsi Na'su Jesúsja su:

—¿Jongoesui'ccu gi ja'ño'su aindeccui'ccu fae'ngae canjaeña cuintsu que'i ñotsse in'jan'faye? ¿Jongoesia'caen tsu tson'fa? ³² Ñoa'me dushundeccu chavaen'jen'tti'su atandunduni dyaipa fae'ngae co'fe'fambiqquia'caen tsu ja'ño'su aindeccuja fae'ngae in'jan'fambi. Nane dushundeccuja tisupaporai'ccu fundocco'fa: “Casara'chove co'feqquia'caen fendo'jesi qui boira'fambi. Pa'choma a'tuqquia'caen ñombi'ye cofe'jesi qui i'na'fambi.” ³³ Feti'su Juan jipa aña'choma ambipa asettu. Tse'tse'pama'qque cu'imbi. Tsa'cansi que'ija su'fa: “Tsaja cocoya ca'ni'cho.” ³⁴ Ja'ño ñajan Sefaccone Ji'cho A'i jipa gi osha'choma amba cu'i. Tsa'ma que'ija su'fa: “Va a'ija

ñoa'me panshaen an'jemba tse'tse'pa singo tsu. Egae tsinconsundeccu, gobierno impuestoma isusundeccu'qqe tisei'ccu fae'ngae jacan'fa.”
³⁵ Qquen qui su'fa. Tsa'ma tsaveqqe'su tsu. Chiga dushundeccuja Chiga tansintsse in'jan'choma canjaen'fa.

Jesús fariseo tsaoni japa an'cho

³⁶ Tsonsi fa'e fariseo a'i Jesúsma ttu'se cuintsu tise tsaoni jipa año. Jesúsja tseni japa cca'indeccui'ccu mesa jin'tti piyive ccui.
³⁷ Tsa'caen ccuipa an'jen'ni pushesuja Jesús fariseo tsaoni can'jen'choma pañamba jipa ca'ni. Tsa pushesuja egae tsincon'su. Patuma ñña'cho botiyanga ñome'bama ipa Jesús tsutteccofanga ccutsupa i'na. ³⁸ I'namba tise inanzaccui'ccu Jesús tsu'ttema tssipoemba cashi. Tsomba tise tosei'ccu Jesús tsu'ttema ccucha. Ccuchapa tsu'ttema mochapa ñome'bai'ccu onjoen. ³⁹ Pushesu tsa'caen tsonsi Jesúsma ttuse'su fariseoja atepa tisu injama'choni asi'ttaen: “Va a'ija ñoa'me Chiga Aya'fa afa'suta tsu tisema pporaen'su pushesuma atesuya. Nane pushesu ma'caen egae tsincon'choma tsu atesuya.” ⁴⁰ Tsonsi Jesúsja fariseo in'jan'choma in'jamba su:

—Simón, ñajan quenga condaye in'jan.

Simónjan su:

—Atesian'su, ¿jongoesuma qui condaye in'jan?

Tsonsi Jesúsja tisema su:

⁴¹ —Na'su tsu dos a'inga shacaen. Fae a'i shacaja quiniento corifin'di. Faesu shacaja cincuenta corifin'di. ⁴² Tsendeccu afepoeñe osha'fambisi

na'suja poimbe shacama fi'tti. ¿Majan tsa dos a'i'su tsu na'suma ti'tsse in'jaña?

⁴³ Simónjan su:

—Jm jn̄. ¿Tsa ti'tsse shacaen'sumbi ti?

Tsonsi Jesús tise ma su:

—Ñotsse qui in'jamba su.

⁴⁴ Tsomba piyicamba pushesuma canjaemba Simónma su:

—Va pushesuma canjan. Ña que tsa'onga ca'nisi queja tsa'ccuma afembi ña tsu'ttema cashiye. Tsa'ma va pushesuja tise inanzaccui'ccu ña tsu'ttema tssipoemba cashipa tise tosei'ccu ccucha. ⁴⁵ Queja ñama mochapa chigambiambi. Tsa'ma ña tseyi ca'nisi tiseja ánttembe'yi ña tsu'ttema mocha'je. ⁴⁶ Que ña tsovema yayapoembisi tiseja ña tsu'ttema ñome'bai'ccu onjoen. ⁴⁷ Tsa'cansi gi quema su: Tsa pushesuja tsain'bitsse egae tsincon'chopa pa'ccoma joqquitssiangepa ñame ñotsse in'jan. Tsa'ma majan a'i re'riccoe egae tsincon qquen in'jamba re'riccoe joqquitssiangepa aqquia re'riccoe ñame in'jan.

⁴⁸ Tsomba Jesús pushesuma su:

—Que egae tsincon'choja tayo joqquitssi.

⁴⁹ Qquen susi cca'indeccu fae'ngae Jesús'ccu an-sundeccuja qquen condasecco'fa:

—¿Majan gi qquen te tiseja in'jan, tsa'caen egae tsincon'choma joqquitssiañe'jan?

⁵⁰ Tsonsi Jesús pushesuma su:

—Opatsse canseja. Ñame in'jamba qui ccusha.

8

Pushesundeccu Jesúsma fuite'cho

¹ Can'jencapa Jesúsja faesu canqqueni, faesu a'i can'jen'ttinga japa ma'caen Chiga aindecuve dapa canseya'chone condasepa candusian'jen. Tisema doce shondosundeccu'qqe fae'ngae jacan'fa. ² Toya'caen majan pushesundeccu'qqe Jesús tise'pama ccushaensi fae'ngae jacan'fa. Majan tsendeccu'suta cocoya can'jensi joqquitssian'cho; majanda pajisi ccushaen'chondeccu. Fa'eja, María Magdalena, tsu siete cocoyave joqquitssian'cho. ³ Faesuja Juana. Tise tsa'nduja, Choza, tsu ande na'su Herodes tsa'o na'su. Toya'caen Susana, cca'indeccu'qqe fae'ngae jacan'fa. Tise'pa an'bian'choi'ccu, tise'pa corifin'di'ccu Jesúsma, tisema shondosundeccoma'qqe fuitempa osha'chove ñoña'fa.

*Gaiña jon'sune condase'cho**(Mt 13.1-9; Mr 4.1-9)*

⁴ Poiyi'cco A'i canqquene fae'ngae Jesúsnga bo'fasi tiseja qqen condase'choi'ccu atesian'jen:

⁵ —Jon'suja gaiña jon'su ja. Gaiñasi enttingeja tsaiqui utufanga sheque. A'i tsanga tsuisi chhiriria'qqe jipa an'fa. ⁶ Enttingeja patupa andenga sheque. Sho'yopa pandipa samba, tsa'ccu me'i'onsi. ⁷ Enttingeja anccosicunga sheque. Tsa'ma anccosi fae'ngae coensi ñotsse jon'cho nambe'yi pa. ⁸ Faesu enttingeja ñotssia andenga shequepa sho'yopa ñotsse na'fa. Fae cho tsu cieme atapa'fa.

Jesúsja tsa'caen atesiamba fundopa afa:

—Majan tsosinapaja paña'faja.

Jesús condase'cho condaye in'jan'cho
(Mt 13.10-17; Mr 4.10-12)

⁹ Jesúsma shondosundeccu condase'cho in'jan'chone tisema ñajampañasi ¹⁰ Jesúsja qquen su:

—Tayoe ma'caen Chiga aindeccuve dapa canse'faya'chone Chigaja condambi. Tsa'ma ja'ño que'inga paña'ne in'jan. Cca'indeccungaja aqquia condase'choi'ccu condaseya'cho cuintsu atte'ma atesu'fambiye; cuintsu paña'ma in'jan'fambiye.

Gaiña jon'sune ma'caen in'jan'cho
(Mt 13.18-23; Mr 4.13-20)

¹¹ Condase'cho tsu qquen: Choja Chiga Aya'fa tsu. ¹² Majan a'ija tsaiquina sheque'choacan'fa tsu. Chiga Aya'fama pañasi cocoya na'su junde jipa choma itsaqquia'caen tise'pa paña'choma aqqepoen tise'pa in'jamba ccushasa'ne. ¹³ Majan a'ija patupa andenga sheque'choacan'fa tsu. Tseyi Chiga Aya'fama pañamba avujatsse in'jan'fa. Tsa'ma setsa'fa shacaqquia'caen injama'cho ta'etssimbi. Re'riccone in'jamba me'detsse canse'ta antte'fa. ¹⁴ Cca'ija cho anccosicunga sheque'choacan'fa tsu. Tsendeccuja Chiga Aya'fama pañamba panshaen va ande'su jincho'choma in'jan'fa. Ricove daye in'jan'fa. In'jangae canseye in'jan'fa. Tsa'caen in'jamba Chiga Aya'fama paña'choma fi'ttiqquia'caen tise in'jan'choma nañámbi. ¹⁵ Tsa'ma majan a'ija ñotssia andenga jon'choa'caen Chiga Aya'fama pañamba injama'choi'ccu aqqe'pambi'tsse

in'jan'fa. Tise'pa injama'choja ñotssisi tsa'caen anttembe'yi ñotsse naqquia'caen canse'fa.

Tuñoma setsaen'chone condase'cho
(Mr 4.21-25)

¹⁶ Aija tuñoma setsaemba ombanga apima puviaña'bi. Ni anambacco tsosiccunga tuñoma ccutsiaña'bi. Tsa'ma setsaemba sefani ancaeña'cho cuintsu poiyo'cco a'i quartonga ca'ni'da ñotsse atte'faye. ¹⁷ Tsa'cansi tsangae a'tuya'choja jinchombi. Tsa'ma osha'cho jai'ngae attiansi qui atte'faya. Ni tsangae condayembitsse pasaye'ta jinchombi. Jai'ngae condasesi qui a'tatsse paña'faya. ¹⁸ Tsonsi ñotsse pañamba in'jan'faja. Majan tayo in'jan'chota ti'tsse tsu in'jan'faya. Tsa'ma majan in'jambi'choa'ta tise injanga in'jan'choma'qqe tsu qqeñaña.

Jesús antian bo'fa'cho
(Mt 12.46-50; Mr 3.31-35)

¹⁹ Tsonsi Jesús chan, tise quinshingen-deccu'qqe can'su ji'fa. Tsa'ma tsain'bio a'i shequesi tisenga catseye osha'fambi. ²⁰ Tsa'caen osha'fambisi cca'ija Jesúsma conda'fa:

—Que mama, que quinshingendeccu'qqe tsu tsotefani ccutsu'fa quema atteye in'jamba.

²¹ Tsama pañamba Jesúsja su:

—Poiyo'cco majan Chiga Aya'fama pañamba tsa'caen tson'da ñoa'me ña mama, ña quinshingendeqquia'can'fa tsu.

Jesús fingian, shave'pama iyu'u'cho
(Mt 8.23-27; Mr 4.35-41)

²² Fae a'ta Jesús, tisema shondosundeccu'qqe shavonga otse'fa. Jesúsja tise'pama su:

—Jinge mar jonifani ise'faye.

Tsa'caen susi ja'fa. ²³ Fingian shavoma anga-jisi Jesúsja ana. Fingian ti'tsse quia'me fingiansi tsa'ccu shavonga ca'nisi a'ija cu'nosa'ne dyo'fa.

²⁴ Dyopa Jesúsma qquendyaemba su'fa:

—Na'su, Na'su cu'nomba gi paye tson'jen'fa.

Tsonsi Jesúsja qquendyapa fingiama iyu'usi pasa. Rande shave'pama'qqe iyu'usi ppimppi-
anccuve da. ²⁵ Tsomba Jesúsja su:

—¿Mingapa qui ñame in'jan'fambi?

Tise'paja dyopa Jesúsma can'boemba qquen condasecco'fa:

—¿Majan tsu va a'ija? Tise mandasi fingian, shave'pa'qqe tisema paña'fa.

Gadara ande'su cocoya ca'ni'cho

(Mt 8.28-34; Mr 5.1-20)

²⁶ Tsomba Galilea ande isevetsse ccattufa'fa Gadara andeni. ²⁷ Jesús shavo'ye sombosi fa'e tsa ande'su a'i tisema cachuiye ji. Táyoyi cocoyaja tisenga ca'nisi chu'cco jacamba tsaoni can'jembipa ayandeccu atú'ttini can'jen.

²⁸⁻²⁹ Jesúsma atepa fundopa Jesús tsutteccofanga ccarupa dyai. Nane tsain'bitssi cocoya tsa a'inga ca'nisi canqquesundeccuja tisema coiraye candena yoshavai'ccu tandamba an'bian'fa. Tsa'ma cocoya ca'ni'choja candenama oppattu catisi cocoya tisema anga a'i menia. Jesúsja tsa a'i'ye joqquitssiye cocoyama mandasi a'ija quia'me fundopa su:

—Joccapitssia Chigambe Dutssi'ye qui, Jesús. ¿Jongoesie qui ñani ji? Chigáne ñama noñangianjama.

³⁰ Tsonsi Jesúsja cocoyama iñajampaña:

—¿Jongoesu inise qui?

Tiseja su:

—Legión (Injantssia Sundarondeccu) gi.

Tsain'bitssi cocoya ca'ni'chopa tsu tsa'caen su. ³¹ Qquen supa cocoyandeccuja Jesúsma iñajan'fa cocoya can'jeni tise'pama moembe cañe. ³² Tse'tti ccotta'cco piyiccu'fani tsain'bitssi cochi an sheque'fasi cocoyandeccuja Jesúsma iñajan'fa cuintsu cochinga tise'pama mandaye. Iñajansi Jesús tsa'caen anttesi ³³ cocoyandeccuja a'i'ye sombopa cochinga ca'ni'fa. Ca'nisi cochi sheque'cho sumbie dapa fattoccóccufanga butto amppi'fa marnga. Tsomba andeccopa pa'fa.

³⁴ Cochima coirasundeccu cochi sumbie da'choma attepa buttoccoin ja'fa can-qqueni. Tse'tti can'jensundeccu, biacca can'jensundeccunga'qqe conda'fasi

³⁵ aindeccuja ma'caen da'choma can'su ja'fa. Jesúsni jipa cocoya ca'ni'cho a'i ccusha'choma atte'fa. Tiseja ondiccupa ñotsse in'jamba Jesús tsu'tte jin'ttinga dyai. Tisema attepa poi'cco a'i dyo'fa. ³⁶ Dyo'fasi tseni can'jensundeccu cocoya ca'ni'cho ma'caen ccusha'choma attepa poi'cco a'inga conda'fa. ³⁷ Tsa'caen condasesi poi'cco tsa Gadara andesundeccu ñoa'me dyopa Jesúsma iñajan'fa cuintsu tise'pa ande'ye sombopa ccani jaye. Tsonsi Jesúsja shavonga otsepa toequi shanda. ³⁸ Tayoe cocoya ca'ni'cho a'i ccusha'choja Jesúsma iñajan fae'ngae jaye. Tsa'ma Jesúsja tisema mandamaña qqen supa:

³⁹ —Que tsaoni toequi shandapa poi'cconga condaseja ma'caen Chiga quema mende'yepa tson'choma.

Tsa'caen mandasi tiseja japa poiyi'cco tsa canqquesundeccunga conda ma'caen Jesús tisema ccushaen'choma.

Jesús Jairo onque'ngema ccushaen

Ondiccu'jema pporaemba ccusha'cho

(Mt 9.18-26; Mr 5.21-43)

⁴⁰ Jesús Galilea andeni toequi shandasi a'i bopa tise've rondasundeccu avujatsse tisema chigambian'fa. ⁴¹ Tson'jen'ni Chigane atesian'jen'tti'su na'su, Jairo, jipa Jesús tsutteccofanga ccaru dyaipa Jesúsma ññajan cuintsu tise tsaoni jaye. ⁴² Tseni tise onque'nge fae'cco pa'jipa ccuipa paye tson'jen. Tsaja doce canqque'fave an'bian'cho.

Jesús Jairoi'ccu jayisi tsain'bio a'i fae'ngae jayipa ñña'me ta'yotssi. ⁴³ Tsendeccu enttinge'ye pushesu'qqe jayi. Tsa pushesuja tise egápai'ccu dañongepa doce canqque'fa me'detsse canse. Ccushambe'yi pa'cco tise corifin'dima afepoen cati sejesundeccunga. ⁴⁴ Tsaja sepaccofae Jesúsnga catsepa tise ondiccu'je utufama pporaen. Pporaensi tse'faei'ccuyi tise egápaja samba.

⁴⁵ Tsa'caen tsonsi Jesúsja ññajampaña:

—¿Majan tsu ñña pporaen?

Tsa'ma poiyi'cco a'i pporaembi qqen su'fa. Poiyi'cco tsa'caen su'fasi Pedroja su:

—Na'su, vui'o a'imbipa shoquendipa ppororaensi, ¿ma'caen qui su: “¿Majan tsu ñña pporaen?”?

⁴⁶ Tsa'ma Jesúsja su:

—Fae'cco ñña pporaemba ccusha. Tayo gi in'jan ñña ccushaen'jen'cho ñña'ñe somboqquia'caen a'ima ccushaen.

⁴⁷ Tsonsi pushesuja Jesús tayo atesu qqwen in'jamba ttun'dunduj'e japa Jesúsnga catsepa tise tsutteccofanga ccaru dyai. Tsomba poiyi'ccongá condase tise injama'choni in'jamba Jesúsma ppo-raemba tse'faei'ccuyi ccusha'choma. ⁴⁸ Tsonsi Jesúsja tise ma su:

—Shim'ppi, ñame in'jamba qui ccusha. Opatse canseja.

⁴⁹ Jesús toya pushesui'ccu condase'je'ni faesu a'i na'su Jairo tsaone jipa Jairoma su:

—Tayo tsu que onque'ngeja pa'ya. Ti'tsse atesian'suma noñangiambe ántteja.

⁵⁰ Tsama pañamba Jesúsja Jairoma su:

—Dyombe canjan. Que ñame in'jan'ninda tsu que onque'ngeja ccushaya.

⁵¹ Tsaoni napipa Jesúsja se'pi poiyi'cco a'i tisei'ccu ca'niñe. Tsa'ma Pedro, Santiago, Juan, du'shumbe yaya, du'shumbe mamama'qqe angapa tsa'onga ca'ni'fa. ⁵² Poiyi'cco tsaonisundeccu qqejeccopa ina'jen'fasi Jesúsja su:

—Ina'fajama. Du'shuja pambi'tsse'yi ana'jen.

⁵³ Tsa'ma tayo ñoa'me pa'chosi in'jamba Jesúsma feña'fa. ⁵⁴ Tsonsi Jesús du'shu tive'ye indipa tise ma qqwendyaeñe ttu'se:

—Du'shu, jangija.

⁵⁵ Qqwen susi tise qqwendya'pa toequi jisi tse'faei'ccuyi du'shuja jangi. Tsonsi Jesúsja manda cuintsu du'shuma o'fiañe. ⁵⁶ Du'shumbe yaya, du'shumbe mama'qqe can'boen ccutsu'fa. Tsa'ma Jesúsja tise'pama manda cuintsu cca'indeccunga condambe can'faye.

9

Candusiañe manda'cho (Mt 10.5-15; Mr 6.7-13)

¹ Jesús tise ma doce shondosundecuma ttu'se boñamba tise'pama in'jaemba manda osha'cho cocoyama joqquitssiañe, pajisundecuma ccushaen'faye. ² Tsomba tise'pama mandamaña cuintsu japa ma'caen Chiga aindecuve dapa canseya'chone candusiamba pajisundecuma'qqe ccushaen'faye. ³ Tise'pama su:

—Me'cco yi jaja'faja. Ni jacan'cho accuicco'cho, ni o'va, ni anqqe'su, ni corifin'di, ni faesu ondiccu'jema anga'fajama. ⁴ Majan tsa'onga ca'ni'da tse'ttiniñi can'jen'faja canqqueni sombopa jaya'ngae. ⁵ Ma'tti pañañe in'jan'fambisi tse'ttie sombo'ta tsu'ttenga ancamba totopa'ma fanttundu'faja tise'pa egae tson'choma canjaeñe.

⁶ Tsonsi tsendecuja sombopa cca'tti cca'tti poi canqquenga japa Chiga ñotsse condase'choma candusian'fa. Mani ja'a'qqe pajisundecuma ccushaen'fa.

Na'su Herodes feti'su Juanma fi'tti (Mt 14.1-12; Mr 6.14-29)

⁷ Ande na'su Herodes osha'cho Jesús tson'choma pañamba injama'choni dyo. Majan a'ija “Feti'su Juan'ñe ccase qqwendya” qqwen tsu in'jan'fa. ⁸ Cca'indeccuja: “Tayopi'su Chiga Aya'fama afa'su Elías tsu attian” qqwen tsu in'jan'fa. Toya'caen: “Tayopi'su Chiga Aya'fama afa'su ccase qqwendya,” ⁹ Tsa'ma Herodesja su:

—Tayo gi Juan tsovéma chattuye mandasi tsu fi'tti. Tsa'ma ¿majan tsu va ña osha'chone paña'jen'cho?

Qquen asi'ttaemba dyopa Jesúsma atteye in'jan.

Jesús cinco mil a'ima o'fian'cho

(Mt 14.13-21; Mr 6.30-44; Jn 6.1-14)

¹⁰ Jesúsne afasundeccu candusiañe japa toequi jipa tise'pa osha'cho tson'choma Jesúsnga condase'fa. Tsonsi Jesúsja tise'pama ccani anga. Betsaida canqque pporotsse japa can'jen'fa.

¹¹ Tsa'ma a'i bo'fa'choja Jesús mani ja'choma pañamba omboe jaja'fa. Tsonsi Jesúsja tise'pama avujatsse chigambiamba ti'tsse ma'caen Chiga aindeccuve dapa canseya'chone candusian. Pajisundeccuma'qqe Jesúsja ccushaen.

¹² Tayo chiga ondusesi tsa doce Jesúsne afasundeccu tisenga jipa su'fa:

—Aindeccu bo'fa'choma mandamañajan cuintsu canqqueni, cca'tti'su tsaoni'qqe japa amba ana'faye. Nane vanijan a'i menia gi can'jen'fa.

¹³ Tsa'ma Jesúsja tise'pama su:

—Que'i tise'pama o'fian'faja.

Tsa'ma su'fa:

—Nane cinco panmeñi dos avuveyi gi an'bian'fa. ¿Queta ti qui in'jan ingi japa anqque'suma chavapa poi'yi'cco vandecuma o'fiañe?

¹⁴ Nane tsandiendeccuyi tsu cinco milca'on can'jen'fa. Tsa'ma Jesúsja tisema shondosundecuma su:

—Aindeccuma manda'faja cuintsu cca'tti cincuenta cca'tti cincuenta bopa dyai'faye.

¹⁵ Tsa'caen mandasi a'i dyai'fasi ¹⁶ Jesúsja tsa cinco pan, dos avuma isupa Chiga sefacconima asuccocan. Asuccocamba Chiga tsu ñotssia qqwen afapa pan, avuma'qqe doñamba tisema shondosundeccunga afe cuintsu aindeccunga attufaen'faye. ¹⁷ Tsonsi poiyyi'cco a'i amba tteppu'fa. Jesúsma shondosundeccuja pan, avu antteye'cho sheque'pama taipa doce saporove on'boen'fa.

Pedro Jesúsja Cristo qqwen conda'cho

(Mt 16.13-19; Mr 8.27-29)

¹⁸ Fae a'ta Jesús tisema shondosundeccui'ccu tisuyi Chigama ñajan'jen. Tsomba Jesúsja tise'pama ñajampaña:

—¿Majan qqwen tsu ñamajan faesu a'ita su'fa?

¹⁹ Tise'paja su'fa:

—Majanda tsu su'fa: “Feti'su Juan.” Cca'ija: “Tayopi'su Elías.” Cca'ija: “Tayopi'su Chiga Aya'fama afa'su ccase qqwendya'cho.”

²⁰ Tsonsi Jesúsja tise'pama ñajampaña:

—Tsa'ma que'ija, ¿majan qqwen qui ñamajan su'fa?

Tsonsi Pedroja su:

—Queja Chiga in'jan'cho Cristo qui.

Jesús tisu paya'chone conda'cho

(Mt 16.20-28; Mr 8.30-9.1)

²¹ Qquen susi Jesúsja tise'pama quia'me manda cuintsu majangayi'qqe condambe can'faye.

²² Qquen tsu su:

—Sefaccone Ji'cho A'i gi osha'choi'ccu vanaña. Ingi ande'su coenzandeccu, Chigama afa'su nasundeccu, Chiga Aya'fama atesiansundeccu'qqe

ñama chi'ga'faya. Ñama fi'ttisi papa gi tres a'tangae ccase qquendyaya.

²³ Toya'caen Jesúsja poi'yi'cco a'ima su:

—Majan a'i ñai'ccu fae'ngae jiye in'jan'chota, tisu in'jan'choma tsu catiya'cho. Tisu avuja'ccoma opiqquia'caen tsu tiseja poi a'ta ña'caen paya'ngae vanaña'cho. Toya'caen ñai'ccu fae'ngae jacaña'cho. ²⁴ Majan a'i tisma ccushaeñe in'jan'da tsu papa catiyeya. Tsa'ma majan ñame in'jamba pa'ta ñoa'me tsu ccushaya. ²⁵ A'i poi'yi'ccoma patsupa osha'choma an'biamba toya'caen tisma qqueña'ninda, ¿jongoesune tsu bareya? ²⁶ Majan a'ija ñane, ña aya'fane'qqe ansange'fa. Tsa'ma ña, Sefaccone Ji'cho A'i gi ccase jipa ccane'qqe tise'pane ansangeya. Ña joccapitssia've dapa attiansi Chiga ña Quitsaja ñama ñotssiave canjaeña. Sefacconi'su ñotssia Chigama shondosundeccu'qqe ñama ñotssiave canjaen'faya. ²⁷ Jai'ngae tsu tsa'caen tsoña'cho. Tsa'ma majan que'i'su toya pambi'te qui Chiga aindeccuve daya'choma atte'faya.

Jesús ccaningae da'cho

(Mt 17.1-8; Mr 9.2-8)

²⁸ Tsa'caen supa ocho a'ta'caen pasasi Jesúsja Pedro, Juan, Santiagoma'qqe anga ccotta'cconi Chigama ñajaña. ²⁹ Jesús Chigama ñajansi tsu tise cambajuja ccaningae da. Tise ondiccu'je'qqe chhariccotssia totoave da. ³⁰⁻³¹ Dos a'i'qqe a'tatssia've attiamba Jesús'ccu condase'je'fa. Tsendeccuja tayopi'su Moisés, tayopi'su Elías'qqe. Jesús Jerusaléni japa paya'chone tsu condase'je'fa. ³² Pedro, tisei'ccu fae'ngae can'jensundeccu'qqe

anae'supa anae'su'je'ttie qquendyapa Jesús ñotssia a'tatssia've da'choma atte'fa. Jesús'ccu fae'ngae ccutsusundecsuma'qque atte'fa. ³³ Tsendeccu Jesúsma chigambiamba jaye tson'jensi Pedroja Jesúsma su:

—Na'su, ñotssi tsu ingi va'tti can'jeñe. Jinge tres tsao'cho'coo tsao'ña'faye –fae'cco quembe, faesuja Moisésme, faesuja Elíasme.

Pedroja tisu su'choma atesumbi'ma injanga afa. ³⁴ Tsa'caen susi ccuttopa'si tise'pama picco. Tsa'caen piccosi Jesúsma shondosundeccuja dyo'fa. ³⁵ Ccuttopa'si'ye aya'faja qquen afa:

—Vaja ña in'jan'cho Dutssi'ye tsu. Tisema paña'faja.

³⁶ Aya'fa qquen afa'nijan Jesúsja tisuyi ccutsu. Shondosundeccuja tsama atte'ma condambi'tsse can'jen'fa. Nane Jesús toya can'jeinte cca'indeccunga tsama conda'fambi.

Shanccopajasheve da'cho du'shu
(Mt 17.14-21; Mr 9.14-19)

³⁷ Ccaqui a'ta ccotta'cco'ye andesi tsain'bio a'i tisema cachui'cco'fa. ³⁸ Fa'e tse'tti can'jen'choja fundondo'e afa:

—Atesian'su, chigáne ña du'shuma mende'yeja. Ña dutssi'yeja fae'cco'fa tsu. ³⁹ Cocoya tisema indi'nijan tse'faei'ccuyi fundopa cunshomboen dapa aya'fa'ye ttottomboemba pa'je. Cocoyaja anttembe'yi tisema ma'dyisi si'ma'en da. ⁴⁰ Tsama somboeñe quema shondosundecsuma iñajansi tise'paja osha'fambi.

⁴¹ Tsa'caen susi Jesúsja su:

—Que'i ja'ño'su aindeccuja itoyetsse in'jamba Chigave in'jambindeqquia qui. ¿Min'ge'e gi tsuin'da quei'ccu can'jemba angacaña? I'ngaja que dutssi'yema.

⁴² Du'shu jiñasi cocoyaja tisema mandyi indi pan'jaen. Tsa'ma Jesúsja cocoyama iyu'upa du'shuma ccushaemba tise yayanga afe.
⁴³ Tsa'caen ccushaensi poi'yi'cco a'i can'boemba in'jan'fa Chigaja ti'tsse'tssia've.

Jesús tisu paya'chone ccase conda
(Mt 17.22-23; Mr 9.30-32)

Aindeccu toya tsa'caen Jesús tson'choma camboen'jen'fa'ni Jesúsja tisema shondosundeccuma su:

⁴⁴ —Va condase'choma ñotsse pañamba in'jan'faja: Ñajan Sefacone Ji'cho A'i. Tsa'ma ñama indipa a'inga afe'faya cuintsu fi'tti'faye.

⁴⁵ Jesús tsa'caen tisune condasesi paña'ma atesu'fambi. Nane ccaningae in'jamba ñoa'me su'choma atesuye osha'fambi. Toya'caen dyojopa tise su'chone Jesúsma iñajampaña'fambi.

¿Majan tsu ti'tsse joccapitssia?
(Mt 18.1-5; Mr 9.33-37)

⁴⁶ Tsomba Jesúsma shondosundeccu tisupapora'ccu majan tsu ti'tsse'tssia qqen afacco'fa.

⁴⁷ Tsa'ma Jesús tise'pa injama'cho in'jan'choma in'jamba du'shuma ipa tisu'ttinga ccutsiamba
⁴⁸ su:

—Majan ña a'ive dapa va du'shuma ñoa'me in'jan'da tsu ñama'qqe ñoa'me in'jan. Majan ñama ñoa'me in'jan'da tsu ñama moen'su Chigama'qqe

ñoa'me in'jan. Majan que'i'su utu'cco'a'ta tsaja
ñoa'me ti'tsse'tssia tsu.

Majan chi'gambi'ta fuite'su tsu
(Mr 9.38-40)

⁴⁹ Juanjan pañamba su:

—Na'su, atte'fa gi a'i'ma que inisema afapa
cocoyama joqqitssian'jen'choma. Tsa'ma tise
ingi'ccu fae'ngae jacambisi gi tisema se'pi'fa.

⁵⁰ Tsa'ma Jesúsja su:

—Tisema se'pi'fajama. Majan que'ima
chi'gambi'ta que'ima fuite'su tsu.

Jesús Santiago, Juanma iyu'u'cho

⁵¹⁻⁵² Tisu papa sefacconi jaya'cho pan napijisi
Jesúsja tansintsse Jerusaléni jaye ashaen. Tisema
o'tie a'ima moensi japa Samaria ande'su can-
qqueni ca'ni'fa tsa'ove afaye. ⁵³ Tsa'ma Samari-
asundeccuja Jesús Jerusaléni jayi qqwen pañamba
se'pipa tsa'oma afe'fambi. ⁵⁴ Tsonsi Jesúsma shon-
dosundeccu, tsa Santiago, Juan'qqe pañamba iy-
icca'yepa su'fa:

—Na'su, ¿in'jan ti qui ingi Elías'caen Chigama
iñajañe cuintsu si'nge sefaccone amppipa va
samariasundeccuma oque catiye?

⁵⁵ Tsa'ma Jesúsja piyicamba tise'pama iyu'upa
su:

—¿Atesu'fambi ti qui que'inga ca'ni'cho
Qquendya'pama? ⁵⁶ Sefaccone Ji'cho A'i gi jimbi
a'ima fitti'ttiye. Tsa'ma a'ima ccushaeñe gi ji.

Qquen supa faesu canqqueni ja'fa.

Jesúsi'ccu fae'ngae jacansundeccu
(Mr 8.19-22)

⁵⁷ Tsaiqui'ye jayisi a'ija Jesúsma su:

—Na'su, mani que ja'ni'qqe ña'qqe fae'ngae jaya.

⁵⁸ Jesúsja tisema su:

—Quiyata tsu tise'pa ana'jen'cho changove an'bian'fa. Chhiriria'qqe tise'pa tsao'pave an'bian'fa. Tsa'ma Sefaccone Ji'cho Ai gi mani japa anaña'chove an'biambi.

⁵⁹ Cca'ima Jesús qquen su:

—Ñai'ccu fae'ngae jija.

Tsa'ma tsa a'ija su:

—Na'su, shondo'jeja. Ña yaya pasi a'tupa gi quei'ccu jaya.

⁶⁰ Tsa'ma Jesúsja tisema su:

—Antteja cuintsu ñame in'jambindeqquia tsa'caen vasepa pa'chondeccuma a'tuye. Tsa'ma queja ñame in'jamba japa ma'caen Chiga aindecuve dapa canseya'chone condaseja.

⁶¹ Faesu a'ija su:

—Na'su, ña gi quei'ccu fae'ngae jaya. Tsa'ma o'tie tsaoni japa gi ña antiama chigambiamba jiya.

⁶² Tsa'ma Jesúsja tisema su:

—A'ija vaurai'ccu andema chhochho'jepa sepacconima piyican'da tansintsse jaye oshambi. Tsa'caen majan a'i ñame in'jamba toya'caen tayo'su in'jan'choma in'jan'da Chiga a'ive daye oshaya'bi.

10

Jesús setentama manda moen'cho

¹ Omboe Jesúsja faesu setenta tisema shondosundecuma ttu'sepa mani tisu jaye tson'jen'ni dosve dosve mandamaña. Majan

canqqueni tise jayani tsendeccuma o'tie mandamaña. ²Tise'pama su:

—Nasipanga jon'cho cu'chosi taiya'cho napiqquia'caen tsu a'ija pañañe ronda'je'fa. Tsa'ma taisundeccu shacaqquia'caen tsu Chiga ñotsse condase'choma condasesundeccuja shaca. Chiga Quitsaja taiya'cho na'su tsu. Tisema ñajan'faja cuintu ti'tsse'o a'ima ttu'sesi fuite'faye. ³Que'ija vama in'jamba jaja'faja: Oveja du'shuma ttesi andenga mandamañaqquia'caen gi que'ima mandamaña'jen. ⁴Tsa'ma corifin'di bosama angajama. Ni o'va, ni sapatoma angajama. Tsaiqui'ye japa cca'indeccuma bia've chigambian'fajama. ⁵Majambe tsa'onga ansunde'ta na'suma chigambian'faja cuintu opatsse canseye. ⁶Chigave in'jan'chondeccu tseni can'jen'da tsu que'i chigambian'choma pañamba tsa'caen opatsse canse'faya. Tsambi'ta chi'ga'fasi que'i su'cho toequi shandasi qui que'i opatsse canse'faya. ⁷Majan tsa'onga ca'ni'da tse'tti can'jen'faja. Can'jemba tise'pa anqque'suma an'faja. Tise'pa cui'ccuma cu'i'faja. Nane sema'su semasi tsu afepoeña'cho. Que'ija atesiansi tsu o'fiaña'cho. Cca'tti cca'tti faesu tsa'onga ja'fajama. ⁸Tsa'ma fae canqquenga ca'nimba que'ima ñotsse chigambiansi tise'pa que'inga afe'cho anqque'suma an'faja. ⁹Tise'pani'su pajisundeccuma ccushaen'faja. Tsenisundeccunga conda'faja: “Ca'tsa tsu napiji que'i Chiga aindeccuve da'faya'cho.” ¹⁰Tsa'ma majan canqquenga ca'nisi ñotsse chigambian'fambian'da tsa canqque'su atandundunga japa tsa'su a'ima qqquen

condase'faja: ¹¹ “Que'i ingima chi'gasi ccane'qque gi va canqque'su andema chi'ga'fa. Nane ingi tsu'ttema'qque gi ccucha'fa. Va ccuchaye'je'cho ande tsu que'i egae tsincon'choma canjaen. Tsa'ma Chiga aindeccuve daya'choja ca'tsa napiji qqquen condasesi qui ja'ño tayo paña'fa.”
¹² Ñoa'me gi su maqui a'ta Chiga a'i injama'choma somboe'nijan tsa canqquesundeccu tsu bove dyo'otsse da'faya. Nane tayopi'su Sodoma canqque'su egae tsinconsundeccuma bove dyo'otsse tsu da'faya.

*Majan canqquesundeccu paña'fambi
 (Mt 11.20-24)*

¹³ ¡Vana'faya qui Corazín canqquesundeccu! ¡Vana'faya qui Betsaida canqquesundeccu! Que'ija ñotsse Chiga tson'choma atte'fa. Nane Chiga tsa'caen Tiro, Sidón canqquema tsoña'choecan'da tsu junde tseni'su aindeccuja tise'pa egae tsincon'choma chi'gapa Chigama iñajan'faye'can. Ñombi'ye'choma canjaenqque'su sarupama ondiccupa cusepai'ccu tsu onjon'faye'can tise'pa in'jan'choma canjaeñe. ¹⁴ Tsa'ma injama'choma somboeña'cho a'ta napisi Tiro, Sidón canqquesundeccuja que'ima bove aiyepambi'coo vana'faya. ¹⁵ Toya'caen que'i Capernaum canqquesundeccu: ¿Asi'ttaen'fa ti qui Chiga que'ima in'jamba sefacconi angaye'ja? Me'i, tsa'ma si'nge anchanda'je'chonga tsu que'ima catiya.

¹⁶ Majan que'ima paña'da ñama tsu paña'fa. Majan que'ima chi'ga'ta ñama tsu chi'ga'fa. Majan

ñama chi'ga'ta ñama moen'su Chiga Quitsama'qqe
tsu chi'ga'fa.

Setenta toequi jipa conda'fa'cho

¹⁷ Tsa setenta Jesúsma shondosundeccu ja'fa'cho
toequi jipa avujatsse bopa su'fa:

—Na'su, que inisema afapa gi osha'choma
manda'fa. Cocoyama'qqe a'iye somboye
mandasi tsu sombo'fa.

¹⁸ Tsa'caen susi Jesúsja tise'pama su:

—Ju ñoa'me tsanda veyenqquia'caen Satana
sefaccone amppi'choma gi atte. ¹⁹ ¡Que canjan!
Tayo gi ante que'ija tini, iyonga tsui'a'qqe
qui vana'faya'bi. Que'ima ch'igasundeccuma
qui patsu'faya. Me'i'on tsu jongoesu que'ima
dañoña'chove. ²⁰ Tsa'ma tsa'caen cocoya
que'ima pañamba sombo'fa'ni'qqe panshaen
avuja'fajama. Que'i Chiga a'ive dasi tsu
Chigaja que'i inisema sefacconi tevaen. Tsane
avujatssi'faja.

Jesús avuja'cho

(Mt 11.25-27; 13.16-17)

²¹ Tse'faei'ccuyi Chiga Qquendya'pa Jesúsma
in'jaensi avujapa Chiga Quitsama qqen afa:

—Yaya Chiga Quitsa, Que qui Sefacconi'su
Na'su. Pa'cco ande'su Na'su qui. Tsa'ma va
ande'su injama'pandeqquianga qui tsuma
canjaembi. Atesu'chondeccunga canjaembipa
qui va aindeccunga tsuma canjaen. Ñotssia
du'shu pañaqquia'caen tise'paja ñotsse pañamba
in'jan'fa. Yaya, ñotsse qui tson. In'jamba que
tsa'caen anttesi gi avujatssi.

²² Tsa'caen Chigama ñajamba Jesúsja su:

—Tayo tsu ña yayaja osha'choma ñanga afe. Cca'i ñama atesu'fambisi Chiga Quitsayi tsu ñama atesu'cho. Ñajan Tise Dutssi'ye. Toya'caen cca'ija Chiga Quitsama atesu'fambisi ñañi gi Tisema atesu'cho. Tiseja ña yaya tsu. Toya'caen ñajan Chiga Dutssi'yepa gi majama in'jan'da tsanga condase cuintsu tsendeccu'qqe Chiga Quitsama atesu'faye.

²³ Tsomba Jesúsja piyicamba tisema shondosundeccunga a'tutsse su:

—Que'i tso'fei'ccu osha'cho va tson'choma atepa qui ñoa'me avujatssi'fa. ²⁴ Ñoa'me gi su: Tayopi'su nasundeccu, tayopi'su Chiga Aya'fama afasundeccu'qqe que'i atte'choma atteye in'jan'ma osha'fambi. Que'i paña'jen'choma pañañe in'jan'ma osha'fambi.

Ño'a samaritanone condase'cho

²⁵ Tsonsi Chiga manda'choma atesu'cho jangi ccutsupa Jesúsma qqeñañe in'jamba su:

—Na'su, ¿jongoesuma gi tsoña tsangae canseye'ta?

²⁶ Jesúsja tisema su:

—¿Jongoesu qqen tsu Chiga manda'choja su? Queja Chiga tevaen'jema zutsse can'da ¿jongoesu qqen qui in'jan?

²⁷ Tiseja pañamba su:

—Na'su que Chigama ñotsse in'jaña'cho. Nane pa'cco injama'choi'ccu, pa'cco que in'jan'choi'ccu, pa'cco que quin'sui'ccu tsu Na'su Chigama ñotsse in'jaña'cho. Toya'caen faenga'suma tisuma'caen ñotsse in'jaña'cho.

²⁸ Tsonsi Jesúsja tisema su:

—Ñotsse qui in'jamba su. Tsa'caen tson'da qui canseya.

²⁹ Tsa'ma Chiga manda'choma atesu'choja toya Jesúsma qqeñaña in'jamba tsu condase'chone ti'tsse iñanjampaña:

—¿Majan tsu “ña faenga'suta”?

³⁰ Tsonsi Jesúsja su:

—A'i Jerusaléne sombopa Jericó canqqueni ande jisi ccanambandecuja tisema indi'fa. Indipa tsu pa'tssima cca'na'fa. Tise ondiccu'je'cho sarupama'qqe oshichhaemba tisema ochhai iñaccaen'fa. Paye tson'jen qqen in'jamba tisema catipa ja'fa. ³¹ Tsama atesumbi'ma Chigama afa'su'qqe tsa tsaiqui'ye jayipa ccanange'suma atte'ma catsembe'yi tsaiqui ccafa'su utufa'ye tsui panshamba ja. ³² Toya'caen Leví a'i'qqe tsangae napipa a'ima atte'ma ccafa'su utufa'ye panshamba ja. ³³ Tsonsi fa'e samaria'su a'i'qqe tsu tsaiqui'ye jayipa atte. Nane samariasundeccu israendeccui'ccu ñotsse jincho'fambi. Tsa'ma tsa samaria'su a'ija ccanange'suma atepa mende'ye. ³⁴ Mende'yepa catsepa vino, yayapai'ccu tise iñacca'choma se'je. Se'jepa sarupai'ccu tandan. Tsomba tisu boronga a'ima otsian dyaiñamba anga jacansundeccu ana'jen'cho tsa'onga. Tseni tisema coira'je. ³⁵ Ccaqui a'ta jaye tson'jemba tsa'o na'suma ttu'sepa cincuenta corifin'dive afepa su: “Tisema ñotsse coiraja. Tisema coiraye ti'tsse chavasi shaca'nijan ña toequi jayipa gi pa'ccoma quenga afepoña.” ³⁶ Jen'da, va tres a'i'su, Chigama afa'su, Leví a'i, samaria'su a'i, ¿majan tsu ñoa'me tsa ccanange'suma “tisu faenga'su” qqen in'jan?

³⁷ Chiga manda'choma atesu'choja su:

—Tisema mendeye'su tsu “faenga'su” qqquen gi in'jan.

Tsonsi Jesúsja su:

—Que'qqe tsa'caen poiya'ccoma ñotsse in'jamba canseja.

Jesús can'su ja'cho Marta tsaoni

³⁸ Jesús, tisema shondosundeccu'qqe japa faesu canqquenga ca'ni'fa. Fa'e pushesuja, Marta, tseni can'jen. Martaja Jesúsma tisei'ccu jacansundeccuma'qqe chigambiamba tise tsa'onga ca'nian. ³⁹ Marta que'tte, María, Martai'ccu fae'ngae can'jemba Jesús atesian'jen'choma pañañe in'jamba tise tsutteccofanga dyaipa paña'jen. ⁴⁰ Tsa'ma Martaja osha'choma ñoñañe tisuyi vase'jepa iyicca'yepa Jesúsnga jipa su:

—Na'su, in'jambi ti qui ña que'tte ñama catisi gi tisuyi vase'je. Tisema mandaja cuintsu ñama fuiteye.

⁴¹ Tsa'ma Na'su Jesús Martama su:

—Marta, Marta, iyicca'yembe canjan. Panshaen qui asi'ttaemba osha'chove ñoñañe vase'je.

⁴² Ingima cui'ñambayi antteja. Maríata tsu ñotssiana in'jamba paña'jensi gi tisema se'pimbi.

11

Chigama ñajaña'chone atesian'cho

(Mt 6.9-15; 7.7-11)

¹ Maquita Jesúsja Chigama ñajan'jen. Ñajan nanisi fa'e tisema shondo'suja jipa su:

—Na'su, ingima atesianjan ma'caen Chigama ñajaña. Nane feti'su Juanjan tisema shondo-sundecuma tsa'caen atesian. ² Tsonsi Jesúsja tise'pama su:

—Que'ija Chigama ñajaña in'jan'da qqen su'faja:

Sefacconi Canjen'su Na'su, ingi Quitsa, que qui ñoa'me joccapitssia.

Que inise tsu egave metssipa ti'tsse'tssia.

Queyi Na'suve dapa poima mandaja.

Que in'janqquia'caëñi pa'cco tsu jinchoja.

Que sefacconi mandaqquia'caen va andeni'qqe mandaja.

³ Poi a'ta coirapa ingima an'bianjan ingi cu'ipa amba canseye.

⁴ Ingi quema egae tsincomba shacaen'choma aqquepoenjan,

ingima egae tsincomba shacaensundecuma aqquepoenqquia'caëñi.

Ingi egae tsinconsa'ne ottuni ttupa coiraja.

Tsomba osha'cho ega'ye ingima ccushaenjan.

⁵ Tsomba Jesús tisema atesiamba su:

—Va aqquia condase'choma asi'ttaen'faja: Manjan que'i'su enttinge cose faenga'su tsaoni japa qqen tsu su: “Ccashe'ye, tres panme ñanga afeja. ⁶ Faesu ña amigo biani jacamba ña tsa'onga napisi gi ñajan jongoesuma o'fiaña'chove mecho.”

⁷ Qquen susi tsu suya: “Ñama noñangianjama. Tayo sombo'ttima piccopa gi ña dushundecui'ccu ana'jen'fa. ¿Ma'caen gi ja'ñojan jangipa panma quenga afeya?” ⁸ Tsa'ma ñoa'me gi su, tiseja

tisu amigombi'ma'caen jangipa quenga afembipa pashaen noñangiansa'ne tsu jangipa osha'cho que in'jan'choma afeya. ⁹ Tsa'cansi gi que'inga su: In'ajan'ninda tsu Chigaja afeya. Ttatta'ta qui atte'faya. Sombo'ttima tssai jeña'ninda na'su tsu fettaya. ¹⁰ Nane poi'cco majan in'ajan'da tsu isu'faya. Poi'cco majan tta'tta'ta tsu atte'faya. Poi'cco majan tssai jeña'da na'su fettasi tsu ca'ni'faya.

¹¹ Majan que'i'suja du'shuma an'bian'fa. ¿Que du'shu panme in'ajan'ninda ti qui patuma afeya? ¿Avuve in'ajan'ninda ti qui avuma se'pipa iyoma afeya? ¹² ¿Arapandusu'chove in'ajan'ninda ti qui tinima afeya? Me'i. ¹³ Que'ija ño'ambi'a'qqe tsa'caen que'i dushundecunga ñotssiamama afeye atesusi ñoa'me tsu Sefacconi'su Na'su Chiga Quit-saja bove ñotssiamama afeya. Nane majan Tisema in'ajan'ninda tsu tsanga Tise Qquendya'pama afeya.

A'i Jesúsma afase'cho

(Mt 12.22-30; Mr 3.20-27)

¹⁴ Ayafambie da'choma Jesúsja cocoyama joqquitssian. Cocoya joqquitssisi afa'jembi'choa afa'jesi poi'cco a'i can'boen'fa. ¹⁵ Tsa'ma majan a'ija su'fa:

—Cocoya na'su Beelzebú va Jesúsma in'jaensi tsu tsa'caen cocoyama joqquitssiane osha.

¹⁶ Tsa'ma cca'indeccuja Jesúsma qqeñaña in'jamba tisema in'ajan'fa cuintsu sefacconi'su canjaen'choma canjaeña. ¹⁷ Tsa'ma Jesúsja a'i qqeñaña in'jan'choma in'jamba tise'pama su:

—Majan ande'su a'i tisupanaccui'ccu chi'gacco'fa'nijan tsa ande tsu népiya. Fae

etti'sunaccu iyicco'ta fae'ttini can'jeñe osha'fambi.
 18 Tsa'caen Satana tsa Beelzebú qqwen su'cho
 tisuma chi'ga'ta ¿ma'caen tsu tiseja na'sia'caen
 mandaya? “Beelzebú Jesúsma in'jaensi cocoyama
 joqquitssian'jen” qqwen qui su'fa. 19 Ñama
 tsa'caen tsa in'jaen'ninda ¿majan tsu que'ima
 shondosundecuma in'jaen cuintsu tise'pa
 cocoyama joqquitssian'faye? Nane que'ima
 shondosundecuja que'i qqe'choma tsu
 canjaen'faya. 20 Tsa'ma Chiga Qquendya'pa ñama
 in'jaensi gi cocoyama joqquitssian'jen. Tsa'caen
 in'jaemba canjaensi qui Chiga osha'choma
 oshachopa ma'caen manda'choma atte'fa.

21 Quin'an a'i tise matichi'ccu tisu tsa'oma
 ñotsse coira'ninda ¿majan tsu tise an'bian'choma
 cca'ñañe oshaya? Nane Satanajan tsa'can tsu.
 22 Tsa'ma faesu tisema ti'tsse quin'an iyiccoye
 ji'ta tisema tsu patsuya. Nane tsa quin'an
 a'imbe matichima itsa'ninda ¿ma'caen tsu tisuma
 ccushaeña? Tisema patsupa tise an'bian'choma
 angapa attufaeña'cho.

23 Majan fae'ngae ñai'ccu semambi'ta ñai'ccu iy-
 icco'su tsu. Toya'caen majan ñai'ccu fae'ngae
 taimbi'ta ñoa'me shequian cati'su tsu.

Cocoya toequi ca'ni'cho

(Mt 12.43-45)

24 Cocoyaja a'iy'e joqquitssipa cocoya can'jeni
 ñombi'ye jacán. Tsa'ma tsa'caen ñombi'yepa os-
 hambipa tisuma su: “Ña mane somboni gi toequi
 jaya.” 25 Toequi japa atte tayo tsa'oma funduipa
 ñoñaqquia'caen tsu a'ija ñotsse injienge. 26 Attepa
 japa tisema bove ega siete cocoyama'qqe i'ngasi

poiye'cco tsu tsa a'inga ca'nimba can'jen'fa. Tsonsi tayoe'ma bove ega tsu tsa a'ine.

Ñoa'me avujatssiya'cho

²⁷ Jesús tsa'caen su'je'ni pushesuja a'i bo'cho'ye fundondo'e tisema su:

—Que mamajan quema isupa coeña'supa tsu ñoa'me avujatssi.

²⁸ Tsa'ma Jesúsja su:

—Ju, tsa'ma majan Chiga Aya'fama pañamba tson'da tsa tsu ti'tsse avujatssi.

Aindeccu canjaen'chove ñajan'fa'cho

(Mt 12.38-42; Mr 8.12)

²⁹ A'i ti'tsse bo'fasi Jesúsja su:

—Ja'ño'su aindeccuja egae in'jamba sefacconi'su canjaen'choma in'jan'fa. Tsa'ma tayopi'su Chiga Aya'fama afa'su Jonás canjaen'chove'yi canjaemba Chigaja faesu canjaen'chove canjaeña'bi. ³⁰ Tayopi'su Jonásja Nínive canqqe'su aindeccunga Chiga canjaen'chove tsu da. Ñajan Sefaccone Ji'cho A'ipa gi ja'ño'su aindeccunga Chiga canjaen'chove daya. ³¹⁻³² Osefaeña'cho a'ta napisi ja'ño'su aindeccuja Nínivesundeccuma bove egae tsu canjaen'faya. Tsendeccuja Jonásma pañamba tisupa egae tsincon'choma chi'ga'fa. Jonásma ti'tsse'tssia gi ja'ño can'jen'ma qui que'i egae tsincon'choma chi'ga'fambi. Toya'caen tayopi'su Sabá ande na'su pushesuja bianne ji Salomón ñotsse in'jamba su'choma pañañe. Osefaeña'cho a'ta napisi tise'qqe ja'ño'su aindeccu bove ega qqen canjaeña. Salomónma ti'tsse'tssia gi ja'ño can'jen'ma que'ija ñama paña'fambi.

Tso'feja ai'vo'su tuño tsu
(Mt 5.15; 6.22-23)

³³ A'ija tuñoma setsaemba a'tu'faya'mbi. Ni cafon tsosiccunga ccutsian'faya'bi. Tsa'ma sefani tsu ancaeña'cho cuintsu majan ca'ni'da ñotsse atte'faye. ³⁴ Que tso'fe'qqe ai'vo'su tuño tsu. Tso'fe ñotssimajan ai'voja a'tatssiani can'jen. Tsa'ma tso'fe ñotssimbian'da ai'voja sinttia'ni can'jen. ³⁵ Tsa'cansi injama'tse, sinttia'ni can'jenqquia'caen que'i injama'cho egae in'jaensi egae cansesa'ne. ³⁶ Tsa'ma ai'vo a'tatssiani can'jenqquia'caen que'i injama'cho ñotsse in'jaensi egae in'jan'chove me'isi qui ñotsse a'tatsse canse'faya. Tuño a'tatsse attianqquia'caen tsu que'i tso'feja que injama'choma attian.

Jesúsja atesiansundecuma iyu'u
(Mt 23.1-36; Mr 12.38-40; Lc 20.45-47)

³⁷ Jesús afa nanisi fa'e fariseo a'i tisema ttu'se tise tsaoni japa añe. Ttu'sesi japa Jesúsja an'jen'cho mesa jin'ttinga dyai. ³⁸ Jesús añe tson'jemba fariseo in'janqquia'caen tivema otishimbisi fariseoja can'boen. ³⁹ Tsa'ma Na'su Jesúsja tisema su:

—Que'i fariseondeccuja apisho'tto, tasa sepacoma cashisi naccuja toya amundetssiqqquia'caen ñotsse attiamba que'i injama'choni toya egae in'jamba qui egae tsincon'fa. ⁴⁰ ¡Ñoa'me injamambi'fa qui! ¿Sepaccove ñoña'suta ti naccuve'qqe ñoñambi? ⁴¹ Bove ñotssi tsu que injama'choni ñotsse in'jamba tsa'caen cca'indeccunga ñotsse tsoña'cho cuintsu Chigama

ñoa'me avujaeñe. Que'i injama'cho ñotssimanda qui ñoa'me pa'cco giya'tssi.

⁴² ¡Tsa'ma vana'faya qui fariseondeccu! Que'ija osha'choma fae decimoveyi Chiganga afeye atesu'fa Tisema avujaeñe. Nane pa'cco ccoma, pa'cco shinccapama'qqe qui fae decimoveyi Chiganga afeye atesu'fa. Tsa'ma ñotsse qui tson'fambi ni Chiga a'ima in'janqquia'caen in'jan'fambi qui. Que'i Chiganga afe'je'choma aqqe'pambe'yi a'ima in'jamba ñotsse tson'faya'cho.

⁴³ ¡Vana'faya qui fariseondeccu! Chigane atesian'jen'ttinga japa bove ñotssia dyaipa'chove qui in'jan'fa. Chava'je'cho atandundunga japa qui chigambianccoye in'jan'fa cuintsu poi'cco a'i que'ima atepa que'ija ti'tsse'tssia qqen in'jan'faye.

⁴⁴ ¡Vana'faya qui Chiga Aya'fama atesu'chondeccu, fariseondeccu'qqe! ¡Ñotsse attianqquia'caen tsomba injama'choni egae in'jansundeccu qui! A'i atesumbe'yi pa'chombe atu'ttimbe omba'ye tsui jaqquia'caen a'ija que'i egae in'jan'choma atesu'fambi.

⁴⁵ Tsonsi fa'e Chiga Aya'fama atesu'cho Jesúsma su:

—Atesian'su, tsa'caen fariseondeccune condasepa qui ingima'qqe afase.

⁴⁶ Qquen susi Jesúsja su:

—¡Vana'faya qui que'i Chiga Aya'fama atesu'chondeccu! Que'i'qqe osha'cho manda'choi'ccu a'ima vanaen'fa. Tise'pa oshambi'ni'qqe qui fuite'fambi. Ni tive utufa'su tsimian'ccoi'ccuyi'qqe qui fuite'fambi.

⁴⁷ ¡Va'cha'fa qui! Que'i yayandeccu Chiga Aya'fama afasundeccuma fittisi que'i'qqe Chiga Aya'fama afasundeccumbe atu'ttive patui'ccu ñotsse ñoña'fa. ⁴⁸ Tsa'caen tsomba qui que'i yayandeccu'caen fae'ngae ega'fa. Que'i yayandeccu a'ima fi'tti'fasi que'ija ñotssi tsu qqen in'jamba pa'chombe atu'ttive ñoña'fa.

⁴⁹ Chigaja osha'chone in'jamba tayoe su: “Ña aya'fama afasundeccuma ñane condasesundeccuma'qqe gi manda moeña. Tsa'ma aindeccuja majan tsendeccu'suma fi'tti'faya. Majan tsendeccu'suma noñangiamba vanaen'faya.” ⁵⁰ Nane Chiga suqquia'caen a'ija tsa'caen ande agattointe ashaemba Chiga Aya'fama afasundeccuma fittitti'fa. Nane Chigaja tsendeccu shacane'qqe tsu va ja'ño'su aindeccuma iñajaña. ⁵¹ Me'ttia'ye tayopi'su Abelma fi'tti ashaemba fitti'tti canse'fa. Voeyiytsse Zacaríasja Chiga ettini ccutsupa Chiganga oque oraen'jen'cho jin'tti Chiga Aya'fama condase'je. Condase'je'ni tisema fi'tti'fa. Tsa'caen tsomba tsu shacapa'fa. Shacama tsa'caen boñasi tsu Chigaja va ja'ño'su aindeccuma iñajan.

⁵² ¡Vana'faya qui manda'choma atesu'chondeccu! Que'ija tansintssia Chiga Aya'fama atesupa se'pi'fa cca'indeccu paña'sa'ne. Tansintsse su'choma atesu'ma qui tsama chi'ga'fa. Cca'indeccu atesuye in'jan'ninda qui se'pi'fa.

⁵³ Jesús tsene sombojisi Chiga Aya'fama atesiansundeccu, fariseondeccu'qqe iyicca'yepa Jesúsma noñangiamba zutsse iñajansepoen'fa cuintsu

Jesús osha'chone afapa qqueye. ⁵⁴ Ron'da'fa Jesús ccaningae su'chove su'ninda pañamba tise injama'choma somboeñe.

12

Ñotsse attiamba afopoensundeccu

¹ Tsomba tse'i ti'tsse'o a'i bopa tayosi tisupapora tsuicco'fa. Tsa'caen bo'fasi Jesúsja tisema shondo-sundecsuma su:

—Injama'tse. Fariseondeccuja ñotsse attiañe in'jamba afopoemba tsa'caen tson'fa. Injama'tse, tise'pa'caen tsonsa'ne. Nane tise'pa egaja cupana'cco'caen a'tu'cho tsu. ² Osha'cho ja'ño a'tu'chota jai'ngae canjaeña'cho. Ja'ño atesumbi'choa'qqe jai'ngae atesuya'cho. ³ Que'i jongoesuma a'tutsse cose condase'ni'qqe jai'ngae a'ta'nijan poi'cco tsu a'tatsse paña'faya. Que'i tsa'o'su cuarto'ye a'tutsse afa'ni'qqe jai'ngae tsao'cco ombanga ccutsupa fundo'faya.

Majama tsu dyo'faya'cho

(Mt 10.26-31)

⁴ In'jan'chondeccu, ñoa'me gi su dyo'fajama majanda que'i ai'voma fi'ttiye osha. Tsa'caen fi'tti'ma ti'tsse dañeñe oshambi. ⁵ Tsa'ma que'inga gi condaya majama dyo'faya'chove. Chigaja a'ima fi'tti'ta tise canse'pama'qqe si'ngé anchanda'je'chonga catiye osha. Tsa'cansi gi que'ima su: Chigama tsu dyo'faya'cho.

⁶ A'ija chhiririama chavaen'fa. Cinco chhiririama tsu dos reave chavaen'fa. Tsa'ma tsa'caen baratosi toya tsu Chigaja tsesu chhiririave injan'jen. ⁷ Nane Chigaja que tsove'su

tosema agattopa injan'jen. Tsa'cansi dyombe can'faja. Chhiririamama ti'tsse tsu Chigaja que'ima in'jan.

Cristove in'jamba condaya'cho
(Mt 10.32-33; 12.32; 10.19-20)

⁸ Ñoa'me gi que'inga su: Majan ñame in'jamba dyombi'tsse cca'indecunga condase'ninda ccane'qqe ñajan tsane ñotsse afaya. Chiga sefacconi'su shondosundeccu paña'jen'ni gi afaya. ⁹ Tsa'ma majan ñama chi'gapa cca'indecunga ñama a'tie'ninda ccane'qqe ñajan tsa a'ima chi'gapa Chiga sefacconi'su shondosundeccu caña'jen'ni tisema a'tieña.

¹⁰ Poiyi'cco majan Sefaccone Ji'cho A'ima afase'ninda tise tsa'caen egae tsincon'choja joqquitssiqqe'su. Tsa'ma majan Chiga Qquendya'pama afase'ninda ñoa'me tsu tise egae tsincon'choja joqquitssi'masia.

¹¹ Ñame in'jansi que'ima indipa Chigane atesian'jen'ttinga anga'faya cuintsu nasundeccu, joccapitssiandeqquia'qqe que'i injama'choma somboeña. Que'ima tsa'caen iñanjansepoen'fa'ni'qqe dyo'fajama jongoe qqen asi'ttaemba suya'chove tisuma ccushaeña. ¹² Que'i tseni ccutsu'ninda Chiga Qquendya'pa tsu que'ima in'jaeña jongoe qqen suya'chove.

Osha'choma an'biamba qqe'faya'cho

¹³ A'i bo'fa'cho'su fae a'i Jesúsma qqen iñajampaña:

—Atesian'su. Ña quindyá tsu se'pi. Tisema mandaja cuintsu yaya'ye pasi inginga afe'choma ñai'ccu attufaeñe.

¹⁴ Tsa'caen susi Jesúsja tisema su:

—Ccashe'ye, ñajan jimbi gi tsa'caen a'i injama'choma somboeñe ni osha'choma attufaeñe.

¹⁵ Tsomba Jesúsja poiya'cconga su:

—Injama'tse. Faesumbema in'jan'fajama. Osha'choma an'biambi'aqqe toya qui ñotsse canse'faya.

¹⁶ Tsomba Jesús va condase'choma conda:

—Fae a'i osha'choma an'bian. Tise andeja ñotssiasi osha'cho ñotsse sho'yopa na. ¹⁷ Tsa'cansi a'ija asi'ttaemba tisuma su: “¿Ma'caen gi tsoña? Tayo tsu tsa'o on'ba pa'cco ña tai'choma boñamba an'biañe.” ¹⁸ Ti'tsse asi'ttaemba tsu qqwen in'jan: “Qqwen gi tsoña: Ña taipa boña'cho tsa'oma asittapa gi faesu ti'tsse randeve tsao'ñaña. Tsanga gi pa'cco tai'choma an'biamba osha'cho ña an'bian'choma'qqe coiraya. ¹⁹ Tsa'caen tsomba gi tisu injama'choni asi'ttaemba tisuma qqwen suya: ‘Ñoa'me osha'choma an'biamba gi bo'tssingae ñotsse canseya. Semambe'yi gi canseya. An'jemba, cui'jepa avujatsse gi canseya.’” ²⁰ Tsa'ma Chiga Quitsaja tisema su: “¡Injamambil! Ja'ño cose qui paya. Que osha'choma boñamba an'bian'choja, ja'ño ¿majambe tsu?” ²¹ Tsa'caen tsu daya poiya'cco a'i majan Chiga in'jan'choma in'jambipa tisupa in'jan'choma boña'da.

*Chiga tisebema ñotsse coira'je'cho
(Mt 6.25-34)*

22 Tsomba Jesúsja tisema shondosundecsuma su:

—Tsa'cansi gi que'ima su: Que'i vani canse'chone panshaen asi'ttaen'fajama. Que'i anqqe'sune panshaen asi'ttaen'fajama. Que'i ai'voni jinqque'su sarupave'qqe jongoesuma ondiccuye panshaen asi'ttaen'fajama. ²³ Ingi canse'cho tsu ingi anqqe'suma ti'tsse'tssia. Ingi ai'vo tsu ingi ondiccu'je'choma ti'tsse'tssia. ²⁴ Pindoma canjan. Tsendeccuja jon'fambi ni tai'fambi. Ni taipa boña'je'cho tsa'ove an'bian'fambi. Tsa'ma Chiga Quitsa tsu tise'pama ofian'jen. Que'i qui ñoa'me pindoma ti'tsse joccapitssia. ²⁵ Toya'caen ¿majan qui que'i'suja in'jamba fae a'ta ti'tsse canseye'ta oshaya? Ñoa'me qui oshambi. ²⁶ Tsa'caen que'ija va re'riccoa'ma oshambi'ta ¿ma'caen qui osha'chone panshaen asi'ttaen'fa?

²⁷ Ñotssia te'tama can'faja. Aqquia tsu sho'yopa te'ta. Semambi ni tise'pa ondiccu'jema anchombi. Tsa'ma ¿majan tsu tisia'caen ondiccucho? Nane ti'tsse'tssia na'su Salomón'qqe tisia'caen ñotsse ondiccu'chombi. ²⁸ Shoshovija ja'ño injanga sho'yopa cansesi tu'i a'ija tsama taipa panme matssañe oque'faya. Tsa'ma Chiga Quitsaja tsa'caen te'tai'ccu shoshovima ñotsse ondiqquiamba ti'tsse tsu que'imajan ondiqquiamba coira'je. ¿Micomba qui in'jambe canse'fa? ²⁹ Panshaen asi'ttaen'fajama. Que'i anqqe'suve, que'i cuiqqe'suve ttatta'fajama. ³⁰ Poi ande'su aindecu tsu tsa'caen in'jamba canse'fa. Tsa'ma Chiga que'i Quitsaja tayo tsu in'jan que'i osha'chove in'jamba shaca'choma.

31 Bove ñotssi tsu Chigave in'jamba Tise in'jan'chove tta'ttaye. Tsa'caen cansesi tsu Chigaja que'ine osha'cho ñotssiave ñoñaña.

Sefacconi an'biaña'cho
(Mt 6.19-21)

32 Que'i qui ña in'jan'cho ovejandeccu. Re'ricco'fa qui. Tsa'ma dyombe can'faja. Chiga que'i Quitsave in'jamba Tise in'jan'chove tta'ttasi tsu Tiseja que'ima na'suve tsoña. 33 Que'i vani an'bian'choma chavaen'faja mendeqquianga afeye. Tsa'caen afepa qui Chiga sefacconi osha'cho ñotssiana boña'faya. Tseni an'bian'choja mingui'te'qqe sefaya'bi ni tssoruve daya'bi. Ccanamba'qqe cca'nañe oshambi ni shipicco añe oshambi. 34 Mani que'i an'bian'choma coira'je'ta tsenima qui ti'tsse injan'jen'fa.

Ñoñamba ronda'jeya'cho

35 Ondiccupa que'i tuñoma setsaemba ronda'je'faja. 36 A'i tise na'suve ronda'je'qquia'caen canse'faja. Nane tise'pa na'su casara'je'cho fiestane jipa sombo'ttima tssai jeña'nijan junde fettaye ronda'je'faya'cho. 37 Majan semasundeccuja tise'pa na'su ji'je'ni toya anambi'ta ñoa'me tsu avujatssi'faya. Ñoa'me gi su tsama atepa tsu na'suja mandaya cuintsu an'jen'cho mesanga dyai'faye. Tsomba na'suja osha'choma ñoñamba tise'be semasundecunga o'fiaña. 38 Nane enttinge cose tsambi'ta a'taningae na'su jipa tsa'caen ronda'je'choma atte'ninda ñoa'me tsu tsa semasundeccuja avujatssi'faya. 39 Toya'caen vama paña'faja: Tsa'o na'suja

ccanamba jiya'chove atesuchoecan'da tsu tayo bittapa tise tsa'oma coiraye'can ccanamba ca'nisa'ne. ⁴⁰ Que'i'qqe ñoñamba ron'da'faya'cho. Atesu'fambi qui maqui Sefaccone Ji'cho A'i ccase jiya'choma. Que'i in'jambi'te gi ñajan jiya.

Semasundeccu ma'caen tson'faya'cho
(Mt 24.45-51)

⁴¹ Tsa'caen susi Pedroja Jesúsma ñajampaña:

—Na'su, ¿ingingayi ti qui va condase'choma condase? Tsambi'ta ¿poi'ccong ti qui condase?

⁴² Tsonsi Na'suja su:

—A'ija ñotsse in'jan'chopa na'su in'jan'qquia'caen tso'ninda tsama na'suja ti'tsse in'jan. Nane na'suja biani jaye tson'jemba tsanga manda antte cuintsu tise tsa'oma semasundeccuma coirapa poi a'ta tise'pama ofian'jeñe. ⁴³ Tsomba na'su jai'ngae toequi jisi tsa sema'su, na'su mandaqquia'caen tso'ninda ñoa'me avujatssi tsu. ⁴⁴ Ñoa'me gi su, na'su jipa pa'cco tise an'bian'choma tsu tsa sema'sunga afeya cuintsu coiraye. ⁴⁵ Tsa'ma majan sema'su: “Ña na'suja uta jiya'bi” qquen in'jamba tsa sema'su faesu semasundeccuma tssaiye ashaemba majan tsandie, majan pushesuma'qqe tsse'tsse tsincomba toya'caen an'jemba tse'tse'pama cu'ipa ccusi'ninda ⁴⁶ tsa sema'su in'jambi'te tsu na'suja jiya. Na'su jipa tsu tsa sema'suma ma'ppipa in'jambindeccu'ccu fae'ngae tisema catiya.

⁴⁷ Majan sema'su na'su in'jan'choma atesu'ma ñoñambipa tsa'caen tsombian'da ñoa'me tsu na'su tisema quia'me ma'ppiya. ⁴⁸ Tsa'ma majan sema'su na'su in'jan'choma atesumbipa tsa'caen

ñotsse tsombian'da re'riccoe tsu tisema ma'ppiya. Nane poiye'cco majan ti'tsse isu'ta ti'tsse tsu tsoña'cho. A'ija majanga ti'tsse afe'ta ti'tsse tsu tsendeccune in'jan'faya.

Jesúsve in'jamba attufacco'fa'cho
(Mt 10.34-36)

⁴⁹ Ñajan va andeni ji si'ngema setsaeñe. Ñoa'me tayo anchanda'je'ma'caen gi in'jan. ⁵⁰ Ñajan fetiyeqquia'caen vanaña'cho. Toya tsa'caen fetiyembipa gi injama'choni ñoa'me vana'jen. Tsa'caen gi vanaña'cho tsa feti'cho naniña'gae. ⁵¹ ¿Jongoesu qqen qui asi'ttaemba in'jan'fa? ¿Ñanda ti gi va andeni ji cuintsu poiye'cco a'i opatsse canse'faye? Me'i. Ñoa'me gi su, ñajan ji a'ima iyiccoeñe. ⁵² Ja'ño tsu fae tsa'o'su ñoa'me iyicco'faya'cho. Tres ñame in'jansi dos ñama chi'ga'faya. Tsambi'ta dos ñame in'jansi tres tsu ñama chi'ga'faya. ⁵³ Yaya tsu tise dutssi'yema iyicca'yeya. Dutssi'ye'qqe tise yayama iyicca'yeya. Chanjan tise onque'ngema iyicca'yesi onquenge'qqe tise mamama ccane'qqe iyicca'yeya. Chan ccashe tise chinama iyicca'yesi china'qqe ccane'qqe chan ccashema iyicca'yeya.

Jai'ngae tsoña'chove canjaen'cho
(Mt 16.1-4; Mr 8.11-13)

⁵⁴ Toya'caen tsu Jesúsja a'i bo'fa'chonga su:
—Que'ija chiga amppije'ni unjimba jinchoma attepa qui: “Unjin tuiye tson'jen” qqen su'fa. Qqen su'fa'nijan tsa'caen tsu tui. ⁵⁵ Neguev andefae fingian jisi que'ija su'fa: “Ñoa'me coe'jeye

ts'on'jen.” Qquen susi tsa'caen tsu coe'je. ⁵⁶ Ñotsse in'janqquia'caen supa aqquia afoposundeccu qui. Que'ija sefacoma cambia qui osha'choma tsa'caen atesu'fa. Tsa'ma ña ja'ño tsoña'choma atte'ma qui atesu'fambi.

Tisuma iyiccaye'suma ñoquiaña'cho
(Mt 5.25-26)

⁵⁷ ¿Micomba qui injama'choni asi'ttaen'fambi ñotsse tsoña'chove in'jañe? ⁵⁸ Nane a'i quema iyicca'yepa na'sunga angaji'ninda toya na'sunga napimbi'teyi tsu tise ma ñoquiaña'cho. Ñoquiambian'da na'su tsu capitáma mandaya cuintsu que'ima indiye. Capitán tsu picco'je'cho ettinga que'ima piccoya. ⁵⁹ Ñoa'me gi su, tseni picco'ninda pa'ccoma nane reama'qqe tsu afepoeña'cho tisu somboye.

13

Egae tsincon'choma chi'ga'faya'cho

¹ Tsequi a'ta majan a'i Jesúsnga jipa condase'fa ma'caen ande na'su governoror Pilato Galilea aindecuma fi'tti'choma. Tsa aindecuja Chigama ñajañe tise'pa afe'cho ovejama ipa fi'tti'fa. Oveja anjampa tssain jasi pa'fasi Pilatoja sundarondecuma mandasi tsa aindecuma fi'tti'fa. Fi'tti'fasi tise'pa anjampa'qqe oveja anjampai'ccu echoen fae'ngae tssain ja. ² Jesúsja pañamba su:

—¿Jongoesu qqen qui asi'ttaen'fa? ¿Va Galileasundecuta ti cca'i Galileasundecuma ti'tsse egae tsincon'fa? ¿Tsa'camba ti tsa'caen vaná'fa? ³ Me'i. Tsa'ma que'i'qqe que'i egae tsincon'choma chi'gapa ántteya'cho

tsendeqquia'caen pasa'ne. ⁴ Toya'caen voeyi tsu Siloé'su se'fatssia tsa'o osuipa amppisi diez y ocho a'i pa'fa. ¿Tsendeccuta ti poiyi'cco Jerusalensundeccuma ti'tsse shacapa'fa? ⁵ Me'i. Tsa'ma que'i egae tsincon'choma chi'gapa ánttembi'ta que'i'qqe qui tsa'caen pa'faya.

Higuera tetachojine condase'cho

⁶ Tsomba Jesúsja va condase'choma conda:

—A'ija higuera teta'choma tise ovaccuni jon. Tise naite na'suja jipa name tta'tta'ma attembi. ⁷ Tsomba ovaccuma coira'sunga su: “Tres canqqe'fave gi jipa name tta'tta'ma attembi. Ttuttu catija. Ño'a andenga najema'can qui aqquia aten'jeña.” ⁸ Tsa'ma coira'suja su: “Na'su, cuintsu ttuttumbe'yi va canqqe'fama ronda'jeja. Ñajan va quini'cco setsa'cho'su andema vuviamba vaura ccopai'ccu echhochhoeña. ⁹ Tsonsi faesu naite na'ninda tsu ñotssi. Tsa'ma nambian'da ttuttu catiya'cho.”

Sema'ma'qquia a'ta ccushaen'cho

¹⁰ Fae sema'ma'qquia a'ta Jesúsja Chigane atesian'jen'ttinga japa atesian'jen. ¹¹ Tse'tti pushesu paji'su can'jen. Diez y ocho canqqe'fave cocoya tisenga ca'nisi puntssan antteyepa tansintsse ccutsuye oshambi. ¹² Jesúsja tisema attepa ttu'sepa su:

—Pushesu, tayo qui ccusha que paji'choma.

¹³ Qquen supa tise tivei'ccu pushesuma ppo-raen. Tse'faei'ccuyi tise ai'vo tansinsi pushe-suja Chigama ñotsse afa. ¹⁴ Tsa'ma Chigane atesian'jen'tti'su na'suja Jesús sema'ma'qquia a'ta ccushaensi iyicca'yepa a'inga su:

—Seis a'ta tsu semaña'choja. Tsesu a'tayi tsu jipa ccushaengeya'cho. Tsa'ma sema'ma'qquia a'taja ji'masia.

¹⁵ Tsonsi Na'su Jesús su:

—Que'ija ñotsse attianqquia'caen supa aqquia afopoensundeccu qui. ¿Majan que'i'su qui sema'ma'qquia a'ta tisupa vaurama tisupa boroma'qqe ccupa'fambi naini angapa cui'ñañe? ¹⁶ Tsa'candeqquia'ta ¿ma'caen qui cocoya na'su Satana va pushesuma diez y ocho canqque'fave noñangiansi sema'ma'qquia a'ta ña ccupaqquia'caen ccushaen'ninda se'pi'fa? Nane tise'qqe tayopi'su Abraham aindecumbe onque'nge tsu.

¹⁷ Jesús tsa'caen susi poi'yi'cco tisema iyiccayesundeccu ansange'fa. Poi'yi'cco a'i Jesús ñotsse tson'choma atepa ñoa'me avujatssi'fa.

Mostasa chone condase'cho
(Mt 13.31-32; Mr 4.30-32)

¹⁸ Tsa'caen tsonsi Jesúsja su:

—A'ija Chiga aindecuve dapa ti'tsse tsu atapa'faya. Tsane condaseye in'jan'ma ¿jongoesui'ccu gi condaseya? ¹⁹ Ñoa'me tsu a'i Chiga aindecuve da'faya'cho chipiri mostasa cho'can'chocco. A'ija mostasa choma tise nasipanga jonsi sho'yopa quini'jime dasi chhajeqqe'su chhiriria jipa ttembanga tsao'paen'fa.

Cupana'ccone condase'cho
(Mt 13.33)

²⁰ Toya'caen Jesúsja su:

—Ma'caen a'i Chiga aindecuve dapa ti'tsse atapa'faya'chone condaseye in'jan'ma ¿jongoesui'ccu

gi condaseya? ²¹ Nane cupana'ccoac'a'on tsu. Pushesu panme ñoñaqqe'su tres agatto'chonga cupoensi coemba pa'ccoma atapoen.

Ta'yoquiccoa sombo'tti
(Mt 7.13-14, 21-23)

²² Tsomba Jesús rande canqqe, chipiri canqqe'ye jacamba a'ima atesian'jen. Tsa'caen jacamba Jerusaléni napisi ²³ fae a'i tisema iñajampaña:

—Na'su, ¿re'ricco a'i ti ccusha'faya?

Jesúsja tisema su:

²⁴ Ta'yoquicco tsu Chiga sefacconi ca'niña'choja. Tsa'ma tsangae ca'nicanjan. Nane tsain'bio a'i ca'niñe in'jan'ma osha'faya'bi. ²⁵ Tsa'o na'su tayo jangipa sombo'ttima piccosi qui que'ija tsotefanga ccutsupa tssai jeñañe ashaen'faya qqen supa: “Na'su, sombo'ttima fettaja ingi ca'niñe.” Tsa'ma tiseja que'ima suya: “Ñanda gi que'ima atesumbi. Ni mane ji'chove'qqe gi atesumbi.”

²⁶ Tsonsi qui qqen su'faya: “Tsa'ma fae'ngae quei'ccu an'jemba gi cu'i'fa. Queja ingi tsaiquini japa atesian.” ²⁷ Tsa'ma tiseja suya: “Ñoa'me gi su: Ñajan que'i mane ji'chove atesumbi. Que'i egae tsinconsundeccuja, ña'ñe joqquitssi'faja.”

²⁸ Abrahamma qui atte'faya. Isaac, Jacob, nane poi'i'cco Chiga Aya'fama afasundeccuma'qqe qui atte'faya. Tsendeccu Chigai'ccu can'jensi que'ija tsotefanga joqquitssiangepa qui i'na'faya. Ñoa'me ttun'dundu'jeve iyicca'yepa qui i'na'faya.

²⁹ Nane poi andene tsu a'ija jipa bo'faya Chigai'ccu an dyaiye. ³⁰ ¡Que canjan! Majan ja'ño utu'ccoata

ti'tsse'tssia've tsu da'faya. Tsa'ma majan ja'ño ti'tsse'tssia'ta utu'ccoave tsu da'faya.

Jesús Jerusalénma attepa i'na'cho

(Mt 23.37-39)

³¹ Toya Jesús tsa'caen atesian'jen'ni majan fariseondeccu jipa tisema su'fa:

—Va'ttieja junde jaja. Ande na'su Herodes tsu quema fi'ttiye in'jan.

³² Jesúsja pañamba tise'pama su:

—Herodesja afopoen'su tsu. Japa tisenga qqwen su'faja: “¡Que canjan! Ñajan ja'ño a'ta, tu'i'qqe coyama joqquitssiamba a'ima ccushaen'jeña'cho. Tui've gi naniña.” ³³ Tsa'ma que'inga gi su: Ja'ño a'ta, tu'i, tui've'qqe gi dyombi'tsse jacaña'cho. Nane Chiga Aya'fama afa'su Jerusaléni can'jembian'da ¿ma'caen tsu tisema fi'tti'faya?

³⁴ Jerusalén, Jerusalensundeccu, Chiga Aya'fama afasundeccuma qui fi'tti'fa. Chigaja majama que'inga moensi atesiansi qui patui'ccu fi'tti'fa. Tsain'bitsse gi in'jan que'ima coiraye. Nane arapa chan tise du'shuma sancopai'ccu piccopa coiraqquia'caen gi que'ima coiraye in'jan. Tsa'ma que'ija in'jan'fambi. ³⁵ ¡Que canjan! Chigaja que'i can'jen'ttima tsu catiya. Ñoa'me gi su, Ccatsse qui ñama atte'faya'bi que'i ñama qqwen suya'ngae: “Ñoa'me ñotssia tsu Na'su Chiga moensi ji'cho.”

14

Ttun'dundu'je'e dapa paji'cho

¹ Fae sema'ma'qquia a'ta Jesúsja fariseo in'jan'cho na'sumbe tsaoni a'ne ja. Cca'i

fariseondeccu Jesúsma cambia ronda'je'fa egae afaye. ² Toya'caen tsa tsaoni tsu can'jen a'i ttun'dundu'je'e dapa paji'cho. ³ Jesúsja Chiga Aya'fama atesu'chondeccuma, fariseondeccuma'qqque su:

—¿Chiga manda'chota ti se'pi sema'ma'qqquia a'ta a'ima ccushaeñe'ja? Tsambi'ta ¿se'pimbi ti?

⁴ Tsa'ma tisema pañasundeccuja ziyapa afa'fambi. Tsonsi Jesúsja paji'choma pporaemba tisema ccushaen. Ccushaemba tisema manda mañamba ⁵ fariseondeccuma su:

—¿Majan que'i'su qui tisupa vaura, tisupa boro tsa'ccu posonga amppi ca'ni'ninda junde somboen'fambi? Nane ¿sema'ma'qqquia a'ta'qqque ti qui somboen'fambi?

⁶ Tsa'caen susi paña'ma jongoesu qqquen suye osha'fambi.

Casara'cho fiestane condase'cho

⁷ Añe ttu'sesi ji'chondeccuja bopa poi'cco tsu ttatta'fa ti'tsse joccapitssia dyaini dyaipa añe. Tsama atepa Jesúsja va condase'choma tise'panga conda:

⁸ —A'i casara'cho fiestanga que'ima ttu'sesi ja'ta ti'tsse joccapitssia dyaipa'chonga dyaijama. Tsa'caen dyai'ninda faesu que'ima ti'tsse joccapitssia jisi ⁹ ttuse'suja queni jipa condaya: “Joqquitssija cuintsu va a'i dyaiye.” Tsonsi qui ansangepa utu'cco dyaipa'chonga dyaiya.

¹⁰ Tsa'ma ttuseyepa ja'ta utu'cco dyaipa'chonga dyaija cuintsu ttuse'su jipa quenga suye: “In'jan'cho, bove ñotssianga dyaija.” Tsonsi tsu fae'ngae mesani dyaisundeccu atepa quene ñotsse afa'faya. ¹¹ Poi'cco majan patsuye

in'jan'da utu'ccoe tsu da'faya. Tsa'ma poiyi'cco majan patsuye in'jambi'ta ti'tsse joccapitssia've tsu da'faya.

¹² Tsomba Jesúsja tise ma ttuse'suma qquen su:

—Queja fiestaemba a'ima o'fiañe in'jan'da que in'jan'chondecuve'yi ni que antiandecuve'yi ni pporotsse canjen'su ricondecuveyi ttu'sejama. Tsendecuja tise'pa fiestani ccane'qqe quema ttu'sepa afepoeñe osha'faya. ¹³ Tsa'ma fiestaen'jen'da va'chandecuma ttu'seja. Toya'caen dañonge'chondecu, ccareshendeccu, binindecuma'qqe ttu'seja. ¹⁴ Tsendecuja ccane'qqe quenga afepoeñe oshambisi qui ñoa'me avujatssi'faya. Toya'caen Chigaja ño'andecuma ccase qquendyaemba que'inga'qqe ñotsse afepoeña.

Na'su fiestane condase'cho

(Mt 22.1-10)

¹⁵ Tsama pañamba fae a'i mesani an dyai'su Jesúsma su:

—Majan a'i Chiga aindecuve dapa tseni'su an-qqe'suma an'jen'da ñoa'me avujatssiya'cho tsu.

¹⁶ Tsa'ma Jesúsja tise ma su:

—A'ija tayoe rande fiestave fiestaemba tsain'bio a'ima ttu'se. ¹⁷ Fiesta pan napijisi tise ma shondo'suma manda cuintsu ttuseye'chondecuma qquen conda'ngaye: “Tayo tsu ñoña osha'choma. Junde ji'faja.”

¹⁸ Tsa'ma ttuseye'chondecuja pañamba poiyi'cco ccaningae tsoña'chove condaseye ashaen'fa. Fa'eja tise ma su: “Ñajan jiye oshambi. Nasipama chavapa gi can'su jayi. Chigáne ñama anttéja ña

jimbecañe.” ¹⁹ Faesuja su: “Diez sema'jen'cho vaurama chavapa gi jayi tise'pama semoencañe. Chigáne ñama anttéja ña jimbecañe.” ²⁰ Cca'ija su: “Voeyi pushepa gi jiye oshambi.” ²¹ Tsa'caen su'fasi na'suma shondo'suja jipa na'sunga conda. Tsonsi tsa'o na'suja iyicca'yepa tisema shondo'suma su: “Canqqueni japa poi tsaiquima tta'ttapa va'chandeccu, dañonge'chondeccu, binindeccu, ccareshendeccuma'qqe ttu'sepa ija.” ²² Shondo'suja tsa'caen tsomba su: “Na'su, que suqquia'caen tso'ma toya on'bambi tsu que tsa'o.” ²³ Tsonsi na'suja shondo'suma manda: “Jocani'su tsaiquina, nasipanga'qqe japa majama cachui'ta ttu'seja cuintsu a'i bosí ña tsa'o on'baye. ²⁴ Ñoa'me tsu o'tie ttuseye'chondeccuja ña aña'choma an'faya'bi.”

Cca'ima catipa Jesúsveyi in'jaña'cho
(Mt 10.37-38)

²⁵ Ñoa'me tsain'bio a'i Jesús'ccu jacan'fasi tiseja piyicamba tsendeccuma su:

²⁶ —Majan a'i ñani ji'ta cca'ima tsu chi'ga'faya'cho. Nane tisu yaya, tisu mama, tisu pushe, du'shu, quindyandeccu, quinshingendeccu, shesheyendeccu, quetteyendeccu, nane tisuma'qqe chi'gambi'ta ñoa'me ñama shondo'suve daye oshambi. ²⁷ Majan ña'caen vanañe tise avuja'ccoma opi angambi'ta ñama shondo'suve daye oshambi. ²⁸ Majan que'i'suja se'fatssia tsa'ove tsao'ñañe in'jan'da o'tie tsu dyaipa bare'choma agattoya'cho naniñe'me'se qqen atesuye. ²⁹ Tsambi'ta dyaiña'choma dyaiñamba ti'tsse tsao'ñamba naniñe oshambian'da

poiyo'cco a'i tsu can'boemba ³⁰ su'faya: “Tsaja tsa'ove tsa'oñañe ashae'ma naniñe oshambi.”
³¹ Toya'caen majan ande na'su faesu na'sui'ccu geraeñe tson'jen'da o'tie tsu dyaipa asi'ttaeña'cho. Tisema fuitesundeccui'ccu condasecco'faya'cho atesuye tise'paja diez mil sundarondeccui'ccu faesu na'su veinte mil sundarondeccuma patsuve'se. ³² Asi'ttaemba oshambi qqen in'jan'da faesu na'su toya catsembi'te tsu aindeccuma moeña'cho tisema ñoquiañe cuintsu antte'faye. ³³ Tsa'cansi que'i'qqe majan tsumbe osha'choma chi'gambi'ta ñama shondo'suve daye osha'fambi qui.

Ega ansine condase'cho

(Mt 5.13; Mr 9.50)

³⁴ Patu ansinjan ñotssi tsu. Tsa'ma patu ansi'ñe ansin tssutssu catiye'ninda ¿ma'caen tsu ccase ansinpave daya? ³⁵ Ñoa'me barembi tsu. Andema tsu daño'jen. Ni vaura ccopa'caen andema fuitembi. Injanga tsu catiya'cho. Majan tsosinapa'ta ñotsse paña'faja.

15

Oveja qqe'chone condase'cho

(Mt 18.10-14)

¹ Gobierno impuestoma isusundeccu, poiyo'cco egae tsinconsundeccu'qqe Jesúsnga catse'fa pañañe. ² Tsonsi fariseondeccu, Chiga Tevaen'jema atesu'chondeccu'qqe Jesúsma qqen afase'fa:

—Va a'ija egae tsinconsundeccuma in'jamba tise'pai'ccu fae'ngae an'jen.

³ Jesúsja tsama pañamba va condase'choma conda:

⁴ —Majan que'isu cien ovejave an'biamba fae'ccoe qqueña'da noventa y nuevema toeni a'i menia ántteya'cho tsa qque'choveyi tta'ttaye. Nane atteya'ngae tta'ttaya'cho.

⁵ Attepa andu'ta avujatsse shanda. ⁶ Tsaoni napipa tise amigondecu, tise'ccu porotsse can'jendecuma'qqe ttu'sepa tsu su: “Ñai'ccu fae'ngae avujatssi'faja. Tayo gi atte oveja qque'choma.” ⁷ Ñoa'me gi su tsa'caen tsu Chiga sefacconi. Nane noventa y nueve ño'andeccu egae tsincon'chove mecho'fasi Chiga sefacconisundeccu tise'pai'ccu avujatssipa fae'cco egae tsincon'su tise egae tsincon'choma chi'gapa ante'ninda ti'tsse tsu avujatssi'fa.

Corifin'di qque'chone condase'cho

⁸ Toya'caen majan pushesu diez totoa corima ñoña'cho corifin'dive an'biamba fae'ccoe qqueña'da tuñoma setsaemba pa'cco tsa'oma fundu'ndu tta'ttaya atteya'ngae.

⁹ Atte'ta tsu amigondecuma, pporotsse can'jensundecuma'qqe ttu'sepa qqen suya: “Ñai'ccu avujatssi'faja. Tayo gi atte ña corifin'di qque'choma.” ¹⁰ Tsa'cansi gi su, fae egae tsincon'su tise egae tsincon'choma chi'gapa ante'ninda Chiga sefacconi'su shondosundecuja avujatssi'faya.

Dutssi'ye qque'chone condase'cho

¹¹ Tsomba Jesúsja su:

—A'ija dos dutssi'yeye an'bian. ¹² Chu'a tsu tise yayama su: “Yaya, junde ñanga afeja que pasi ña

jai'ngae isuya'choma.” Yayaja “Ju” qqwen supa tsa'caen tise osha'choma dutssiyendecunga attufaen. ¹³ Tise yayai'ccu can'jencambeyi tsu chu'aja pa'cco tise isu'choi'ccu biani'su andenga ja. Tseni can'jemba in'jangae cansepa tisu an'bian'choma injanga catiti. ¹⁴ Pa'cco corifin'dima catiti sefaensi tsa andeni ñoa'me egae qqipoesuite tsu napi. Tsa'cansi tise'qqe añ'a'cho mechoe dapa qqipoesupa ¹⁵ japa tsa ande'su a'imbe sema'suve da. Tsa a'ija tisema manda moen cuintsu tise cochima coirapa ofian'jeñe. ¹⁶ Qquipoesupa ñoa'me cochi anqqe'su teta'cho ttonoma añe ñombi'ye. Tsa'ma majan ni fae teta'choveyi'qqe tisenga afembi. ¹⁷ Tsonsi chu'aja injama'choni tisuma in'jamba su: “Poiyi'cco ña yayambe semasundeccuja ttepupa tsu can'jen'fa. Nane an antteye'choma'qqe acquia cati'je'fa. Tsa'ma ñajan vani ti'tsse can'jen'da qqipoesupa paya. ¹⁸ Ja'ño gi ña yayani jaya. Napi'ta gi tisema suya: ‘Yaya, ñajan egae tsincomba gi Chigama egae tsomba quema'qqe egae tson. ¹⁹ Barembi gi que “Ña dutssi'ye” qqwen ñama afaye. Ñama mendeye'ta quembe sema'sia'caen ñama an'bianjan.’ ” ²⁰ Tsa'caen asi'ttaemba jangipa tise yayani ja.

Tsa'ma toya tise catsembi'te tise yayaja bianima attepa mende'yepa buttoin jipa cachuipa musimba mocha. ²¹ Tsonsi dutssi'yeja su: “Yaya, ñajan egae tsincomba gi Chigama egae tsomba quema'qqe egae tson. Barembi gi que ‘Ña dutssi'ye’ qqwen ñama afaye...” ²² Tsa'ma yayaja tisema shondosundecuma su: “Ñotssia

ondiccu'jema i'ngapa tisema ondiqquan'faja. Tise tivenga sotijama ejian'faja. Sapatoma'qqe tandan'faja tise tsu'ttenga. ²³ Yayapatssia vaura du'shuma fi'ttipa sho'cco'en'faja. Jinge avujatsse an'faye. ²⁴ Va ña dutssi'ye pa'cho'ye qquendyaqquia'caen tsu canse. Tsangae nepi'choma gi atte'fa.” Qquen susi poi'yi'cco avujaye ashaen'fa.

²⁵ Tsa'caen tson'jen'ni quindyaja nasipani sema'jemba jiñamba tsa'onga catsepa settapoen'jen'choma paña. Boira'je'choma'qqe pañamba ²⁶ sema'suma ttu'sepa tsane iñajampaña. ²⁷ Sema'suja tisenga su: “Tayo tsu que quinshinjan ji. Pambe'yi jisi que yayaja avujapa yayapatssia vaura du'shuma fi'ttipa shoccoen'jen avujatsse añe.” ²⁸ Tsa'ma quindyaja iyicca'yepa tsa'onga ca'niñe chi'gapa tsotefani ccutsu. Tsonsi tise yayaja sombopa tisema ca'nian qquen tson. ²⁹ Tsa'ma tiseja tise yayama su: “Tsain'bio canqqe'fa gi quema shondopa sema'jen. Que manda'nijan tsa'caeñi gi tson'jen. Tsa'ma ni fae chivo du'shuvayi'qqe qui ñanga afembi ña amigondeccui'ccu fiestañe. ³⁰ Tsa'ma va que dutssi'ye tayo que corifin'dima in'jangae pushesundeccui'ccu injanga catitipa jisi ja'ñojan tisene qui yayapatssia vaura du'shuma fi'ttipa shoccoen'jen.” ³¹ Tsama pañamba yayaja su: “Ña dutssi'ye, queja tsangae ñai'ccu can'jensi osha'cho ña an'bian'cho tsu quembe'yi. ³² Tsa'ma ja'ñojan ñotssi tsu ingi avujaye. Que quinshinjan tayo paqquia'can tsu ja'ñojan canse. Tsangae nepi'choma gi ccase atte'fa.”

16

Ega shondo'sune condase'cho

¹ Toya'caen Jesúsja tisema shondosundecuma su:

—Ricoja can'jen. Tsambe shondo'suja tise an'bian'choma coira'je. Tsa'ma shondo'su osha'choma ñotsse coirambisi cca'indeccuja na'sunga conda'fa. ² Tsama pañamba na'suja shondo'suma ttu'sepa iñajampaña: “¿Jongoesu tsu va ña quene paña'jen'choja? Pa'cco que chavapa chavaen'choma tevaenjan ña atteye. Tsa'ma queja ti'tsse ña corifin'dima coira'suve can'jeñambi qui.” ³ Na'su tsa'caen susi shondo'suja tisuma su: “Ña na'su ñama joqquitssia'ninda ¿jongoesuma gi tsoña? Quin'ambi gi matichi'ccu semañe. Injanga corifin'dima iñajañe'qqe gi ansange.” ⁴ Tsa'caen asi'ttaemba in'jamba su: “Unjun, tayo gi in'jan jongoesuma ña tsonsi cca'indeccu ñame in'jamba amigoen'faya'choma. Tsonsi na'su ñama joqquitssia'ninda gi tsendecumbe tsaoni can'jeña.” ⁵ Tsa'caen in'jamba fae'cco fae'ccoveyi tise na'suma shacaendecuma ttu'se. Fa'e jisi tisema iñajampaña: “¿Min'getsse qui shacaen ña na'suma?” ⁶ Tiseja su: “Yayapa cien rata randeve gi shacaen.” Shondo'suja tisema su: “Que tevaen'jema isupa junde cuname tevaenjan cincuenta rataveyi.” ⁷ Tsomba faesu shacaen'suma su: “¿Queja mi'getsse qui shacaen?” Tiseja su: “Cien saparo trigove gi shacaen.” Shondo'suja tisema manda: “Que tevaen'jema isupa junde cuname tevaenjan ochenta saparoveyi.” ⁸ Ega

shondo'su tsa'caen shacama andiansi tise na'suja pañamba asi'ttaemba iyicca'yembe'yi tisema ñotsse afa. Ñoa'me tsu va ande'su aindeccuja ma'caen tisupanaccu canseya'chove ñotsse in'jan'fa. Tsa'ma Chiga aindeccuja toya tsa'caen tisupanaccu caseya'chove in'jan'fambi.

⁹ Ñoa'me gi que'inga su: Corifin'dija ega na'su tsu. Tsa'ma ñotsse in'jamba que'i corifin'di'ccu cca'indeccuma fuite'faja corifin'di sefasi sefacconi osha'choma ñotsse an'biamba tsangae Chigai'ccu canseya.

¹⁰ Majan a'i re'riccoama ñotsse coirapa an'bian'da ti'tsse'tssiama'qqe tsu ñotsse coirapa an'biaña. Tsa'ma majan re'riccoama ñotsse coirambi'ta ti'tsse'tssiama'qqe ñotsse coirambipa cca'naña. ¹¹ Que'i va andeni jinchoma ñotsse coirambian'da ¿majan tsu ñoa'me ñotssiama que'inga afeya? ¹² Que'i cca'imbema ñotsse coirambian'da ¿majan tsu ñoa'me que'imbetssiama que'inga afeya?

¹³ Ni majan sema'suyi'qqe dos na'suma shondoye oshambi. Nane fa'ema chi'gapa tsu faesuma in'jaña. Tsambi'ta fa'ema ñotsse in'jamba tsu faesuma chi'gaya. Chigama, que'i corifin'dima'qqe fae'ngatsse in'jañe osha'fambi qui.

¹⁴ Fariseondeccuja tsain'bitssi corifin'dive in'jañe atesuchopa Jesús su'choma pañamba tisema feña'jen'fa. ¹⁵ Tsa'ma Jesúsja tise'pama su:

—Que'i afopoensi aindeccuja que'ija ñotssi qqquen in'jan'fa. Tsa'ma Chiga Quitsaja que'i injama'choma ñotsse atesu. Nane a'i jongoesuve

asi'ttaemba ti'tsse'tssi tsu qqwen in'jan'ninda Chigaja tsama chi'ga.

Chiga Manda'choja pasaya'bi

¹⁶ Chiga manda'cho, Chiga Aya'fa afasundeccu tevaen'jen'qqe ingima tayoe atesian. Tsa'ma Juan jipa ma'caen Chiga aindeccuve dapa canseya'chone ñotsse condase'choma candusiañe ashaen. Ja'ño tsain'bio a'i pañamba quia'me in'jan'fa Chiga aindeccuve daye. ¹⁷ Tsa'ma Chiga manda'choja pasaya'bi. Ni fae tevaen'ttiyi'qqe pasaya'bi. Nane bove aiye'pambicco tsu sefacco, ande pasa'faya'cho. Tsa'ma Chiga manda'choja pasaya'bi.

*Pushema cati'chone Jesús atesian
(Mt 19.1-12; Mr 10.1-12)*

¹⁸ Poiyi'cco majan tise pushema catipa faesu pushesuma pushe'ta ñoa'me tsu egae tsincomba canse. Toya'caen tsa'caen tise pushema catisi majan tsa pushesuma pushe'ta tsa'qqe egae tsincomba canse.

Lázaro, rico'qqe pa'fa'cho

¹⁹ Ricoja can'jen. Ñotssia tototssia sarupama ondiccupa na'su cu'a omba'su ondiccujema ondiccucho. Poi a'ta tiseja osha'cho ñotssiaman'jen. ²⁰ Tsa'ma tise'pa sombo'tti jin'tti tsu va'cha a'ija pa'cco ai'vo ccopi'pa ccui. Tiseja Lázaro qqwen inise'chocho. ²¹ Tsaja ñombi'ye ricombe mesa'ye amppipa catiye'je'choma añe. Toya'caen ainjan jipa tise cco'pima be'ya'fa. ²² Tsa'caen canse va'cha pasi Chiga sefacconi'su shondosundeccu tisema angafa cuintsu tayopi'su Abrahami'ccu

can'jeñe. Omboe rico'qqe pasi a'tu'fa. ²³ Papa si'nge anchanda'je'chonga me'detsse vana'jemba bianima camba Abrahamma atte. Tisei'ccu Lázaroma'qqe atepa ²⁴ quia'me fundo: “¡Yaya Abraham, ñama mende'yeja! Lázaroma mandaja cuintu tise tsimian'ccoma tsa'ccunga tssipoemba ña menzanza'fama pporaen'giye. Ñoa'me gi vana'jen va si'nge anchanda'je'chonga.” ²⁵ Tsa'ma Abrahamjan su: “Dusu'tssi ñotsse in'janjan que canseite osha'cho ñotssiave an'biamba qui ja'ñojan vana'jen. Tsa'ma Lázaroya tise canseite osha'cho egave vana'jemba ja'ño mende'yeyepa vani ñotsse can'jen. ²⁶ Toya'caen ingi enttingeni tsu ampashan'masia changoja jin. Ñajan que'ini jiye in'jan'ma tsama panshañe oshambi. Toya'caen tseni quei'ccu can'jensundeccu'qqe vafanga panshañe osha'fambi.” ²⁷ Tsonsi su: “Yaya Abraham, Chigáne Lázaroma mandamoenjan ña yaya tsaoni ²⁸ ña cinco quinshingendeccunga. Tsendeccuma tsu condaya'cho vani vana'jen'chonga ji'fasa'ne.” ²⁹ Tsa'ma Abrahamjan su: “Tsendeccuja Moisés manda'choma an'bian'fa. Chiga Aya'fama afasundeccu tevaen'jema'qqe an'bian'fa. Tsa'suma tsu paña'faya'cho.” ³⁰ Tsa'ma tiseja su: “Me'i, Yaya Abraham. Tsa'ma fa'e pa'chondeccu'su tise'panga jasi tsu pañamba tise'pa egae tsincon'choma chi'gapa cati'faya.” ³¹ Tsa'ma Abrahamjan tisema su: “Moisés manda'choma pañambi'ta, Chiga Aya'fama afasundeccu tevaen'jema pañambi'ta ñoa'me pa'cho qquendya'pa ja'ni'qqe tisema

pañã'faya'bi.”

17

Egae tsincon'chone condase'cho
(Mt 18.6-7, 21-22; Mr 9.42)

¹ Tsomba Jesúsja tisema shondosundeccuma su:

—Tsaveqque'su tsu va andenijan osha'cho tsu jin a'ima qqueñasi cuintsu egae tsincon'faye. Tsa'ma va'cha tsu tsa a'i majan cca'ima egae tsoñe injaen'suja. ² Majan va ñame in'jan'cho du'shuma egae tsoñe in'jaen'ninda tisene bove ñotssi tsu toya tsa'caen injaembite sunda'cho patuma tise tsifonga tandamba singu'ccunga andeccoemoëne. ³ Tisuma ñotsse coira'faja tsa'caen tsonsa'ne.

Que faenga'su quema egae tsincon'nijan tisema candusiaña'cho. Tsa'ma tsa a'i tise egae tsincon'choma chi'ga'nijan aqqepoeña'cho. ⁴ Tiseja fae a'ta siete se quema egae tsincomba siete se quema ñoquiañe in'jan'ninda tise egae tsincon'choma tsu aqqepoeña'cho.

In'jan'da osha'choma oshaya'cho

⁵ Tisema shondosundeccuja Na'suma su'fa:

—Ingima in'jaenjan queve ti'tsse in'jañe.

⁶ Na'su tise'pama su:

—Que'ija ñame re'riccoe in'jan'da ñoa'me qui osha'choma osha'faya. Nane mostasa choja ñoa'me'qqe chipiri tsu. Que'i in'jan'choja tsa'caen chipiri'ccu qui va rande quini'jin joqquitssiye mandaye osha'faya. “¡Joqquitssipa na'enga amppija!” qquen manda'ninda tsa'caen tsu daya.

Semasundeccu sema'faya'cho

7 Majan que'imbe semasundeccuja andema pa'fupa joñe sema'fa. Majan semasundeccuja que'i ovejama coira'je'fa. Tsa'ma sema nanimba tsaoni jisi ¿majan que'i'suja tisema qquen suya: “Junde ca'nimba dyaipa anjan”? 8 Me'i. Tsa'caen qui su'faya'bi. Ñoa'mejan qquen qui tisema su'faya: “Ña anqqe'suma sho'ccoengan. Osha'chove ñoñamba ñama o'fiamba cui'ñajan. Ña an nanisi qui omboe amba cu'iya.” 9 Sema'suja ñotsse pañamba tsa'caen tsonsi ¿na'suta ti sema'suma ñotsse afaya'cho? 10 Me'i, tsaveqqe'su tise'pambe sema'sumajan. Toya'caen que'i'qqe osha'cho Chiga manda'choma pañamba tson'da qui qquen su'faya'cho: “Aqquia semasundeccu gi. ¿Ma'caen tsu ingine ñotsse afa'faya? Aqquiatsse ingima mandasi gi tson'jen'fa.”

Diez na congomba pajisundeccu

11 Jesúsja Jerusaléni jayipa Galileane sombopa Samariani napipa 12 chipiri canqquenga ca'ni. Ca'ni ji'ni diez na congomba pajisundeccu tisema cachui'fa. Biane ccutsupa 13 quia'me fundopa afa'fa:

—¡Na'su Jesús, ingima mende'yeja!

14 Jesúsja tise'pama atepa su:

—Japa Chigama afasundeccunga tisma can-jaen'faja.

Tise'pa jayi'fa'ni Jesúsja tise'pama ccushaen.

15 Tsonsi fae'cco tsendeccu'su tisu ccusha'choma atepa toequi shanda. Quia'me fundopa Chigane ñotsse afa'je. 16 Tsomba Jesús tsuttecco-fanga puntssamba cambia'jui'ccu andenga ccuipa

Jesúsma ñotsse afa. Tiseja samaria'su a'i. ¹⁷ Tsonsi Jesúsja su:

—¿Diezyi'cco a'i ti ccusha'fa? ¿Mani tsu faesu nueveta? ¹⁸ ¿Aqquia ti va israembi'su toequi jipa Chigama ñotsse afa? ¿Faesuveja me'i'on ti?

¹⁹ Tsomba Jesúsja tisema su:

—Jangipa japa canseja. Queja ñame in'jamba qui ccusha.

¿Chiga aindeccuve da'faya'cho?

(Mt 24.23-28, 36-41)

²⁰ Fariseondeccuja Jesúsma iñajampaña'fa: “¿Minga'ni tsu a'ija Chiga aindeccuve da'faya?” Tsa'caen iñajampaña'fasi Jesúsja tise'pama su:

—A'i Chiga aindeccuve da'faya'choma que'ija atteye osha'faya'bi. ²¹ Ni a'ija qqwen su'faya'bi: “Va'tti tsu tsa'caen da,” ni “Tse'tti tsu tsa'caen da.” Ñoa'me tsu Chigaja que'i injama'chonga ca'nisi qui tayo Tise aindeccuve da'fa.

²² Tsa'caen supa Jesúsja tisema shondosundecuma su:

—Junde qui que'ija Sefaccone Ji'cho A'i que'i'ccu fae a'tayi'qqe can'jeñe in'jan'faya. Tsa'ma ñajan que'i'ccu can'jeña'bisi qui ñombi'ye'faya.

²³ Cca'indeccuja que'inga conda'faya: “Joni tsu tiseja can'jen”, Toya'caen “Va'tti tsu Jesúsja can'jen.” Tsa'ma paña'fajama ni ñame ttatta'fajama.

²⁴ Ña jiña'nijan poiyyi'cco tsu fae'ngatsse ñama atte'faya. Nane tsanda veyausi poiyyi'cco fae'ngatsse atteqquia'caen tsu poiyyi'cco ñama atte'faya. ²⁵ Tsa'ma o'tieta gi ñoa'me vanaña'cho. O'tie tsu poiyyi'cco vani'su aindeccuja ñama chi'ga'faya. ²⁶ Tayopi'su Noé can'jeinteqquia'caña

tsu ña ccase jiya'ngae. ²⁷ Noé tsa'o shavonga otseya'ngae a'ija an'jemba cui'je'fa. A'ija pushe'fa. Tise'pa onquengendeccoma'qqe ante'fa. Tsa'caen canse'fa'ni na'en jipa poi'yi'ccoma piccosi tsangae pa'fa. ²⁸ Toya'caen tsa'caeñi tsu tayopi'su Lot can'jeinte'qqe da'fa. Nane a'ija an'jen'fa, cui'je'fa, chava'je'fa, chavaen'jen'fa, jon'jen'fa, tsaoña'jen'fa. ²⁹ Tsa'ma Lot Sodoma canqqe'ye sombosi tsu si'ngeja asufrei'ccu sefaccone amppipa poi'yi'ccoma oque cati. ³⁰ Tsa'caeñi tsu ja'ño'su aindecu'qqe Chigave in'jambe'yi injanga canse'faya ña ccase jiya'ngae.

³¹ Tsequi a'ta majan a'i tsa'o omba'su ppappacconi dyaipa tise an'bian'choma tsa'onga an'bian'da i'ngambe'yi tsu catipa ccuyaya'cho. Toya'caen majan nasipani sema'jen'da toequi tise tsaoni jimbe'yi ccuyin jaya'cho. ³² Lot pushene condase'choma ñotsse injan'jen'faja. ³³ Majan tisu canse'pama ccushaeñe in'jan'da tsu qqeñaña. Tsa'ma majan tisu canse'pama cati'ta tsu ñoa'me ccushaya.

³⁴ Nane tsequi cose fae ana'jen'choni dos a'i ana'jen'choma fae'ccoe angapa faesuma catiya. ³⁵ Toya'caen dos pushesu fae'ngae sunda'je'fa'choma fae'ccoe angapa faesuma catiya. ³⁶ Dos a'i nasipani sema'jen'choma'qqe fae'ccoe angapa faesuma catiya.

³⁷ Tsonsi tisema shondosundeccuja Jesúsma su'fa:

—Na'su, ¿mani tsu tsa'caenjan daya?

Jesúsja tise'panga su:

—Congomba ccuini tsu ccompanionan bo'je'fa.
Ña su'cho napisi qui in'jan'faya.

18

Tsandupajen'chone condase'cho

¹ Zutsse Chigama iñajaña'chove tisema shondosundecunga atesiañe in'jamba condase'choi'ccu Jesúsja condase. Nane a'ija anttembe'yi tsu Chigama iñajaña'cho tise'pa iñajan'choma isuya'ngae. ² Qquen tsu Jesúsja condase:

—Fae canqqueni ñoquian'suja can'jen. Chigave in'jambipa dyojombipa ni fae a'i faesuma bove ñotssi qqen in'jambi. ³ Toya'caen tsandupajen'choqqe tsa canqqueni can'jen. Faesu a'i tisema egae tsonsi tsa ñoquian'suma iñajan cuintu tsambe injama'choma somboeñe. Zutsse jipa iña'jansi ⁴ ñoquian'suja fuiteye in'jambi'ma asi'ttaen: “Ñajan Chigave in'jambipa dyojombi ni fae a'i faesuma ti'tsse'o qqen in'jambi. ⁵ Tsa'ma va tsandupajen'cho panshaen ñama noñangia'ninda gi tisema fuiteya. Tisema egae tsincon'sumbe injama'choma gi somboeña. Tsa'caen tsombian'da panshaen jipa ñama noñangian'jensi gi quimbiya.”

⁶ Qquen supa Na'su Jesúsja su:

—Va ñoquian'suja ega a'i tsu. Tsa'ma paña'fa qui tise su'choma. ⁷ Nane tiseja ega'ma tsandupajen'choma pañamba fuite'ninda tsu Chiga'qqe tisema iñajansundecuma pañamba ccushaeña. A'ta toya'caen cose'qqe Chigave in'jamba iñajan'ninda ¿Chigata ti tise'pama se'piya? ⁸ Me'i, se'pimbipa

junde tsu tise'pama ccushaeña. Tsa'ma ñajan Se-faccone Ji'cho Ai ccase ji'ta ¿jongoesuma gi va andeni atteya? ¿Ñame in'jamba tsa'caen iñajamba ronda'je'chondeccuma ti gi atteya?

Dos a'i Chigama iñajan'fa'cho

⁹ Majan a'i tisuja ño'a qquen in'jamba tisupapoprama chi'ga'fa. Jesúsja va condase'pama tsendecunga condase:

¹⁰ —Dos a'i Chiga ettini ja'fa Chigama iñajañe. Fa'eja fariseo in'jan'cho a'i, osha'cho Chiga manda'choma paña'su. Faesuja gobierno impuestoma isu'su. ¹¹ Fariseoja ccutsupa tisuma afaqquia'caen qquen iñajan: “Chiga, ñajan faesu a'ia'cambipa gi Quema ñotsse afa'je. Cca'indecuja a'ima dyoña'fa corifin'dima itsaye. Afopoemba a'ima daño'jen'fa. Faesu pushesui'ccu ana'jen'fa. Ñajan tsa'caen tsincombi ni va impuestoma isu'sia'caen tsincombi. ¹² Ñajan fae avujaquive dos a'ta ambe can'jen. Toya'caen jongoesuma isu'ta gi enttingeve Chiganga afe'je.” ¹³ Tsa'ma impuestoma isu'suja ccani catsembe'yi ccutsu. Tsa'caen ccutsupa puntssamba sefanima cambe'yi tivei'ccu tise utu'choma tsaipa su: “¡Chiga Quitsa, ña gi egae tsincon'su! Ñama mende'yeja.” ¹⁴ Ñoa'me gi su, impuestoma isu'suja avujatsse tise tsaoni ja tayo Chiga tise egae tsincon'choma joqquitssiansi. Tsa'ma Fariseoja me'i. Injanga afapa ja. Nane poi'cco majan patsuye in'jan'da bove'ccoe tsu da'faya. Tsa'ma poi'cco majan patsuye in'jambi'ta ti'tsse joccapitssia've tsu da'faya.

Jesús dushundecsuma me'de'cho

(Mt 19.13-15; Mr 10.13-16)

¹⁵ Toya'caen chambanaccu tise'pa dushundecsuma Jesúsnga i'fa cuintsu tise'pama pporaeñe. Isi Jesúsma shondosundeccuja atepa chambanaccuma iyu'u'fa. ¹⁶ Tsa'ma Jesúsja tise'pama ttu'sepa su:

—Antte'faja cuintsu dushundeccu ñani ji'faye. Se'pi'fajama. Nane Chiga aindecuta tsu va dushundeqquia'can'fa. ¹⁷ Ñoa'me gi su: Va dushundeccuja ñame in'jan'fa. Majan tise'pa'caen ñame in'jan'da Chiga aindecuve dapa Chigama paña'faya. Tsa'ma majan ñame in'jambi'ta ca'ni'faya'bi Chigai'ccu tsangae canseye.

Na'su rico Jesúsicu condase'cho

(Mt 19.16-30; Mr 10.17-31)

¹⁸ Ande nasundeccu'su Jesúsma iñajampaña:

—Ñotssia atesian'su, ¿jongoesuma gi tsoña tsangae canseye'ta?

¹⁹ Jesúsja tise'ma su:

—¿Jongoesie qui ñama su “Ñotssia”? Chiga Quitsayi tsu ñotssia. A'ija poi'cco ñotssimbi tsu. ²⁰ Tsa'ma tsangae canseye tsoña'chone iñajampaña'da, ¿queta ti qui atesu Chiga manda'choma? Nane qqen tsu su: Faesumbe pushei'ccu anajama. Cca'ima fi'ttijama. Cca'najama. Afopoenjama. Que yaya, que mamama'qqe ñotsse pañajan.

²¹ Tiseja pañamba su:

—Chuitepie gi tsa'caen in'jamba pañamba canse.

²² Jesúsja su:

—Toya fae'ccoe qui shaca. Que osha'cho an'bian'choma chavaemba pa'cco corifin'dima va'chandecunga attufaenjan. Tsa'caen afe'ta qui sefacconi ricove daya. Tsomba ñai'ccu fae'ngae jija.

²³ Tsa'ma tsama pañamba ande na'suja ñombi'ye osha'choma an'biamba. ²⁴ Jesúsja tisema cambia su:

—Aiye'pa tsu osha'choma an'bian'su Chiga a'ive daye. ²⁵ Bove aiye'pambi tsu camello nojan'cco changoma panshañe. Nane osha'choma am-bian'suta tsu ti'tsse vana'jen Chiga a'ive daye.

²⁶ Tsonsi pañasundeccuja su'fa:

—Tsa'camanda ¿majan tsu ccushaya?

²⁷ Tsa'ma Jesúsja su:

—A'i oshambi'ni'qqe tsu Chigaja oshaya.

²⁸ Tsonsi Pedroja su:

—Que canjan. Ingija tsa'o, antiama'qqe catipa gi quei'ccu fae'ngae jacan'fa.

²⁹ Jesús tise'pama su:

—Ñoa'me gi su, majan a'i tise tsa'o, tise pushe, antian, mama, yaya, du'shuma'qqe catipa Chiga in'jan'chove in'jan'da ³⁰ ñoa'me tsu toya vani can'jemba ti'tsse an'biaña. Toya'caen jai'ngae Chiga sefacconi'qqe tsu tsangae canse'faya.

Ccase Jesús tisu paya'chone condase

(Mt 20.17-19; Mr 10.32-34)

³¹ Tsomba Jesúsja tisema doce shondosundec-cuma ttu'sepa su:

—Paña'faja. Ingija Jerusaléni jayi'fa. Chiga Aya'fama afasundeccuja Sefaccone Ji'cho A'i vanaña'chone tayopi conda'fa. Ja'ño ingi

Jerusaléni jasi tsu pa'cco tsa vanaña'chone su'choja ñanga napiya. ³² Nane Chiga Tevaen'jen condaquia'caen israendeccuja israembindeqquianga ñama afe'faya. Tsa'caen afesi ñama afasepa egave noñangiamba chi'gapa ñanga attupoen'faya. ³³ Ñama ma'ppipa avuja'ccongá fi'tti'faya. Tsa'ma papa tres a'tangae gi ccase qquendyaya.

³⁴ Tsa'caen Jesús su'choma paña'ma shondosundeccuja atesu'fambi. Nane injama'cho shacapa ñotsse paña'fambi.

Jesús Jericó'su binima ccushaen'cho
(Mt 20.29-34; Mr 10.46-52)

³⁵ Tsomba Jericó canqqueni pan napiji'fa'ni binijan tsaiqui utufani dyaipa corifn'dive iñajan'jen. ³⁶ Tsain'bio a'i panshanjin'fasi pañamba faesuma iñajampaña:

—¿Jongoesie tsu a'ija panshanjin'fa?

³⁷ Qquen iñajampañasi tisenga su:

—Jesús Nasareno panshanjinsi tsu tsain'bio a'i tisei'ccu jayi'fa.

³⁸ Tsa'caen pañamba tiseja quia'me fundondo'e afa:

—¡Jesús, David Dutssi'ye, ñama mende'yeja!

³⁹ Qquen fundosi o'tie jayisundeccuja tisema se'pipa su'fa:

—¡Ziyaja!

Tsa'ma ti'tsse quia'me fundo:

—David Dutssi'ye, ñama mende'yeja.

⁴⁰ Tsonsi Jesúsja tse'ttinga napipa ccutsupa manda binima i'faye. Bini catsesi Jesúsja iñajampaña:

41 —¿Jongoesuve ña quenga tsoñe qui in'jan?

Binijan su:

—Na'su, atteye gi in'jan.

42 Tsonsi Jesúsja tisema su:

—¡Tayo qui atteye osha! Queja ñame in'jamba qui ccusha.

43 Tse'faei'ccuyi atteye oshapa tise'qqe Jesús'ccu fae'ngae ja. Ñoa'me Chigama ñotsse afa. Nane poi'yi'cco a'i ccushaen'choma attepa Chigama ñotsse afa'fa.

19

Jesús Zaqueo tsaoni japa can'jen'cho

1 Jesúsja Jericó canqquema ca'nimba panshanjin. 2 Tse'tti tsu gobierno impuestoma isusundecumbe na'suja can'jen. Tise iniseja Zaqueo. Tiseja osha'choma an'bian. 3 Jesúsma atteye in'jan'ma panshaen re'richoccopa oshambi tsain'bio a'i bo'fasi. 4 Tsa'caen oshambipa tise jayani buttopa japa quini'jinga ansundepa dyai tsene Jesús panshanjin'choma ñotsse atteye. 5 Jesúsja tse'ttinga napipa asuccocamba tisema attepa su:

—Zaqueo, junde andeja. Ñanda gi ja'ño a'ta que tsaoni japa can'jeña.

6 Tse'faei'ccuyi Zaqueoja andepa avujatsse Jesúsma ca'nian tise tsa'onga. 7 Poi'yi'cco a'i can'boemba afaccoye ashaen'fa: “Jesúsja egae tsincon'sumbe tsa'onga ca'nimba can'jen” qqen su'fa. 8 Tsa'ma Zaqueoja jangi ccutsupa Na'su Jesúsma su:

—Na'su, que canjan. Ña an'bian'choma ent-tingeve gi va'chandecunga afeya. Ñajan majama afopoemba cca'na'da gi cuatro se ti'tsse'e'qqe toequi afeya.

⁹Tsonsi Jesúsja su:

—Zaqueo'qqe Abraham dutssi'yepa tisia'caen ñame in'jan. Tsa'cansi ja'ño a'ta tsu va tsa'o'su aindecuja ccusha'fa. ¹⁰Nane Sefaccone Ji'cho Ai'ta gi a'i qqe'chondeccuma ccushaeñe ji.

*Diez corifin'dima coirasundeccu
(Mt 25.14-30)*

¹¹Jesús Jerusaléni pan napijisi a'i tisema pañamba junde Chigaja Jesúsma na'suve tsoña qqen in'jan'fa. Tsa'caen in'jan'fasi Jesúsja va condase'choma condase. ¹²Qquen tsu su:

—Ti'tsse'tssia ande na'su ttu'sesi joccapitssia a'i, tise ande'su na'suve dapa jiye, faesu andeni ja. ¹³Tsa'ma toya jambite diez tisema shondosundecuma ttu'sepa poiye'cconga mil corifin'dive afe cuintsu tise ccase jiya'ngae chavapa chavaemba ti'tsse gana'jen'faye. ¹⁴Tsa'ma majan tise aindecuja tisema chi'gapa cca'indeccuma omboe moen'fa ti'tsse'tssia ande na'sunga qqen condaye: “Va a'ima na'suve tsoñe in'jan'fambi gi.” ¹⁵Tsa'ma tsa a'ija tisu ande'su na'suve dapa toequi shandapa jipa tise corifin'dima afe'cho a'ima ttu'seye manda. Ttu'sepa mi'getsse gana'chove poiye'ccoma ñajampaña. ¹⁶Fae'ccoja na'sunga jipa su: “Na'su, que mil corifin'di'ccu gi diez mil corifin'dive gana.” ¹⁷Qquen susi na'suja su: “Ñotsse qui tson. Queja ñotssia shondo'su qui. Re'riccoi'ccu

ñotsse tsonsi gi quema ccutsiaña na'suve diez canquema mandaye.”¹⁸ Faesuja jipa su: “Na'su, que mil corifin'di'ccu gi cinco mil corifin'dive gana.”¹⁹ Na'suja tisenga su: “Quema gi na'suve ccutsiaña cinco canquema mandaye.”²⁰ Tsonsi faesuja jipa su: “Na'su, va'tti tsu que mil corifin'di. Pañeronga onccamba gi coira.”²¹ Queja dyo'tssia a'i. Afembi'ma qui itsa'je. Jombi'ma qui tai'je. Tsa'cansi gi ñajan quema dyojo.”²² Na'suja tisema su: “Que su'choyi tsu que injama'choma somboeña. Ñoa'me qui queja ega shondo'su. Ñajan dyo'tssia na'su, afembi'ma itsa'su, jombi'ma tai'su, qqen qui in'jan.”²³ Tsa'caen in'jan'da ¿mingapa qui ña corifin'dima banco na'sunga afembi cuintsu ña jipa ñambema isuye corifin'di gana'choi'ccu?”²⁴ Tsomba na'suja pporotsse ccutsusundecuma su: “Tsambe mil corifin'dima itsapa diez mil corifin'dive an'bian'chonga afe'faja.”²⁵ Tsendecuja su'fa: “Tsa'ma, na'su, tayo tsu tiseja diez mil corifin'dive an'bian.”²⁶ Na'suja su: “Ñoa'me gi su, majan an'bian'nijan ti'tsse tsu tisenga afeya'cho. Tsa'ma majan an'biambian'da tise re'riccoama'qqe tsu itsaya'cho.”²⁷ Toya'caen ñama chi'gasundecuma i'faja. Tise'paja na'suve ñama in'jan'fambi. Tsa'ma tise'pama ipa ña caña'jen'ni fi'tti'faja.”

Jesús Jerusaléni japa ca'ni'cho
(Mt 21.1-11; Mr 11.1-11; Jn 12.12-19)

²⁸ Tsa'caen condase nanimba ccase Jerusaléni jaye ja. ²⁹ Betfagéni, Betaniani pan napijipa Olivo

ccotta'cconi pporotsse can'jemba tisema shondosundeccu'suma dosve manda moen ³⁰ qquen supa:

—Va canqquenga japa ca'nimba qui boro du'shuma atte'faya. Tsangaja majañi'qqe toya dyaipa jacambi. Ccupapa vani i'faja. ³¹ Majan a'i: “¿Jongoesie qui boro du'shuma ccupa'je?” qquen iñajampaña'ninda: “Na'su tisenga dyaipa jaye” qquen tsu suya'cho.

³² Manda moensi japa Jesús suqquia'caen atte'fa. ³³ Attepa ccupa'je'fasi boro du'shumbe nasundeccu tise'pama su'fa:

—¿Jongoesie qui boro du'shuma ccupa'je'fa?

³⁴ Tsonsi su'fa:

—Na'su tisenga dyaipa jaye.

³⁵ Jesúsnga ipa tise'pa ondiccu'jema boro du'shu sepaconga oppoensi Jesúsja otsepa dyai. ³⁶ Tsanga Jesús dyaipa jayisi a'ija tise'pa ondiccu'je'cho sarupama tsaiquina ppappa'fa. ³⁷ Olivo ccotta'ccoma andepa Jerusaléni catsesi tsain'bio tisema shondosundeccu bopa avujatsse afaye ashaen'fa. Jesús ñotsse tsonsi attepa quia'me fundopa Chigama ñotsse afa'fa. ³⁸ Qquen tsu su'fa:

—Chigaja na'suma inginga afe. Ñoa'me ñotssia tsu. Sefacconi opatsse canse'faja. Pa'cco Chiga sefacconi Chigane ñotsse afa'faja.

³⁹ Tsonsi majan fariseondeccu a'i bo'fa'choi'ccu can'jemba Jesúsma su'fa:

—Atesian'su, quema shondosundeccuma iyu'uja.

⁴⁰ Tsa'ma Jesúsja su:

—Ñoa'me gi su, tsendeccu ziya'ninda va tsaiqui'su patu'qqe fundopa Chigama ñotsse afa'faya.

⁴¹ Canquenga pan napijipa attepa Jesúsja i'namba ⁴² su:

—Ñajan in'jan cuintsu que'i Jerusalensundeccu opatsse canse'faye. Tsa'ma ja'ñonda qui tsa'caen canseye in'jan'ma toya osha'fambi. Nane tso'fema tsapiquica'caen qui tta'tta'fambi ma'caen opatsse canseya'chove. ⁴³ Tayo tsu napiji que'ima iyiccayesundeccu jipa que'i sombosa'ne shoquendi ttu'faya'cho. Toya'caen andema'qqe ovivi'faya que'i ttuccuma panshamba ca'niñe. ⁴⁴ Ca'nimba que'ima fitti'tti'faya. Que'i dushundeccuma'qqe ttova amppian fi'tti'faya. Nane canqqe ttu'choma asittapa ni fae patuveyi'qqe faesumbe patu ombanga ántte'faya'bi. Nane que'ija Chiga que'ini jipa ccushaen'choma in'jambisi tsu tsa'caen tson'faya.

Chiga ettini'su chavaensundeccu

(Mt 21.12-17; Mr 11.15-19; Jn 2.13-22)

⁴⁵ Tsomba Jesús Chiga ettini ca'nimba chavaensundeccuma tteyamoeñe ashaen. Chavasundeccuma'qqe joqqitssian. ⁴⁶ Tise'pama su:

—Tise Tevaen'jenga Chigaja su; “Ña tsa'oja ñama iñajan'jen'tti tsu.” Tsa'ma que'ija va Chiga ettima ccanamba tsa'ove cambian'fa.

⁴⁷ Jesúsja poi a'ta Chiga ettini can'jemba atesian'jen. Chigama afa'su nasundeccu, Chiga Tevaen'jema atesu'chondeccu, joccapitssia israendeccu'qqe ttatta'fa ma'caen Jesúsma

fi'ttiya'chove. ⁴⁸ Tsa'ma ma'caen tsoña'chove atesu'fambi. Nane poi'cco a'i Jesúsma in'jamba tise pa'cco afa'choma paña'jen'fa.

20

Jesús na'sia'caen atesian'jen'cho
(Mt 21.23-27; Mr 11.27-33)

¹ Fae a'ta Jesúsja Chiga ettini can'jemba a'ima atesian'jen. Chiga ccushaeña'chone ñotsse condase'choma candusian'jensi Chigama afa'su nasundeccu, Chiga Tevaen'jema atesu'chondeccu, israe'su coenzandecchu'qqe jipa tise ² su'fa:

—Inginga condaja majan na'su tsa'caen in'jaensi qui queja tsa'caen atesian'jen. ¿Majan tsu quema manda antte na'sia'caen afaye?

³ Jesúsja pañamba tise'pama su:

—Ña'qqe gi que'ima ñajampañaña. Ñanga condaja: ⁴ ¿Juan feti'chota ti sefacconi'su Chiga mandasi feti'cho? ¿Tsambi'ta ti a'i mandasi feti'cho?

⁵ Tsa'caen susi aindeccuja tisupaporai'ccu qqquen condase'cco'fa:

—Ingi “Sefacconi'su Chiga mandasi feti'cho tsu” qqquen su'ninda tsu tiseja suya: “Tsa'camanda ¿micomba qui Juanma pañamba in'jan'fambi?”

⁶ Tsa'ma “A'i mandasi feti'cho” qqquen su'ninda tsu ñoa'me poi'cco a'i iyicca'yepa ingima patui'ccu tovaccoen'faya. Poi'cco a'i tsu Juanjan Chiga Aya'fama afa'su qqquen in'jan'fa.

⁷ Tsa'caen asi'ttaemba Jesúsma qqquen su'fa:

—Majan Juanma fetiye manda'chove atesu'fambi gi.

⁸ Tsonsi Jesúsja tise'pama su:

—Jen'da ña'qque que'inga condaya'bi gi majan na'su mandasi ña qqen atesian'jen'choma.

Ega coirasundecune condase'cho

(Mt 21.33-44; Mr 12.1-11)

⁹ Tsomba Jesús va condase'choma a'inga condase:

—A'ija o'fa tsa'jaccuve jomba faesu coirasundecunga afepa faesu andeni japa bo'tsse can'jen. ¹⁰ Taiya'cho napijisi tisema shondo'suma coirasundecunga manda moen cuintsu tise'pa tai'fa'cho'suma enttingeve isupa iye. Tsa'ma coirasundecuja shondo'suma ma'ppipa me'ccoeyi moen'fa. ¹¹ Tsonsi na'suja faesu shondo'suma moen. Tsama'qqe ma'ppipa afasepa me'ccoeyi moen'fa. ¹² Tsonsi ccase tres se faesu shondo'suma'qqe moen. Tsendecuma'qqe ñaccaemba joqquitsian'fa.

¹³ Tsonsi o'fa tsajaccumbe na'suja su: “¿Ma'caen gi tsoña? Ña in'jan'cho dutssi'yema gi moeña. Tisemanda tsu paña'faya.” ¹⁴ Tsa'ma coirasundecuja na'sumbe dutssi'yema atepa tisupaporai'ccu qqen condasecco'fa: “Vaja jai'ngae osha'choma isupa na'suve daya'cho. Jinge tisema fi'ttipa o'fa tsajaccuma tsumbe isu'faye.” ¹⁵ Tsa'caen supa tisema joqquitsiamba fi'tti'fa.

Tsa'caen tson'fa'ninda ¿ma'caen tsu na'suja ega coirasundecuma tsoña? ¹⁶ Nane tiseja jipa tsu coirasundecuma fi'ttiya. Tsendecuma fi'ttipa o'fa tsajaccuma cca'indeccunga afeya.

Chigama afasundecuja vama pañamba su'fa:

—Chigaja tsa'caen ántteya'bi.

¹⁷ Tsa'ma Jesús tise'pama cambia qqen su:

—Tsa'cambian'da jongoesie tsu Chiga Tevaen'jenjan qquenda su:

Tsaoñasundeccu joqquitssian'fa'cho patu tsu

Ñoa'me ti'tsse injienge'cho patuve da.

¹⁸ Majan tsa patunga zuccopanshan amppi'ta tsu tisu uccaya. Tsa'ma tsa patu majan a'inga amppi'ninda tsaja vuviangeya.

¹⁹ Chiga Tevaen'jema atesu'chondeccu, Chigama afa'su nasundeccu'qqe tse'faei'ccuyi Jesúsma indiye in'jan'ma antte'fa aindecuma dyojopa. Nane nasundeccuja pañamba in'jan'fa tise'pane Jesús va condase'pama tsa'caen condase.

Gobierno impuestone condase'cho

(Mt 22.15-22; Mr 12.13-17)

²⁰ Tsa'caen indiye oshambipa a'tutsse tisema can'boen'fa. Toya'caen cca'indecuma moen'fa Jesúsma shondosundeqquia'caen attian'faye. Tsendeccuja Jesúsma can'boemba tise jongoesu qqwen su'choma ttatta'fa tisema afopoemba indipa governaroronga afeye. ²¹ Jipa Jesúsma ñajampaña'fa:

—Atesian'su, queja tansintsse condapa qui tansintsse atesian'jen. Queja poiyi'cco a'i fae'ngatssi qqwen in'jamba qui dyombi'tsse Chigane atesian'choma atesian'jen. Tsa'caen in'jamba gi quema ñajampañañe in'jan: ²² ¿Chiga manda'chota ti antte cuintsu ingija na'su Césarnga impuestoma afeye? ¿Tsambi'ta se'pi ti?

²³ Tsa'caen Jesúsma qqeñañe ñajampaña'fasi Jesúsja tise'pa in'jan'choma in'jamba qqwen tise'pama su:

24 –Corifin'dima ñanga canjaenjan. ¿Majambe tsove, majambe tevaen'cho tsu vaja?

Tise'paja su'fa:

—Na'su Césarmbe.

25 Jesúsja tise'pama su:

—Tsa'caen Césarmbemajan Césarnga afe'faja. Toya'caen Chigambemajan Chiganga afe'faja.

26 Tsa'caen Jesúsma iñajampaña'jen'fa'choma poi'cco a'i tsu paña'jen'fa. Tsa'ma nasundeccuja Jesús afa'chone tisema qqeñañe oshambipa “Ñotsse tsu afa” qqen in'jamba ziya'fa.

Papa ccase qqwendyaya'cho

(Mt 22.23-33; Mr 12.18-27)

27 Tsonsi majan Saduseondeccu Jesúsni ji'fa. Saduseondeccuja su'fa a'i pa'chota ccase qqwendyaya'bi. 28 Jipa qqen Jesúsma iñajampaña'fa:

—Atesian'su, tayopi'su Moisésta tsu ingima mandapa tevaen cuintsu a'i du'shu mechoyi pasi tise pushe toya canse'ninda pa'chombe quinshiñi tsu tsa pushesuma pusheya'cho. Du'shuma tsu isuya'cho tise quindyayembe inisema aqqe'pasa'ne. 29 Nane siete a'i antiandeccuja can'jen'fa. Quindyaja o'tie pushepa du'shuvemechoyi pa. 30 Pasi tise quinshin pa'chombe pushema pushepa tsa'caen du'shuvemechoyi pa.

31 Tsa'caeni faesu quinshinjan tisema pushepa pasi ñoa'me poi'cco siete antian tsa pushesuma pushepa du'shuvemechoyi tsu pa'fa. 32 Omboe pushesu'qqe pa. 33 Tsa'caen tsonsi a'i ñoa'me ccase qqwendya'ninda ¿majambe pushe tsu va

pushesuja? Ñoa'me poiyi'cco siete antiandeccu tsu tisema pushe'fa.

³⁴ Jesús tise'pama su:

—Va andeni tsandiendeccuja pushepa canse'fa. Pushesundeccuja tsa'ndupa canse'fa. ³⁵ Tsa'ma Chigaja majan a'ima in'jamba Tisei'ccu can'jeñe ánttesi pa'cho'ye ccase qquendyapa tseni Chiga Sefaconijan pushe'faya'bi ni tsa'ndu'faya'bi. ³⁶ Tsangae pa'masiave dapa Chigama sefacconi'su shondosundeqquia'caen canse'faya. Nane tsendeccuja ccase qquendyapa tsu Chiga dushundeccuve da'fa. ³⁷ Tsa'ma pa'chondeccu ccase qquendyaya'chone Moisés'qqe tayopi tevaen. Chigaja quini'si anchanda'je'cho'ye Moisésnga attiansi tevaen'choja qqen tsu su: “Na'su Chigaja Abraham Chiga tsu. Isaac Chiga tsu. Jacob Chiga tsu.” Nane tsa'caen Chigaja tise'pa Chiga qqen supa tsendeccu'qqe toya canse'fa qqen tsu su. ³⁸ Nane Na'su Chigaja pa'chombe Chigambi tsu. Tsa'ma cansendeqquiambe Chiga tsu. Nane Chiganejan toya cansendeccu tayo pa'chondeccu'qqe toya ñoa'me canse'fa tsu.

³⁹ Tsonsi majan Chiga Tevaen'jema atesu'chondeccuja su'fa:

—Atesian'su, ñotsse qui su.

⁴⁰ Tsa'ma dyojopa tisema ti'tsse ñajampaña'fambi.

*Majambe du'shu tsu Cristoja
(Mt 22.41-46; Mr 12.35-37)*

⁴¹ Toya'caen Jesúsja tise'pama qqen ñajampaña:

—¿Ma'caen tsu atesiansundeccuja su'fa Cristoja David Dutssi'ye tsu? ⁴² Nane Davidja tise setapoen'cho tevaen'jenga qqwen tsu su:

Na'su Chigaja ña Na'sunga su:

Ñai'ccu fae'ngae na'suve dapa va'ttinga dyaija ña tansinfanga

⁴³ ña quema iyiccayesundeccuma patsusi que tsu'tte tsosiccunga ccuiqquia'caen oshambipa quema paña'faya'ngae.

⁴⁴ David tsa'caen “Ña Na'su” qqwen su'ninda ¿ma'caen tsu Cristoja David dutssi'yeya?

Jesúsja atesu'chondecuma iyu'u

(Mt 23.1-36; Mr 12.38-40; Lc 11.37-54)

⁴⁵ Tsomba poiya'cco a'i paña'jen'fa'ni Jesúsja tisema shondosundeccunga su:

⁴⁶ —Injama'tse, que'i'qqe manda'choma atesu'chondeqquia'caen tsonsa'ne. Tsendeccuja bia'a ondiccu'jema ondiccu'fa. Canqqe atandundunga a'i chavaeñe bo'fa'ni'qqe tsendeccuja bia'ave tisupapora chigambianccoye in'jan'fa. Chigane atesian'jen'ttinga ja'ta ti'tsse joccapitssia dyaipa'chove tsu in'jan'fa. Bopa an'jen'fa'ni ja'ta tsa'caen joccapitssianga dyaiye in'jan'fa. ⁴⁷ Tise'pa coiraye qqwen afopoemba tsandupajen'chondecu an'bian'choma cca'namba itsa'fa. Tsa'caen cca'namba bia'ave Chigama iñajan'fa ño'a qqwen attiañe. Tsendeccuma tsu Chigaja ti'tsse tise'pa injama'choma somboeña.

21

Tsandupajen'cho Chiganga afe'cho (Mr 12.41-44)

¹ Jesúsja ricondeccu tise'pa afe'cho corifin'dima Chiga etti'su corifin'dima ppiña'jen'chonga ppiñasi atte. ² Toya caña'jen'ni tsandupajen'cho'qqe jipa dos reama ppiña. ³ Tsama attepa Jesúsja su:

—Ñoa'me gi su, va tsandupajen'choja poiyi'cco ricondeccuma ti'tsse tsu ppiña. ⁴ Tsendeccuja osha'choma tayo chavapa an'biamba tise'pa antt-eye'cho corifin'dima afe'fa. Tsa'ma tsandupajen'choja mechopa pa'cco tise chavapa canseye an'bian'cho corifin'dima afe.

Chiga etti osui catiyeya'cho (Mt 24.1-2; Mr 13.1-2)

⁵ Majan a'ija Chiga ettine Jesús'ccu condasecco'fa. Nane ñotssia patuma tsao'ñamba osha'cho ñotssia afe'choi'ccu Chiga ettima ñoña'chone condaseccopa Jesúsja su:

⁶ —Que'ija osha'cho va ñotssiamatte'fa. Tsa'ma jai'ngae ni fae patu faesu patumbe ombani ot-taya'bi. Pa'cco tsu osui catiyeya'cho.

Osefaeña'cho a'tane canjaeña'cho (Mt 24.3-28; Mr 13.3-23)

⁷ Tsonsi tise ma iñajampaña'fa:

—Atesian'su, ¿minga'ni tsu tsa'caen daya? ¿Jon-goesu canjaen'choma attepa gi tsa'caen daya'chove atesu'faya?

⁸ Tsonsi Jesúsja tise'pama su:

—Injama'tse majandeccu que'ima afopoemba qqqueñasa'ne. Chigaja ñama moen a'ima

ccushaen'suve. Tsa'ma tsain'bio a'i tsu jipa “Ña gi Chiga in'jan'cho Cristo” qqwen afopoen'faya. “Ja'ño tsu Chigaja a'ima ccushaëña” qqwen tsu su'faya. Tsa'ma tise'pama paña'fajama. ⁹Toya'caen osha'cho gera, iyicco'je'choma paña'an'qqe dyombe can'faja. Tsaveqqe'su tsu. O'tie tsu tsa'caen tsoña'cho. Tsa'ma tse'faei'ccuyija osefaëña'bi.

¹⁰Tsomba Jesús ti'tsse conda:

–Fae ande'su tsu faesu ande'sui'ccu iyicco'faya. Fae na'su tsu faesu na'sui'ccu iyicco'faya.

¹¹Ande'qqe oyaya. Cca'tti, cca'tti aindeccuja qqquipoe'su'faya. Osha'cho paqqe'suma'qqe setsa'faya. Osha'cho dyoqqe'sui'ccu tise'pama dyoñansi a'ija sefacconi'su canjaen'choma'qqe atte'faya.

¹²Tsa'ma osha'cho tsa'caen toya napimbi'te cca'indeccuja que'ima indipa noñangian'faya. Que'ima Chigane atesian'jen'ttinga anga'faya que'i injama'choma somboëne. Picco'je'ttinga'qqe que'ima picco'faya. Que'ija ña aindeccusi ande nasundeccu, gobiernondeccu'qqe que'ima iyu'u'faya.

¹³Tsa'caen que'ima iyu'uye angasi qui tansintsse ñane conda'faya. ¹⁴Tsa'ma toya tsa'caen tsombi'te asi'ttaen'fajama jongoe qqwen supa ccushaya'chove. ¹⁵Nane ña gi que'ima in'jaemba afaëña que'i tansintsse afasi cuintsu que'ima noñangiansundeccu ziyaye.

¹⁶Tsa'ma que'ima antiandeccu, nane que'ima yaya, mama, quindy, que'ima amigondeccu'qqe que'ima a'tiamba noñangiansundeccunga afe'faya. Majan que'ima suma'qqe fi'tti'faya. ¹⁷Que'ija ña

aindeccusi tsu poiyi'cco que'ima chi'ga'faya.
¹⁸ Tsa'ma que'imajan qqeñaña osha'faya'bi. Ni fae tsove'su toseveyi'qqe qqeña'faya'bi. ¹⁹ Que'i ñame ta'etsse in'jamba qui ccushapa tsangae canse'faya.

²⁰ Tsa'ma tsain'bio sundarondeccu Jerusalén canqquema shoquendi'je'fasi attepa qui in'jan'faya Jerusalén canqquema osefaeña'cho tsu tayo napi. ²¹ Majan Judea andeni can'jen'da ccotta'ccongga tsu ccuya'faya'cho. Majan canqqueni can'jen'da tsu sombo'faya'cho. Majan tayo joccani can'jen'da Jerusaléni ca'nimbe'yi tsu jaya'cho. ²² Nane tsequi a'ta tsu Chigaja israendeccumbe injama'choma somboeña. Osha'cho Tise Aya'fa su'cho tsu napiya. ²³ Va'cha pushesundeccuja majan suri'je'cho. Majan du'shuma chochoen'jendeccu tsequi a'ta tsu vana'faya. Nane poi andeni'su aindeccu vana'jen'fasi Chigaja israendeccuma iyicca'yepa tise'pa injama'choma somboeña. ²⁴ Sundarondeccuja matichi'ccu tise'pama fi'tti'faya. Majamanda tsu indipa poi biani'su andeni maña ja'faya cuintsu tseni canse'faye. Toya'caen israembindeqqquia tsu Jerusalénma patsupa an'bian'faya tise'pa manda'cho tsangae naningeya'ngae.

Sefaccone Ji'cho A'i ccase jiya'cho

(Mt 24.29-35, 42-44; Mr 13.24-37)

²⁵ Coejechigai'ccu canjaeña'choma qui atte'faya. Cose'suchigai'ccu, o'fei'ccu'qqe tsa'caen canjaensi qui atte'faya. Toya'caen andenga mar'su shave'pa jangipa zonzomba quia'me

jensi poiyi'cco a'i dyopa zucco'faya. Nane gobierno nasundeccu'qqe ma'caen tsoña'chove atesumbipa dyo'faya. ²⁶ A'ija jai'ngae tsoña'choma asi'ttaemba tsu dyopa paqquia'caen da'faya. Nane sefacconi'su o'fe'qqe ccaningae ja'fasi tsu aindeccuja tsa'caen da'faya. ²⁷ Tsonsi tse'i tsu atte'faya Sefaccone Ji'cho A'i osha'choma oshapa mandaye jiña'choma. Nane osha'cho ñotssia'ccu unjimba'ye jiña'choma tsu atte'faya. Ña ji'ninda poiyi'cco tsu ñama atte'faya. ²⁸ Osha'cho tsa'caen daye ashaensi asuccopa can'faja. Ñoa'me tsu que'i ccushaya'choja pan napiji.

²⁹ Tsomba Jesús va condase'choma condase:

—Higuera tetachojima can'faja. Nane poi teta-chojima can'faja. ³⁰ Ccaqueje sho'yosi atte'ta qui qquen in'jan'fa: “Coejefa tsu jiye tson'jen.”

³¹ Tsa'caeni qui que'ija osha'cho ña su'choma atte'ta qquen in'jan'faya: “Chiga tsu jiye tson'jen. Ja'ño gi Tise aindeccuve da'faya.”

³² Ñoa'me gi su va ja'ño can'jensundeccu pambi'te tsu osha'cho tsa'caen napiya. ³³ Chiga sefacconi tsu pasaya. Va ande'qqe pasaya. Tsa'ma ña aya'faja tsangae tsu jinchoya.

³⁴ Majan a'ija ñoquimbipa injanga canse'fa. Majan a'ija ccusi'fa. Majan a'ija tise'pa an'bian'choma panshaen in'jan'fa. Tsa'ma injama'tse. Tsa'caen ñoquimbi'fajama. Ña su'choma'qqe aqqe'pa'fajama pan ña jisi atte jangipa dyosa'ne. ³⁵ Ña ji'ninda tsu chhiriria quendecco'chonga indiyeqquia'caen a'ija atte jangi'faya. ³⁶ Tsa'ma que'ija cambia ronda'jepa ñama iñajan'jen'faja. Tsayita qui osha'cho va

vanaña'cho su'choma vanambe'yi ccushapa Sefaccone Ji'cho A'inga ccutsu'faya.

³⁷ Poi a'ta Jesúsja Chiga ettini can'jemba atesian'jen. Tsa'ma cose'ninda Olivo ccotta'cconga japa ana'jen. ³⁸ Poi a'ta sinte'yi poi'yi'cco a'i Chiga ettinga bo'fa tisema pañañe.

22

Jesúsma indiyé ñoña'fa

(Mt 26.1-5, 14-16; Mr 14.1-2, 10-11; Jn 11.45-53)

¹ Israendeccu pan cupana'cco mechoa fiesta pan napiji. Tsaja Chiga panshaen'cho injienge'cho a'ta'su fiesta. ² Chigama afa'su nasundeccu, Chiga Tevaen'jema atesu'chondeccu'qqe Jesúsma fi'ttíve in'jamba tta'tta'fa ma'caen a'tutsse fi'ttiya'chove. Ai bo'fa'choma dyopa tise'pama qqejeccoeñe in'jan'fambi.

³ Fa'e Jesúsma shondo'suja, Judas Iscariote tsu. Cocoya na'su, Satana, tise injama'choma in'jaensi

⁴ Judasja japa Chigama afa'su nasundeccui'ccu sundaro capitándeccui'ccu condasecco ma'caen Jesúsma tise'panga afeya'chove. ⁵ Tsendeccuja avujapa Judasnga corifin'dima afeye su'fa.

⁶ Tsonsi Judasja afeye qqen supa japa tta'tta maqui a'i bo'fambi'te Jesúsma afeye cuintsu indi'faye.

Na'su Jesús an'jen'cho

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Pan cupana'cco mechoama aña'cho a'ta napi. Tsequi a'ta tsu Chiga panshaen'cho injienge'cho

ovejama'qqe fi'ttiya'cho. ⁸ Tsa'cansi Jesúsja Juani'ccu Pedroma moen qquen supa:

—Japa ñoña'faja Chiga panshaen'cho injienge'cho aña'choma aña'chove.

⁹ Tise'paja su'fa:

—¿Mani qui in'jan ingi ñoña'faye?

¹⁰ Jesúsja tise'pama su:

—Que can'faja. Canqquenga ca'nimba qui a'i tsa'ccu tsoripama angaji'choma cachui'faya. Tisema omboemba ja'faja. Mani tise ca'ni'ninda que'i'qqe ca'nimba ¹¹ tsa tsa'o na'sunga conda'faja: “Atesian'su Jesús tsu quema ñajampaña: ¿Mani tsu queni pasiasundeccu cuarto? Tseni gi ñajan ñama shondosundecui'ccu Chiga panshaen'cho injienge'cho aña'choma aña.” ¹² Sefani'su ppappacco rande cuartoma tsu tiseja que'inga canjaeña. Tseni tsu osha'cho jin que'i sho'ccoemba ñoña'faya'cho ingi aña. Tseni japa ñoña'faja.

¹³ Tise'paja japa osha'choma Jesús suqquia'caen atepa Chiga panshaen'cho injienge'cho aña'choma sho'ccoen'fa.

¹⁴ Aña bopa Jesúsja tisema shondosundecui'ccu an'jen'cho mesa jin'tti piyive ccuipa ¹⁵ tise'pama su:

—Ñoa'me gi va injienge'cho aña'choma que'i'ccu aña in'jan ña vanaña'cho toya napimbi'te. ¹⁶ Ccase añambi gi va panshaen'cho injienge'cho aña'choma Chiga a'i egae tsincon'choma panshaemba jo-qquitssiaña'gae. Tsequi a'ta gi poiyi'cco Chiga ain-deccui'ccu fae'ngae bopa ccase an'faya.

¹⁷ Tsomba tasama isupa tsane Chigama ñotsse afapa tisema shondosundecuma su:

—Vama isupa poiyi'cco fae'ngae re'riccoe cu'i'faja. ¹⁸ Ñoa'me gi su ja'ño cu'ipa gi ccase va o'fa tsaja tsa'ccuma cu'iya'bi Chigai'ccu poiyi'cco Tise aindeccu fae'ngae bo'faya'ngae.

¹⁹ Tsomba Jesús panma isupa tsane'qqe Chigama ñotsse afapa doñamba tise'panga attufaen qqen supa:

—Vaja ña ai'vo tsu. Que'ine gi ña ai'voma afe. Tsa'cansi va panma an'da ña que'ine afe'choma injan'jen'faja.

²⁰ Omboe pa'ccoma an nanimba tasama'qqe isupa afe. Tasama afepa qqen tsu su:

—Chiga Quitsa aindeccui'ccu cuname injancco'fa'choma condasesi ña anjampa tsu tsane tssaña'cho. Que'ine gi ña anjampama tssañaña. Va o'fa tsaja tasa tsu ña anjampa tssamba ccushaen'choma canjaen.

²¹ Tsa'ma que can'faja ñama chi'gapa afe'su tsu fae'ngae va mesani ñai'ccu an'jen. ²² Ñajan Sefaccone Ji'cho A'i gi Chiga mandaqquia'caen paya. Tsa'ma va'cha tsu ñama chi'gapa afe'su.

²³ Jesús qqen susi tisema shondosundeccu tisupaporai'ccu condasecco'fa majan tsu tsa'caen Jesúsma chi'gapa afeya'cho.

Majan tsu ti'tsse'tssia qqen afacco'fa

²⁴ Toya'caen tsu afacco'fa majan tise'pa'su ti'tsse joccapitssia. ²⁵ Tsonsi Jesús tise'pama su:

—Israembindeqquia nasundeccuja tise'pa a'ima manda'fa. A'ima fuiteye tsa'caen manda'fa qqen tsu su'fa. ²⁶ Tsa'ma que'inejan tsa'cambi tsu. Que'inejan majan ti'tsse'tssia tsu utu'ccoe daya'cho. Manda'su tsu shondo'sia'caen daya'cho.

27 ¿Majan tsu ñoa'me ti'tsse'tssia? ¿Mesani an dyai'su? Tsambi'ta ¿semamba o'fian'su? Ju, mesani an dyai'su tsu ti'tsse'tssia. Tsa'ma ñajan tsa sema'sia'caen que'i'ccu can'jen.

28 Que'ija ñai'ccu fae'ngae jacamba qui ñai'ccu fae'ngae vana'jen'fa. 29 Chiga ña Quitsaja tayo tsu ñama na'suve manda. Tsonsi tsa'caen gi ña'qqe que'ima na'suve manda cuintsu 30 ña na'suve dasi que'i'qqe ñai'ccu ña an'jen'cho mesanga fae'ngae amba cu'i'faye. Que'ija na'su dyaipa'chonga dyaipa qui poi'yi'cco israendecumbe injama'choma somboeñe manda'faya.

Pedro atieña'chone Jesús conda

(Mt 26.31-35; Mr 14.27-31; Jn 13.36-38)

Toya'caen tsu Na'suja su:

31 —Simón, Simón, vama canjan. Satanajan poi'yi'cco que'ima in'jamba ñajan trigoma qqe'shoqquia'caen que'ima vanaeñe. 32 Tsa'ma ñajan quene gi Chigama ñajan que ñame in'jan'choma qqesa'ne. Vana'jen'cho panshansi ccushapa que faengasundecuma'qqe quiñaenjan.

33 Tsama pañamba Pedro tisema su:

—Na'su, quema picco'je'ttinga picco'fa'ninda gi ña'qqe quei'ccu fae'ngae piccoyeya. Quema fi'tti'fa'ninda gi ña'qqe quei'ccu fae'ngae paya.

34 Jesúsja su:

—Pedro, ñoa'me gi quenga su: Arapa gayo toya ja'ño a'ta se'yombi'te queja ñane tres se a'tieña “Tisema atesumbi gi” qqen supa.

Jesús vanaña'cho tayo napi

³⁵ Tsomba Jesús poiyi'ccoma iñajampaña:

—Ña que'ima bosa ni o'va ni sapatove'qqe me'ccoe manda moe'ninda ¿jongoesu tsu shaca?

Tise'paja su'fa:

—Me'i, shaca'fambi.

³⁶ Tsonsi Jesúsja su:

—Tsa'caen tayoe mandapa gi ja'ñojan que'ima conda: Majan bosapa'ta tsama angaya'cho. O'vama'qqe tsa'caen. Majan a'i sundaro matichive mechota bove ñotssi tsa tise omba'su ondiccu'jema chavaemba sundaro matichima chavaye. ³⁷ Ñoa'me gi su: Va Chiga Tevaen'jen ñane su'choja ja'ño tsu napi: “Egae tsinconsundeccu'ccu tisema in'jan'fa.” Pa'cco ñane tevaen'cho tsu junde napiya'cho.

³⁸ Tise'paja su'fa:

—Na'su, que canjan. Vani gi an'bian'fa dos sundaro matichima.

Jesúsja cambia su:

—Nanitssi tsu.

*Jesús Getsemaníni Chigama iñajan
(Mt 26.36-46; Mr 14.32-42)*

³⁹ Tsomba Jesúsja sombopa tise in'janqquia'caen Olivo ccotta'ccongá ja. Tisema shondosundeccu'qqe fae'ngae jaja'fa. ⁴⁰ Tseni napipa Jesús tise'pama su:

—Chigama iñajan'jen'faja egae tsinconsa'ne.

⁴¹ Tsomba tiseja ti'tsse joccani ja -biambi'ccoe-patuma ttovaqquia'can'ccoe. Japa ccaru dyaipa Chigama iñajamba ⁴² su:

—Yaya, que in'jan'da va ña vanaña'choma joqquitssianjan. Tsa'ma joqquitssiañe in'jambi'ta

que in'janqquia'caen tsonjan. Ña in'jan'chomajan me'i.

⁴³ Tsonsi Chigama sefacconi'su shondo'su Jesúsnga attiamba tisema quiñaen. ⁴⁴ Tsa'caen ñoa'me vana'jemba ti'tsse quia'me Chigama iñajan. Poipa'su'qqe sombopa ñoa'me injan'tsse anjampa tssanqquia'caen andenga amppi'je.

⁴⁵ Chigama iñajan nanimba jangipa tisema shondosundecunga japa tise'pa ñombi'yepa ana'jen'choma atte. ⁴⁶ Attepa tise'pama su:

—¿Micomba qui ana'jen'fa? Jangipa Chigama iñajan'jen'faja egae tsinconsa'ne.

Jesúsma indi'fa'cho

(Mt 26.47-56; Mr 14.43-50; Jn 18.2-11)

⁴⁷ Tise toya afa'je'ni tsain'bio a'i jiña'fa. Jesúsma shondo'su Judas tsu a'ima angacan. Tiseja Jesúsma mochaye catse. ⁴⁸ Tsa'ma Jesús tisema su:

—Judas, ¿Aqquia ti qui in'janqquia'caen mochapa Sefaccone Ji'cho A'ima cca'indeccunga afeya?

⁴⁹ Tsonsi Jesúsí'ccu jacansundecuja ma'caen tsoña'chove in'jamba su'fa:

—Na'su, ¿matichi'ccu iyicco'faya'an ti gi?

⁵⁰ Qquen supa fa'e tise'pa'su Chigama afa'su na'sumbe sema'suma atuipa tise tansinfa'su tsosinama qqerui tova. ⁵¹ Tsa'ma Jesúsja su:

—¡Anttéja! Panshaen jova'caen tsinconjama.

Qquen supa sema'sumbe tsosinama pporaemba toeningatsse ccushaen. ⁵² Omboe Chigama afa'su nasundeccu, sundaro capitándeccu, israe'su coenzandeccu'qqe tsa'caen Jesúsma indiye ji'fasi Jesúsja tise'panga su:

—¿Ccanambama indiye jiqquia'caen ti qui sundaro matichi, quini'ccoi'ccu ji'fa? ⁵³ Ñajan Chiga ettini poi a'ta que'i'ccu can'jen'ma qui ñama ppo-raen'fambi. Tsa'ma va tsu que'i patsuya'cho hora. Sinttia'su na'su, Satana, tsu ja'ño patsu.

Pedro Jesúsne a'tien'cho

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Tsonsi Jesúsma qquitssa indipa anga'fa. Chigama afa'su na'su ettinga angapa ca'nian'fa. Pedroja omboe biacca jacan. ⁵⁵ Aindeccu tsa'o atandundunga si'ngema setsaemba sa'vuye dyai'fasi Pedro'qqe fae'ngae tise'pai'ccu dyai. ⁵⁶ Pedro si'nge anchanda'cho a'tatssiani dyaisi sema'su pushesu tisema attepa can'boemba su:

—Va a'i'qqe tsu Jesús'i'ccu canjen'su.

⁵⁷ Tsa'ma Pedroja qqen supa a'tien:

—Pushesu, ni ñajan tisema atesumbi.

⁵⁸ Omboe faesu'qqe Pedroma attepa su:

—Que'qqe tsendeccu'su qui.

Tsa'ma Pedroja su:

—Tsandie, me'i gi.

⁵⁹ Fae hora'ca'en pasasi faesuja quia'me qqen su:

—Ñoa'me tsu va tsandieja Jesús'i'ccu canjen'su. Tise'qqe Galilea'su.

⁶⁰ Tsa'ma Pedroja su:

—Tsandie, atesumbi gi que jongoe qqen su'choma.

Tse'faei'ccuyi arapa gajoja se'yo. ⁶¹ Se'yosi Na'su Jesúsja piyicamba Pedroma can'boen. Tsonsi Pedroja Na'su Jesús qqen su'choma in'jan:

“Arapa gayo toya ja'ño a'ta se'yombi'te queja ñane tres se a'tieña.” ⁶² Tsa'caen in'jamba Pedroja sombopa quia'me i'na.

Jesúsma afase'fa'cho

(Mt 26.67-68; Mr 14.65)

⁶³ Tsonsi Jesúsma indisundeccuja tisema afasepa tsse'tsse'fa. ⁶⁴ Tise tso'fema sarupai'ccu tandamba tise cambajuma tssaipa ñajampaña'fa:

—Injama'choi'ccu in'jamba condaja majan tsu quema tssai.

⁶⁵ Toya'caen osha'cho egae afa'choi'ccu tisema afase'fa.

Jesúsma ñajampaña'fa'cho

(Mt 26.59-66; Mr 14.55-64; Jn 18.19-24)

⁶⁶ Cosepa a'tasi poi'cco israe'su coenzandeccuja bo'fa. Poi'cco Chigama afa'su nasundeccu, poi'cco Chiga Tevaen'jema atesu'chondeccu'qqe bo'fa. Tsa'caen bo'fa'chonga Jesúsma angasi nasundeccuja tisema su'fa:

⁶⁷ —¿Queta ti qui Chigambe Cristo? Inginga condaja.

Tsa'ma Jesúsja su:

Que'inga conda'ni'qqe qui ñama paña'faya'bi.

⁶⁸ Ña que'ima ñajampaña'ni'qqe qui ñanga conda'faya'bi. ⁶⁹ Tsa'ma Chigaja osha'choma oshacho. Ñajan Sefaccone Ji'cho A'i. Jai'ngae gi Chiga Quitsai'ccu dyaipa fae'ngae osha'choma mandaya.

⁷⁰ Tsonsi tsu poi'cco su'fa:

—¿Tsa'caenda ti qui Chiga Dutssi'ye?

Jesúsja tise'pama su:

—Ju, que'i suqquia'can gi.

⁷¹ Tsonsi tsu su'fa:

—¿Micomba gi cambia afasundeccuve ti'tsse ttatta'je'fa? Tayo gi tise aya'fai'ccu tise su'choma paña'fa.

23

Na'su pilato Jesúsma iñajampaña'cho

(Mt 27.1-2, 11-14; Mr 15.1-5; Jn 18.28-38)

¹ Tsomba tse'i poi'cco bo'fa'chondeccu fae'ngae jangipa Jesúsma anga'fa Na'su Pilatonga. Tseni napipa ² Jesús ma'caen tsincon'choma condaseye ashaemba su'fa:

—Ingija va a'ima attepa gi indi'fa. Tiseja ingi aindeccuma afopoemba atesian'jen. Ingima tsu se'pi Na'su César iñajan'cho impuestoma afeye. Tiseja Cristo qqquen tsu su, ande na'su qqquen su'cho.

³ Tsonsi Pilatoja Jesúsma iñajampaña:

—¿Queta ti qui israe'su na'su?

Jesúsja conda:

—Que suqquia'caen, ña gi.

⁴ Tsonsi Pilatoja Chigama afa'su nasundeccuma, a'i bo'fa'chondeccuma'qqque su:

—Ñajan tisene shacapave attembi gi.

⁵ Tsa'ma tise'paja ti'tsse iyicca'yepa qqquen su'fa:

—Tiseja poi'cco Judea aindeccuma qqquejecoen'su tsu. Nane Galileani atesiañe ashaemba ja'ñojan va canqqueni'qqque tsa'caen atesian'jen.

Herodes Jesúsma iñajampaña'cho

⁶ Pilatoja tsama pañamba qqquen iñajampaña: “¿Jesústa ti Galilea'su?” ⁷ “Ju,” qqquen susi Pilatoja Jesúsma angaye manda Herodesnga.

Galilea ande na'su Herodesja tsequi a'ta Jerusaléni can'jen. ⁸ Herodesja Jesúsma atepa ñoa'me avuja. Osha'choma tisene pañamba bo'tssingae tisema atteye ñombi'ye. Toya'caen tsu in'jan cuintsu Jesús majan sefani'su canjaen'choma attiansi atteye. ⁹ Tsa'caen in'jamba tsain'bitsse Jesúsma ñajampaña. Tsa'ma Jesúsja afambi. ¹⁰ Chigama afa'su nasundeccu, Chiga Tevaen'jema atesu'chondeccu Herodesnga fae'ngae ccutsupa ñoa'me Jesúsne osha'cho egave conda'fa. ¹¹ Herodes, tise sundarondeccu'qqe Jesúsma chi'gapa afase feña'jen'fa. Ñotssia na'su sarupa'cain'ccu tisema ondiqquiamba toequi Pilatonga maña. ¹² Tayoeja Herodesja Pilato'ccu iyicca'ye'su. Tsa'ma tsequi a'ta tsu ñoquicco'fa.

Jesúsma fi'ttiye manda'cho

(Mt 27.15-26; Mr 15.6-15; Jn 18.39-19.16)

¹³ Tsomba tse'i Pilatoja Chigama afa'su nasundecsuma, israe'su nasundecsuma, poi'ccu a'ima'qqe ttu'se boñamba ¹⁴ su:

—Tiseja aindecsuma quejeco'en'su qqen supa qui va a'ima ñanga i'fa. Que'i caña'jen'ni gi tisema ñajampaña'ma que'i suqquia'caen egae tsincon'chove attembi. ¹⁵ Toya'caen Herodes'qqe tisema ñajampaña'ma shacapave attembipa tisema toequi moen. Va a'ija jongoesuma'qqe egae tsincombi tisema fi'ttiya'chove. ¹⁶ Tsa'cansi gi tisema ma'ppipa ccupaya.

¹⁷ Poi canqqe'fa Chiga panshaen'cho injienge'cho fiestama panshaen'jenqui tsu na'su Pilatoja fae indiye'choma ccupaye atesu.

18 Jesúsma ccupaye qqwen susi poiyyi'cco a'i fae'ngatsse fundondo'e afa'fa:

—¡Va a'ima fi'ttipa Barrabásma ccupaja!

19 Nane voeyi Jerusaléni tsa Barrabásja nasundecuma joqquitssiañe in'jamba a'ima fi'ttisi tisema indipa piccopa an'bian. 20 Pilatoja toya Jesúsma ccupaye in'jamba ccase aindecunga tsa'caen su. 21 Tsa'ma ti'tsse fundondo'e su'fa:

—¡Avuja'cconga otija! ¡Avuja'cconga otipa fi'ttija!

22 Ccase, tres se Pilatoja aindecunga su:

—¿Jongoesune qui tisema fi'ttiye in'jan'fa? ¿Jongoesian tsu egaeta tsincon? Attembi gi jongoesuve egae tsincon'choma tisema fi'ttiya'chove. Tsa'camba gi tisema ma'ppipa ccupaya.

23 Tsa'ma aindecuja iyicca'yepa quia'me fundondo'e afapa Pilatoma manda'fa cuintsu avuja'cconga Jesúsma fi'ttiye. Tsa'caen fundo'jepa Pilatoma patsu'fa. 24 Tsonsi Pilatoja Jesúsma fi'ttiye manda tise'pa in'janqquia'caen. 25 Tsomba indiyecho Barrabásma, tsa nasundecuma joqquitssiañe in'jamba a'ima fi'tti'su, tsama tiseja ccupa. Tsa'ma Jesúsma a'inga afe cuintsu tise'pa in'janqquia'caen tson'faye.

Avuja'cconga fi'tti'cho

(Mt 27.32-44; Mr 15.21-32; Jn 19.17-27)

26 Tsonsi sundarondeccu Jesúsma fi'ttiye angaji'fa'ni Simón, Cirene ande'su a'i, canqquenga ca'nisi cachuiccopa tisema indi'fa. Indipa manda'fa cuintsu Jesús avuja'ccoma andupa Jesús sepaccofae jiye. 27 Toya'caen tsain'bio a'i Jesús sepaccofae jiña'fa. Tsain'bio pushesundeccu'qqe

jiñamba ñombi'yepa ina'jen'fa. ²⁸ Tsa'ma Jesúsja piyicamba tise'pama su:

—Jerusaléni'su pushesundeccu, ñane i'na'fajama. Tsa'ma que'ine, que'i dushundeccune i'na'faja. ²⁹ Nane jai'ngae napisi tsu a'ija qqwen su'faya: “Avujatssiya tsu majan pushesu du'shu mechoaja. Nane majan du'shuve isumbi'ta, majan du'shuma chochoembi'ta avujatssiya tsu.” ³⁰ Tsequi a'ta tsu a'ija paye in'jamba ccotta'cco tisenga amppipa a'tuye ñombi'ye'faya. Tsa'caen in'jamba tsu ccotta'ccoma qqwen su'faya: “¡Inginga amppi otssija!” ³¹ Nane cuna ttemba re'riccoe si'ngenga ju'ruqquia'caen ñajan ja'ño vanaña. Tsa'ma quini'cco samba quia'me ju'ruqquia'caen qui que'ija ti'tse'tsse vana'faya'cho.

³² Toya'caen faesu dos a'i, egae tsincon-sundeccuma'qqe Jesús'ccu fae'ngae fi'ttiye anga'fa. ³³ “Tsove tsu'tta” qqwen su'cho ccotta'conga napipa tse'ttinga Jesúsma avuja'conga otipa ccutsian'fa. Tsa dos egae tsincon-sundeccuma'qqe faesu avuja'conga otipa ccutsian'fa fa'emajan Jesús tansinfanga, faesumajan Jesús pavefanga. ³⁴ Ccutsiansi Jesúsja su:

—Yaya, tise'pa'ye va egae tsincon'choma joqquitssianjan. Va aindeccuja tise'pa tson'jen'choma atesu'fambi.

Toya'caen sundarondeccuja gana qqwen cofe'je'fa Jesús ondiccu'je'cho sarupama attufaenccoye. ³⁵ Aindeccuja can ccutsu'fa. Toya'caen nasundeccuja tisema afase'fa qqwen supa:

—Tiseja faesuma ccushaen. Cuintsu faesuma ccushaenqquia'caeñi tisuma'qque tsa'caen ccushaenjan. Tiseja ñoa'me Chiga in'jan'cho Cristota tsa'caen tsu canjaeña'cho.

³⁶ Sundarondeccu'qqe tisenga catsepa inzatssia o'fa tsaja tsa'ccuma cui'ña qqquen co'fe'fa.

³⁷ Toya'caen afasepa tsu qqquen su'fa:

—¡Queja ñoa'me israe'su na'suta tisuma ccushaenjan!

³⁸ Toya'caen Jesús tsove omba'ttinga qqquen tevaen'choma avuja'cconga ancaen'fa.

Vaja israe'su na'su.

³⁹ Fa'e egae tsincon'su Jesús'ccu pporotsse avuja'cconga otiye'choja Jesúsma afasepa su:

—¡Queja ñoa'me Cristota Tisuma ccushaemba in-gima'qqe ccushaenjan!

⁴⁰ Tsa'ma faesu otiye'choja tise faenga'suma iyu'upa su:

—¿Dyombi ti qui Chiganejan? Que'qqe va a'ia'caen paya. ⁴¹ Ingija egae tsincomba gi ja'ño vanamba tsane afepoen'jen'fa. Nane manda'cho mandaqquia'caen gi pa'faya. Tsa'ma va a'ija egae tsincombi.

⁴² Tsomba tiseja Jesúsma su:

—Jesús, que na'suve da'ta ñama injan'jenjan.

⁴³ Jesúsja tisema su:

—Ñoa'me gi su, ja'ño a'ta qui ñai'ccu Chiga ñotssiani can'jeña.

Jesús pa

(Mt 27.45-56; Mr 15.33-41; Jn 19.28-30)

⁴⁴ Tayo chiga tansia'ni pa'cco ande'ye sintsse coseqquia'ca'en da. Nane chiga ondu'setsse

tša'caen sintsse da. ⁴⁵ Tša'caen coejechiga da'je'ni Chiga etti'su Chigai'ccu cachuicco'je'cho cuartoma picco'je'cho sarupa'qqe chittain ja. ⁴⁶ Tsonsi Jesúsja quia'me afapa su:

— ¡Yaya, ña qquendya'pama gi quenga afe'je!

Qquen susi tise qquendya'pa somboin jasi pa.

⁴⁷ Tsonsi sundaro capitán tša'caen da'choma atepa Chigama ñotsse afapa su:

— Ñoa'me va a'ija egae tsincombi.

⁴⁸ Tsain'bio a'i avuja'conga fi'tti'choma atteye bopa Jesús tayo pasi atepa tise'pa utu'choma tssai'fa ñombi'ye'choma canjaeñe. Tša'caen ñombi'yepa tise'pa tsaoni jaja'fa. ⁴⁹ Toya'caen Jesús amigondeccu'qqe biapieyi ccutsupa pa'tssima atte'fa. Majan pushesundeccu'qqe, Jesús'ccu fae'ngae Galileane ji'chondeccu'qqe tsendeccui'ccu fae'ngae ccutsupa atte'fa.

Jesúsma a'tu'fa'cho

(Mt 27.57-61; Mr 15.42-47; Jn 19.38-42)

⁵⁰⁻⁵¹ Israe'su nasundeccu bopa Jesúsma fi'ttiye mandasi fa'eja tansintsse in'jamba fi'ttiye se'pi. Tsaja ño'a a'i, tise iniseja José. Judea ande'su Arimatea canqqe'su a'i tsu. Tiseja in'jamba Chiga tisu aindecuma ccushaemba mandaya'chove ronda'je. ⁵² Tise tsu Pilatoni japa Jesús ai'vove iñajan. ⁵³ “Isupa angaja” qqquen susi avuja'cco'ye andiamba totoa sarupai'ccu findipa ñoña'cho fattocco chango atu'ttinga ccuiña'fa. Tseccungaja faesu pa'choma toya a'tumbi'choa. ⁵⁴ Sema'ma'qquia a'ta tayo napijisi toya tsu ñoña'jen'cho a'ta.

55 Tsonsi pushesundeccu'qqe Jesús'ccu fae'ngae Galileane ji'chondeccu omboe jipa atu'ttima atte'fa. Ai'voma ma'caen ccuiña'choma'qqe attepa 56 toequi Jerusaléni ja'fa. Tsa'caen japa pa'chombe ai'voma onjoenqqe'su ñome'bama'qqe ñoña'fa Jesús ai'voma onjoëne. Manda'cho mandaqquia'caen sema'ma'qquia a'ta tseni ño'fá can'jen'fa.

24

Jesús ccase qquendya'cho

(Mt 28.1-10; Mr 16.1-8; Jn 20.1-10)

1 Cuna avujaquive a'tapa coe'je tseyi deji'ni tsesu pushesundeccuja atu'ttini ja'fa. Ñome'bama tayo ñoñamba anga'fa. 2 Napipa atte'fa picco'cho patuma tayo joqquitssian'choma. 3 Tsa'ma atu'ttinga ca'nimba Na'su Jesús ai'voma atte'fambi. 4 Toya dyopa asi'ttaén ccutsu'fa'ni dos a'i, ondiccu'je chhariccotssia'ma ondiccucho'chondeccu, fae'ngae fae'tti ccutsu'fa. 5 Tsama attepa pushesundeccuja dyopa puntssan ccutsu'fa. Tsa'ma tsa tsandiendeccuja tise'pama su'fa:

—¿Jongoesie qui a'ija cansiama pa'cho ccuini ttatta'je'fa? 6 Tiseja va'tti can'jembi. Tayo tsu qquendyapa ja. ¿Injan'jen'fambi ti qui Jesús que'inga su'choma? Nane toya Galileani can'jemba tiseja conda 7 ma'caen Sefaccone Ji'cho A'i egae tsinconsundeccunga afeyeya'choma. Tsendeccu avuja'ccongga tisema fi'ttisi tres a'ta pasasi ccase qquendyaya'chone conda.

8 Tsa'caen susi Jesús su'choma in'jamba
 9 atu'ttine sombopa japa Jesúsma once shondosundecunga conda'fa. Cca'i Jesús aindecunga'qqe pa'ccoma conda'fa. 10 María Magdalena, Juana, faesu María (tsaja Santiago chan) tise'pai'ccu jacan'su pushesundeccu'qqe pa'ccoma attepa Jesúsma shondosundecunga condase'fa. 11 Tsa'ma tsendeccuja pañamba “Aqquia su'cho” qqen in'jamba in'jan'fambi.

12 Tsa'ma Pedroja tse'faei'ccuyi jangipa buttopa atu'ttini ja. Ccarupa ppoicamba oppoen'cho sarupaveyi atte. Attepa ma'caen da'choma asi'ttaemba toequi tsaoni ji.

Jesús tsaiqui'ye attian'cho
(Mr 16.12-13)

13 Tsequi a'ta dos a'i Emaús canqqueni jayi'fa. Tsa canqqueja Jerusaléne once kilometro tsu. 14 Jayipa osha'cho voeyi tson'chone condase'je'fa. 15 Tsa'caen condase'je'fasi Jesúsja catsepa fae'ngae jayi. 16 Tsa'ma a'ija Jesúsma atte'ma tise've atesu'fambi. 17 Tsonsi Jesúsja tise'pama iñajampaña:

—¿Jongoesune qui condasé jayi'fa?

Tsa'caen iñajampañasi ñombi'yepa zu ccutsu'fa.

18 Tsa'caen zu ccutsupa fa'e, Cleofás, qqen inisecho'cho, tisema su:

—Poiyi'cco biani can'jensundeccu tsu Jerusaléni jipa tseni voeyi tson'choma atesu'fa. ¿Queyi ti qui tsama atesumbi'choa?

19 Tsonsi Jesús tise'pama su:

—¿Jongoesuma tsu tson'fa?

Tsonsi tisenga conda'fa:

—Jesús Nasarenoma tson'cho tsu. Tiseja Chiga Aya'fama afa'su. Osha'cho ñotssiave atesiamba osha'cho ñotssiave tson. Chiga tisei'ccu can'jensi poi'cco a'i tise've in'jan'fa. ²⁰ Tsa'ma Chigama afa'su nasundeccu, ingi nasundeccu'qqe, tsa Jesúsma indipa Na'su Pilatonga afe'fa cuintsu fi'ttiye. Pilato fi'ttiye mandasi sundarondeccu tisema avuja'ccongá otipa fi'tti'fa. ²¹ Ingija asi'ttaemba in'jan'fa'a tiseja israendeccoma ccushaen'su. Tsa'ma ja'ño tres a'ta tsu pasa osha'cho tsa'caen tson'fa'cho. ²² Toya'caen ja'ño a'ta majan ingi'su pushesundeccu ccaningae tson'choma'qqe inginga conda'fa. Ja'ño sinte'yi atu'ttini japa ²³ Jesús ai'voma atte'fambi. Tsa'ma sefacconi'su Chigama shondosundeccoma atepa “Jesúsja tayo qqwendya” qqwen paña'fa. Tsa'caen tsu inginga conda'fa. ²⁴ Majan ingi'su tsandiendeccu'qqe atu'ttini japa pushesundeccu suqquia'caen atte'fa. Tsa'ma Jesúsma atte'fambi.

²⁵ Tsonsi Jesúsja tise'pama su:

—¡Tsosinambi'fa qui! Ñoa'me qui injama'cho shaca'fa osha'cho Chiga Aya'fama afasundeccu su'choma in'ja'ñe. ²⁶ Nane tsendeccuja tansintsse tsu conda'fa. Cristoja toya joccapitssia've dambi'te tsu tsa'caen osha'chone vanaña'cho.

²⁷ Tsomba Moisés condase'choi'ccu ashaemba pa'cco Chiga Aya'fama afasundeccu Cristone condase'choma a'tatsse tise'panga atesian.

²⁸ Emaús canqqueni pan napijipa Jesúsja ti'tsse joccani jaya'caen jayisi ²⁹ tisema se'pi'fa qqwen supa:

—Tayo tsu sime. Coseya tsu. Ingi'ccu can'jenjan.

Tsonsi Jesúsja tise'pa tsaoni japa ca'ni.
³⁰ Tise'pai'ccu mesanga dyaipa Jesúsja panma isupa Chigama iñajan. Tsomba panma doñamba tise'panga afe. ³¹ Panma afesi tse'faei'ccuyi tise'pa tso'fe fettayeqquia'caen Jesúsve attepa in'jan'fa. In'jan'fasi Jesúsja atte'masiave dapa ja. ³² Tsonsi tisupanaccu condasecco'fa:

—¿Injama'cho tsosipie avujatssi'fambi ti gi tiseja tsaiquina ingi'ccu condase'jesi? Nane Chiga Tevaen'jema inginga atesian'jensi gi ñoa'me avuja'fa.

³³ Tse'faei'ccuyi jangipa toequi Jerusaléni shanda'fa. Jipa Jesúsma once shondosundeccu faesundeccui'ccu fae'ngae can'jen'choma atte'fa.
³⁴ Tsonsi Jesúsma shondosundeccuja tise'pama su'fa:

—Ñoa'me tsu Na'suja ccase qqwendya. ¡Simóna tsu Tisuma attian!

³⁵ Tsonsi Emaús can'jensundeccu'qqe poi'cconga condase'fa Jesús tise'pai'ccu tsaiqui'ye ja'choma. Toya'caen Jesús doñamba afesi in'jan'choma'qqe condase'fa.

Shondosundeccunga attian'cho

(Mt 28.16-20; Mr 16.14-18; Jn 20.19-23)

³⁶ Tsa'caen condase'je'fa'ni Jesús tise'panga attiamba enttingenga ccutsupa su:

—Dyombe can'faja.

³⁷ Poiyi'cco dyopa can'boen'fa aya qqen in'jamba. ³⁸ Tsa'ma Jesúsja su:

—¿Micomba qui dyo'fa? ¿Micomba qui injama'choni asi'ttae'ma toya in'jan'fambi? ³⁹ Ña tive, ña tsu'ttema'qqe can'faja. Ña'ni gi. Ñama

pporaemba can'faja. Camba qui in'jan'faya ñajan nama, tsu'ttama'qque an'bian. Ayaja tsa'caen an'biambi.

⁴⁰ Qquen supa tise tive, tsu'ttema'qque can-jaen. ⁴¹ Tsa'ma tsendecuja avuja'ma toya in'jañe osha'fambi. Toya asi'ttaen'jen'fa'ni Jesúsja su:

—¿Aña'chomanda ti qui an'bian'fa?

⁴² Tsonsi avu san'jama, tuño cuñajun'choma'qque afesi ⁴³ isupa poi'cco caña'jen'ni an. ⁴⁴ Tsomba Jesúsja tise'pama su:

—Ña toya que'i'ccu can'jeinte gi ja'ño tsoña'chone conda'a. Nane Moisés manda'cho, Chiga Aya'fama afasundeccu tevaen'jen, settapoen'cho tevaen'jen'qque ñama tsoña'chone condase'fa. Tsa tayoe ña que'inga condase'choma tsu ja'ño tson'fa.

⁴⁵ Tsomba tise'pa injama'choma in'jaen cuintsu Chiga Tevaen'jema in'jan'faye. ⁴⁶ Toya'caen tsu su:

—Tayo tsu tevaen: Ccushaen'su Cristoja vanamba papa tres a'tangae ccase qquendyaya'cho. ⁴⁷ Toya'caen tsu tevaen: Jerusaléne ashaemba tsu Cristone ñotsse condase'choma poi ande'su aindecunga condaseya'cho cuintsu paña'faye. Pañamba tise'pa egae tsincon'choma chi'gapa Cristove in'jan'ninda tiseja a'i egae tsincon'choma joqquitssiaña. ⁴⁸ Que'ija pa'cco vama camba cca'indeccunga condase'faya'cho. ⁴⁹ Ja'ño gi ña Yaya afeya'cho qquen su'choma que'inga afeya. Tsa'ma Jerusaléni ronda'je'faja sefacconi'su Chiga Qquendya'pa que'ima in'jaeña'ngae.

*Jesús sefacconi ansunde'cho
(Mr 16.19-20; Tson 1.6-11)*

⁵⁰ Tsomba sombopa Jesúsja tise'pama Betaniani angaji. Tsa'caen angajipa tise tivema sefaningae yasapa Chigama iñajan cuintsu Chiga tisema shondosundecuma fuiteye. ⁵¹ Toya tsa'caen iñajan'jen'ttie Jesúsja tise'pama catipa sefacconi ansundin ja. ⁵² Tsa'caen jasi shondosundecuja Jesúsne ñotsse afapa ñoa'me avujapa toequi Jerusaléni shanda'fa. ⁵³ Poi a'ta Chiga ettini can'jemba Chigama ñotsse afa'je'fa.
Tsangaeyi.

Chiga Tevaen'Jema Atesuja 1, Aisheve Caña'cho

New Testament and Genesis in Cofán (EC:con:Cofán)

copyright © 2012 Wycliffe Bible Translators, Inc.

Language: Cofán

Translation by: Wycliffe Bible Translators, Inc.

Cofán

con

Ecuador

Copyright Information

©Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cofán

©Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 21 Feb 2024 from source files dated 29 Jan 2022

dac2c985-27da-5832-a781-3d6b3890f4c7